

**EIGHTH LEGISLATIVE ASSEMBLY OF MIZORAM
(SEVENTH SESSION)**

LIST OF BUSINESS

FOR TWELFTH SITTING ON FRIDAY, THE 12th MARCH, 2021
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

STATEMENT BY A MINISTER

2. **PU TJ. LALNUNTLUANGA**, Minister for Environment, Forests & Climate Change Department to make a Statement on the demise of Pu Khupsiansang S/o. Tualzachin, Ngaizawl, Khawzawl District due to the outbreak of forest fire on 10.3.2021.

PRIVATE MEMBERS' BUSINESS

3. * **Resolutions**

H. LALRINAWMA
Commissioner & Secretary

....

* Please see Bulletin Part-II No. 166, dated the 3rd March, 2021 for relative precedence of Private Members' Resolutions to be moved.

SPEAKER : *Mihring rin ai chuan lalpaa rinna nghah hi a tha zawk a ni.*
Sam 118:8

Zawhna leh Chhanna-ah kan kal nghal ang a, Starred Question No. 165 zawt turin member zahawm tak Dr.Z.R.Thiamsanga ka sawm e.

DR. ZR. THIAMSANGA : Pu Speaker, ka lawm e. Education Minister zahawm tak chhan atan ka zawhna te chu –

- National Educational Policy, 2020 hi Mizoram-ah hman nghal tumna a awm em?
- Mizo tawng humhalh leh tihamasawn tur hian hmalakna a awm em?
- Mizoram chhungah hian IAS Coaching Centre engzat nge awm? Champhai-ah dah ve tumna a awm em?
- MYC bul tuma Delhi khawpui IAS Coaching Centre-a lut tur Mizo thalai thlan tak kha engzat nge? An vaiin IAS Coaching kha an zawm ta em? MYC-in zirlai pakhat kha engzatin nge a sponsor? Coaching Centre an luhna hming min hrilh thei em? An vaiin Coaching Centre pakhatah em ni an awm?
- Govt. Gandhi Memorial Higher Secondary School-a zirtirtu indaihlo hi tiziaawm turin hma min laksak thei ang em?

Kha kha ka zawhna chu a ni e, Pu speaker, ka lawm e.

SPEAKER : Chhang turin a changtu Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak Dr. Z.R.Thiamsanga, Champhai North bialtu MLA zawhna chhanna chu hetiang hi a ni e.

- Awm e.
- Awm e, Mizo Language Development Board din tura hmalak mek a ni.
- Mizoram chhungah IAS Coaching Centre 4 (pali) a awm mek.
- Champhai-ah dah tumna a awm rih lo.
- MYC bultuma Delhi khawpui IAS Coaching Centre-a lut turin Mizo thalai 20 thlan an ni. An vaiin Coaching Centre an zawm vek tawh. MYC-in zirlai pakhatah ₹3,00,000/- (nuai thum) vel theuh a seng.
- Centre pahnih i.e. ALS Coaching Academy leh Chanakya IAS Coaching Centre-te an ni. Centre 2 (pahnih) ah hian 10 ve vein an awm.
- An indaihloh dan kan lo enfiah ang a, a tul angin hma kan lo la dawn nia.

SPEAKER : Zawhbelhna zawt turin a zawhna neitu Member zahawm tak Dr. Z.R.Thiamsanga ka sawm e.

DR. ZR. THIAMSANGA : Pu Speaker, ka lawm e. Govt. Gandhi Memorial Higher Secondary School khi zirlai 700 (za sarih) chuang an awm a, kumtin an indaihloh avangin mi tam tak khi an lut thei lova. Tunah khian zirtirtu an indaihloh dan chu nikum

khan Mizo leh Commerce zirtirtu vanduaithlak takin an boral a, a bik takin Biology leh Commerce subject-ah phei chuan teacher pakhat chiah ve ve an awm a, khi khi min rawn dahsak ngei kan beisei a. Mi 700 vel a accommodate theih a, vertical extension hian min tih sak thei ta sela chu zirlai tam tak luhna changlo pawh hi an luh theih kan ring a ni. Champhai-ah khian Higher Secondary School hi Sawrkar ta chu pakhat chiah a awm a, khitiang District khawpui ve reng ruangah khi chuan pahnih tal hi chu awm ve se kan duh khawp mai a, Champhai Govt. High School tunhmaa School pawimawh tak thin, result pawh tha tak nei thin kha tunah khian han up-grade-a Higher Secondary-a min lehsak turin ka rawn ngen bawk a, khangte kha min tihsak theih ang em?

Tin, Hnahlan-ah hian Higher Secondary School kan nei a, lumpsum a ni rih a saw pawh saw, grant-in-aid-a min hlankai sak turin kan beisei viau a.

Chutiang bawk chuan Vaikhawtlang-ah High School kan nei a, adhoc grant-in-aid hian an la awm lova, lumpsum-in an awm a, kan hah rei tawh khawp mai a, khing pawh khi ngaihtuah dan min rawn nei sak se kan Education Minister zahawm tak hian kan lawm khawp ang.

Tin, Rabung hian High School zirlai an ngah ve thei khawp mai a, 60 (sawmruk) chuangte an han nei ve a. College kal an tan a harsa a, chuvang chuan Rabungah hianin Samagra atang hian Higher Secondary School-te hi min rawh tihsak ve thei ang em?

Tin, Pu Speaker, a dang lehah chuan Mizo tawng humhalh leh tih hmasawn hi a pawimawh hlein ka hria a. Youth Commission hian job portal tih te hi ‘hna-inpui’ an ti a, a tha khawpin ka hria a. Tin, Secretariat-ah khuan Electric Department hian ‘Kawlphetha Hmunpui’ an ti a, chutiang chuan kan tawng hi kan humhalh a ngai hle mai a. Mizo tawng hi United Nation Education Scientific & Cultural Organization (UNESCO) an tih hian kum 2016 khan tawng ral hlauhawm *vulnerable* zingah Mizo tawng hi a rawn tel tlat mai a, Meghalaya-te pawh 8th scheduled an han beisei a mahse ammahni Assembly House ngeiah Sap tawng an hmang a, ammahni tawng an hmanglo a ni. Chuvang chuan an tawng hi a dal tial tial mai a, 8th Scheduled chu a har viau ang. Chuvangin keini pawh hian kan tawng kan humhalh zel theihna tur hian kan hman tam a ngai a, kan ramah chauh kan hmang tur a ni lova, kan in leh lo-ah chauh kan hmang tur a ni lova, ramdanga kan kalte pawhin sap tawng kan uar a. Assembly House ngeiah pawh hian duhdan chuan Mizo tawng hi hmang tam ila ka ti a, ‘budget estimate’ te pawh kan han ti a, ‘budget ruahmanna’ te pawh han ti ta mai ila a dik ang em, khatiang deuh khan hman tam hi thain ka hria a. Hei hi House-ah pawh hian Pu Speaker, Sap tawng hi a tlem thei ang ber hmang ila. Tin, kan tawng kan humhalh theihna tur chuan India danpui tawng 8th Scheduled hnuiaia kan awm ve theih nan he House zahawm tak pawh hian hma kan lak chak a ngai hlein ka hria a, kha kha ka rawn sawi a ni e. Pu Speaker, ka lawm e.

SPEAKER : Zawhbelhna zawt turin Member zahawm tak Pu Lalrintluanga Sailo ka sawm e.

PU LALRINTLUANGA SAILO: Pu Speaker, ka lawm e. School Education Minister zahawm tak chhan atan ka zawhbelhna chu, minority area, a bikah Chakma-te awmna bikah hian Mizo tawng zir a pawimawh hlein ka hria a, an thiamlo em em mai a. BA, MA tam tak an awm ve tawh a, an phak tawk hna an dil hian Mizo tawngah an tla zel a, interview leh written exam-ah pawh an tling theilo a ni. Chuvang chuan, hnam inpumkhatna ni bawk, ram tana thil tha ni bawk kan zinga kumkhuua cheng tur an nih avangin, heng Chakma awmna bikah hian Mizo tawng subject special deuha zirtir dan te a awm thei em, School Education Department kaltlang hian, tih ka zawt a.

Helai hi a pawimawh hle mai a, bial kan han fang a, tawng an thiam si lova, kan inpawh thei lova. Tuna kan practice dan tlangpuiah chuan primary level-ah Bengali an ti a, Middle section-ah English leh Hindi an ti a, engmah thiam tak tak lo khan an chhuak a ni. Chuvang chuan hei hi a pawimawh hlein ka hria a, kan in communicate that chuan an mahniah inthlahrunna a awm lova, grass root level tak takah tun anglo deuh hleka kalpui dan hi awm sela a thain ka hria a, chu chu ka zawt a ni e.

SPEAKER : Member zahawm tak Pu KT Rokhaw ka sawm e.

PU KT. ROKHAW : Pu Speaker, ka lawm e. Tipa 'V' Centenary High School hi Palak bialah chuan class-XI leh XII kan neihchhun a ni a, tunah hian student 185 an awm a. Nikum leh kum hmasa te pawh khan an ti tha khawp mai a, pass percentage kha 80% te kha a ni a. Lecturer te hlawh hi Job Card atang leh MLA fund atang te hian kan pe thin a. Kum 2018 khan lumpsum grant-in-aid min pe a, a beitham khawp mai a. Chuvangin ka zawhna chu, Tipa 'V' Centenary High School hi Adhoc Grant-in-Aid status-ah min hlan kai sak thei ang em tih hi a ni e.

SPEAKER : A theih ang anga rawn chhang turin Minister zahawm tak Pu Lalchhandama Ralte ka sawm e.

PU LALCHHANDAMA RALTE, MINISTER: Pu Speaker, Member zahawm tak zawhna neitu Dr. Z.R. Thiamsanga zawhna, Gandhi Memorial Higher Secondary School-a Biology leh Mizo subject bikah zirtirtu an mamawhna te, vertical extension zirlai 700 chuang zet zawt an neiha vanga an mamawh chungchang a rawn sawi kha, nichina kan chhan tawh ang khan an mamawh leh tul dana zirin department-in kan lo enzui dawn nia tih kha ka chhanna a ni a.

Champhai khawpui, hetiang reng ruangah Govt. Higher Secondary School pakhat chauh, a dang dah belh theih a ni em tih a zawhbelh kha, kan lo enzui ang a. A leh lamah chuan Champhai South area lamah hian bialtu MLA zahawm tak Pu TJ Lalnuntluanga hian

Higher Secondary School pakhat ami pawh an dinthar mek a, an buaipui a. Chungte pawh chu khawpuia zirlaite mamawhna lo pung zelah hian en chhoh chhunzawm a tul a ni.

Tin, Hnahlan Higher Secondary School upgrade te, Vaikhawtlang High School adhoc beisei chungchang te leh Rabung Higher Secondary School Samagra-a dah leh thil chi hrang hrang kha a ni a. School upgradation hrim hrim hi hman nia demand kan sawi nia kan sawi tawh, kan Chief Minister hoin school hmasawnna tur ang chi te ngaih pawimawh hmasakah dah a ni a. School upgradation tur te pawh ngaih tuahna kan sen chhoh mek laiin hripui a vangin kan beisei ang leh kan duh ang kalkawng kan zawh hlei thei lo a ni a. Kan ram dinhmun hmalam pana kan kal chhoh zel chuan heng upgradation tul kan han tih zualpui te pawh hi a tahtawla tih chhoh te pawh beiseina sang tak kan nei a ni.

Tin, Rabung bik kha Samagra-ah Higher Secondary School min dahsak thei ang em tih kha, hei hi hmannah kan chhan tawh ang deuh khan, a area-ah Samagra Higher Secondary School dah tur chuan a nghenchhan tur High School-ah khan Class-X exam tur mi 30 tal regular an neih a ngai a. Kawng hrang hrang, a radius-ah a chheh vel km 7, 8 velah Higher Secondary dang a awm loha dilna te an rawn siam anih chuan PPAB-ah kan lo ngaihtuah ang a, Delhi lamah ‘dah ngei theiha awm a ni e’ tiin, kan theih ang tawkin, duhsak takin kan lo thawn thla tel dawn nia.

Tin, Mizo tawng humhalh leh tihhmasawn chungchange a ngaih pawimawh a rawn sawi kha SEDP hnuia Board, kan Chief Minister zahawm takina min din sak, Human Resources Development Board khan bul kan tan tirha tangin kan Chief Minister-in ‘nangniin lo hma teh u’ atih angin kan hma a. Mizotawng ti hmasawna venghima kan kalpui zel theihna turin Mizo Language Development Board din turin ruahmannna siam a ni a. Helam kawnga Mizo tawng thiam tak tak te nen tum tam tak thukhawmin, Assembly Session, thlasik thutkhawm lo awm leh turah hian bill putluh theih tur angin draft bill tunah hian kan peih tawh a, chu chu tuna kan dinhmun a ni.

Tin, kan member zahawm tak Pu Lalrintluanga Sailo, Dampa bialtu ina a rawn zawhna, minority area, a bik takin Chakma te zingah Mizo subject zirtirtu kan pe thei ang em a tih kha, nimin lawk pawh khan recess room-ah West Tuipui bialtu member senior, Pu Nihar nen pawh kan sawi a. Chakma lam ten Mizotawng zir an chak thu leh, ‘zirtirtu min pe thei dawn lawm ni’ an tiha hi ngaihtuah uluk ngai leh, kan ram kan hnam kal zel tura tan thil pawimawh anih avangin, uluk taka sum leh pai kan neih theih dan te, kan Chief Minister hoa han sawia hma lak a duhawm khawp mai tih chin kha ka sawi ni ta se.

Member zahawm tak Pu KT Rokhaw, Palak bialtu MLA-ina a rawn zawhna Tipa ‘V’ Centenary Higher Secondary School hi lumpsum grant-in-aid a awm an ni a, adhoc-a hlankai theih a ni ang em a tih kha chu, a hmaa ka chhanna khan a chhang tawh thoin ka hria a. Chutihruala han sawi duh ka neih tawi te a awm a, Lumpsum grant-a awm ho hi category hrang hrangin an awm ve a, tunah hian kum 2008 MNF Ministry hmasa hunlaia

lumpsum grant-a dah tawh school 9 bawr vel hi hmasa fal tak, midang zawng zawng aia kum 10 vela hmasa, Adhoc beisei mek Grade-A a awm sa an ni. Chumi hnu 2018-a Congress Ministry kal lai in -a lumpsum-a a hlan te kha an awm leh a, school category hrang hrang kha an awm a. Sawrkari-in hma a lak chhohna turah pawh helai hi tekhawnga neih turah pawh kan ngaihtuahna kan lo hman thiam theihna turin, chu chu ka han sawi lawk a, theih ang tawkin hei hi chu Sawrkari-in kan lo enzui dawn nia.

SPEAKER : Starred Question No. 166 zawt turin Member zahawm tak Pu Lalchhuanthanga ka sawm e.

PU LALCHHUANTHANGA: Pu Speaker, ka lawm e. Starred Question No. 166 –

Kut hnathawktute tana subsidy-a pek thin, tui lakna polythene pipe hi tun aia kut hnathawktu ten an indaih zawk nan hmalak dan a awm em?

SPEAKER : Chhang turin Agriculture Deparment Minister zahawm tak Pu C. Lalrinsanga, ka sawm e.

PU C. LALRINSANGA, MINISTER: Pu Speaker, Member zahawm tak Pu Lalchhuanthanga, Aizawl South-II bialtu zighthna, Starred Question No.166 chhanna chu –

Kut hnathawktute tana subsidy-a pek thin tui lakna polythene pipe hi tun aia kut hnathawktu ten an indaih zawk nan kawng hrang hrangin hma lak mek a ni a. Hemi atan hian CSS hnuiah proposal te siam a ni a, tin, NEC hnuia project siamah pawh telh a ni bawk e.

SPEAKER : Zawhbelhna zawt turin a zighthna neitu, Pu Lalchhuanthanga, Member zahawm tak ka sawm e.

PU LALCHHUANTHANGA: Pu Speaker, ka lawm e. Ka zighthna hi ka han ngaihtuah chiang leh deuh a, Agriculture aimah mah khan Horticulture, ‘Eden Huan’ department chhan a tan khan kan it leh deuh a. Amaherawhchu, Horticulture Department ‘Eden Huan’ department changtu kan zingah a awm a, min lo hriatsak se a tha ang e.

Polythene pipe hi a pawimawh khawp mai a, hman tangkaina te pawh a tam a. Kuthnathawktute hian an dawn ve tak tak hma hian thil tithei deuh hlek te hian an lo chuh chak deuh te pawh hian a lang a. Chuvangin, a mamawh tak tak te hnenah hian duh angin a thleng thei lo niin ka hria a. Chuvangin, an sem dan rual khai zawka tih te hi a tul lo maw aw, tih kha ka zighthbelhna a ni a.

Pahnihnaah chuan, kumin kum kal mekah hian polythene pipe lei nan sum engzat nge sawrkari-in a hman ral tih ka zawt e.

SPEAKER : Zawhbelhna zawt turin Member zahawm tak Pu Lalrinsanga Ralte ka sawm e.

PU LALRINSANGA RALTE: Pu Speaker, ka lawm e. Agriculture Department changtu kan Minister zahawm tak hnena ka zawhbelhna chu hei hi a ni e. –

Fawnlian Zau, Chemlui lei dawh that emaw, dawh tumna a awm em tih kha pakhatna a ni a. Pu Speaker, Fawnlian Zau hi a pawimawh khawp mai a, chhungkaw eng emaw zatin huan lo ram an neihna leilet hmunte a ni a. Sawkar hmasa 2018 kumtir lamah cheng nuai 50-a dawh a ni a, a dawhtu hian pawisa a la zo vek tawh a, a la dawh zo si lo a, kan buai khawp mai a. Khulaia zau neitute nen pawh kan sawi a, department lam te pawh kan sawipui a, a zagh loh hi zagh tir leh turin kan nawr a. Amaherawhchu, khawih zagh lovin tunah khuan a la awm reng a, a pawi khawp mai a. Chuvang chuan Bilkhawthlir Fawnlian Zau panna Chemlui Lei, nuai 50-a dawh, pawisa pawh lak zagh vek tawh hi dawh zagh tumna emaw, dawh that tumna kan nei em tih kha ka zaghna pakhatna ni ta se.

Pahnihnaah chuan, Bilkhawthlir Agriculture Rest House sak that emaw, chei that emaw tumna a awm em tih kha ka zawt leh duh a. Pu Speaker, hei hi 2019 atang khan ka zawt ka zawt tawh a, Mizoramah hian agriculture potential area tha pathum zinga pakhat hi chu Bilkhawthlir, Serlui Bial khu kan ni hrim hrim a. Khulaiah khuan mithiam tak tak scientist kan tih te pawh rawn kal thinin leh sawkar official department mite pawh, mahse potential area-ah khuan riahna tur a awm miah lo mai khu pawi kan ti a. Tin, Pu Speaker, tun kumah hian Central YMA khawmpui kan thleng dawn a, Bilkhawthlir-ah mikhual pawimawhte riahna pakhatmah kan nei lo a IB, kan hotute an ni emaw, a pawl hrugaitute tan pawha riahna tur awm miah lo kha a fuh lo a, sak that pawp a nih loh pawn, tlema zawng tala renovate-a, riah naw naw theihna tur talin min siam that sak thei em tih kha ka zawhbelhna a ni e.

SPEAKER : Zawhbelhna zawt turin Member zahawm tak Pu C. Lalsawivunga ka sawm e.

PU C. LALSAWIVUNGA : Pu Speaker, ka lawm e. Ka zawhbelhna chu -Kan rama kut hnathawktute'n buh leh thlai an thar leh hrall chungchang mumal taka kalpui a nih theih nan Farming Society din a ni tawh em? Kut hnathawktute'n an thlai thar man man zawka an hrall theih nan ruahmanna a awm em?

Ka zawhbelhna pahnihna - Land Leasing Act hi kan nei tawh em? Kan la nei lo anih chuan nei tur hmalakna a awm em tih kha ka zawhbelhna a ni e.

SPEAKER : A theih ang anga chhang turin Minister zahawm tak Pu C. Lalrinsanga ka sawm e.

PU C. LALRINSANGA, MINISTER: Pu Spekaer, Member zahawm tak, tuna zawhna rawn zawt hnuhnung ber zawhna atang khan han chhang ta ila.

Buh leh bal lei nan ruahmanna society angin emaw, pawl angin emaw din a awm tawh em tih kha, kan House Leader zahawm tak hian *buh leh bala intodelh* a ngai pawimawh a, hma pawh kan la nasa a, ani pawhin min tuipui a. Mechanization/privatization/large scale production tih kha min veipui dan a ni a, chumi ang dung zui chuan theihtawpin hma kan la a, tun tumah pawh hian tharchhuah hi eng emaw zat nei turah kan inngai a. A thar chhuah statistics hi kan la la khawm kim hlei thei lo a, a chhan chu ‘double crop’ ti mai ila, season hmasa kha kan han chin zawm zui leh a, March thla bawr vela seng leh tur a ni a buh hi. Chungte anih avang chuan kan la hre thei mai lo naa, kha kha kan sawi kai thui deuh hlek a ni. Engpawh ni se, buh bal lei nana pawl emaw, forum emaw han din chu kan la nei chiah lo naa, a tul anga ngaihtuahna erawh chu Agriculture Board atangin kan nei a ni tih kha ka chhanna ni se la.

Tin, thlai thar lei nan ruahmanna a awm em tih lai kha, kan hriat angin tun Covid boruakah *Vegetables supply chain* kan Chief Minister/kan House Leader thahnemngainhain Horticulture Department leh Mizofed te nen tang kawpin theihtawpin hma an la a. Chumi hlimthla thlir chuan tunah hian society movement-a market chain buaipui tur hian ruahmanna, ground works te chu society level-ah kan han kalpui a, a han kal chho zel ang a, ruahmanna fel tak kan la duang chhuak turah pawh kan ngai a ni.

Tin, Land Leasing Act hi tun tumah hian ruahmanna a Bill/Act model hi kan siam a, chu chu Law-ah kan *vet* a, tun session-ah pawh hian barh lut hman turah kan inngai a, amaherawhchu tum angin Law lamah kan kal chak hlei thei tlat lo a, kan intilut hman mai ta rih lo a, session leh hmasa berah chuan Land Leasing model hi Law-in a min *vet* sak hnuah House-in a ngaihtuah turin kan put luh theih ka in beisei a ni.

Tin, zawhna neitu Pu Lalchhuanthanga, Member zahawm tak rawn sawi kha a dik khawp mai a, pipe chungchang hi keipawh hian a mimal takin ka ngaihtuahnaah a lut nasa a. Term hmasa khan a dil peih peihte’n an lo dil thin ni tur a ni. Kan han sawrkar veleh khan mamawh em em te an lo kal teuh mai thin a. Amaherawhchu, a mamawh tak tak zawk, farmers-te hi chu an lo kal mai lo a avangin a pek loh tur hi kan lo pe nual thei ang a tih hlauhthawnna avangin MLA-te hnenah a theih ang anga sem zaiin a sem dik theih zawk ang e, tiin kan han in pe diat diat a. Pu Speaker, i veilama mite pawh kha a theih ang ang chu kan han seh bun ve che u pawh kha, tlema potential nei deuh te kha kan han thlang deuh che u a, rualkhai zawka a farmers dik taktena an chan theihna turin ruahmanna kan han nei a, helai hi chu uluk taka kan thlir a pawimawhin ka hria a. Farmers dik takte hi a leh lamah chuan rama che chawt an ni a, dil tura lo chhuak hman pawh an ni meuh lo a. Chuvang chuan kan thawktute, department-ah pawh hian, ‘heng ang mite hi zawng rawh u, hetiang ho hian an dawng tur a ni; a hman hman rawn dil ringawt hi kan pek chuan a dik lo ang’ te pawh kan ti thin a.

Tin, sum hmanralna min han zawh erawh kha chu tun maiah a chhanna ka pe mai thei lo a, hei erawh chu nakinah a tul angin kan la inpe turah ngai ta ila. Pipe chungah hian kan sawi belh duh chu, pipe hi kan hmuhna tlangpui chu PMKSY, CSS hnuiai lo kal a ni a, PMKSY hnuiai hian ‘Secondary Storage Structure’ kan ti a, tuizem cheng nuai 2 man siam theih a ni a, WHS (Water Harvesting Structure) tho sing 9 man a ni a, PMKSY hnuiai hian eng emaw zat min rawn pe thin a, chumi min rawn pek mil chuan a component-ah pipe hi a tel thin a ni. Secondary Storage leh WHS kha min pek tam leh a pipe kha a lo kal tam chu a ni mai a. Amaherawhchu, tun dinhmun ah pipe kan mamawhna te a len em avangin hei hi erawh hi chu hemi ang lo deuh hleka kalpui theih dan hmun dang atanga a *source of fund* pawh han dap a, engtin emaw kan kalpui chu a tul dawnin ka hria a. Tun dinhmunah tak chuan PMSY hnuiai hian roll 3,434 lei theihna sum central-ah thehluh a ni a, tin chu bakah chuan ‘Rainfed area Development Fund’ kan ti a, hei hi central scheme tho a ni a, roll 180 leina tur kan theh lut bawk a. Tin, NEC lamah pawh roll 1250 lei theihna tur pawh ruahmanna kan han ti kal a ni. Khatiang khan a theih theihna hmunah heng kan mamawhna te phuhru turin ruahmanna kan kalpui chho dawn a ni tih kha ka chhanna ni ta se la.

Tin, Member zahawm tak Pu Lalrinsanga Ralte rawn zawh belhna, Fawnlian Zau, kan han sawrkar phat khan a ni a, bialtu hi thahnem a ngai em em a, a bialte tan hian a luang zo hi a ni ringawt mai a. Hei hi vawi duailo ka hnenah pawh a rawn thlen a, tin, kan sum neih ang ang atanga han chhunzawm dan te, awm ta se la tih te ngaiantuahna a lian a. Tuna kan ngaihthlak tak ang khan term hmasa khan dawh tura ruahmanna kal a awm tawh a, amaherawh chu thu kal tawh kha han sawi chiam a tul ber lo a, tuna kan hmachhawp chin atang kha chuan theihtawp chhuaha hemi Senlui Lei hi a piah lamah kan farmers-te eng emaw zat an awm si a, chungho ngenna chu a zahawm kan ti a, bialtuina thahnem ngaihna nen, chutiang chuan estimate leh ruahmanna eng eng emaw chu kan nei a, amaherawhchu, kan hriat angin hripui in min nek a, min chenchilh a, chuvangin sum kan neih tum ang te kan nei mai thei ta lo a, engpawh ni sela hei hi chu kan mamawh a ni. Mamawh dan a zira kan lo en turah pawh min ngaihsak ta se la a thani ka hria a.

Tin, Bilkhawthlir Rest House chungchang pawh hi a hmunah ngei ka zuk kal tawh a, ka zuk tlawh tawh a, a awngrawp ang reng hle tawh mai tak a, a sak dan tur te leh engnge maw te pawh a hmunah pawh kan han en thuak thuak a. Amaherawh chu, sawi leh sawi hnu tho ruahmanna pawh eng emaw tha deuh turin kan han duang naa sum harsatna avangin kan ti mai thei lo a. Tun kumah YMA General Conference thleng tur te an nih avangin a ni pawhin thahnem ngaihna atangin mi a nawr nasa hle a, House Leader pawh ka lo sawipui a, amaherawhchu kan hun hi a hnawh chih tawh a, financial year tawp lampang te a ni bawk nen. Ani pawhin min ngaih pawimawhpui tho rualin a theih hram chuan sawrkar kum thar te pawh han nghah leh rih a tha ang a, te pawh kan han ti a, chumi rual chuan a renovate theih, khawmpui YMA Conference te a lo ni dawn a, chung anga eng emaw han lawi luhna ve tur tawk tal chu atih dan a awm lawm ni tih te pawh ngenna a rawn siam angin, hei chu

kan lo en ang a, sum kan neih dan a zirin ruahmanna pawh nei turin hma thlirah kan lo nei ang e, tih kha ka chhanna ni mai sela thanin ka hria a.

Tin, nichina pipe chungchangah khan ka han sawi belh duha chu, tuna zawhna neituin a rawn zawh kha, tun tum PMSY-ah khan cheng nuai 211.02 ruahmanna, nikum lama tuna zawhna a rawn siam ang khan, sum kan hman ral tawh a kha cheng nuai 211.02 a ni a, RAD-ah hian nuai 18.01 kha kan hman ral tawh a ni e tih a kha Pu Speaker, ka chhanna a ni e. Ka lawm e.

SPEAKER : Starred Question No. 167 zawt tur in Member zahawm tak Pu V.L. Zaithanzama ka sawm e.

PU VL. ZAITHANZAMA : Pu Speaker, ka lawm e. Environment, Forests & Climate Change Department changtu Minister zahawm chhanna chu hengte hi a ni e :

- Forest Department hian Staff Quarters engzatnge a neih?
- Forest Department hian Revenue Department hriatpui thlap ram enkawl hmun engzatah nge a neih? Ka lawm e.

SPEAKER : Chhang turin a changtu Minister zahawm tak Pu T.J. Lalnuntluanga kan sawm e.

PU TJ. LALNUNTLUANGA, MINISTER: Pu Speaker, Member zahawm tak Pu V.L. Zaithanzama zawhna chhanna chu: -

- Forest Department hian Staff Quarters 569 a nei a ni.
- Forest Department hian Revenue Department hriatpui thlap ram enkawl hmun 82-ah a nei a ni.

SPEAKER : Zawhbelhna zawt turin a zawhna neitu Pu V.L. Zaithanzama ka sawm e.

PU VL. ZAITHANZAMA : Pu Speaker, ka lawm e. He zawhna hi chhan neia ka rawn zawh a ni a, Forest chang pawh ni lo department tam tak an hmun lo ram te ngaihsak vak lem loh avangin harsatna an tawk fo thin a. Kan naupan laiin Pitartetlang khu Veterinary Deptt. ta emaw kan lo ti reng thin a, mahse engmah document kha an lo nei lem lo a, chutiang chu a tam mai a. Ka zawhbelhna chu hengte hi an ni e -

- Tuna Forest Department staff quarters awmna *land lease* an neihlohnate hi department hian land lease siam turin hmalak a tum em? Tuna a chhanna-ah khan neih lohna kha a tam zawk a si a.
- Dampa Tiger Reserve-ah khuan Sakei engzat nge la awm, tithe a ni e.

SPEAKER : Zawh belhna zawt turin Dr. Vanlaltanpuia, chumi zawah Dr. Vanlalthlana.

DR. VANLALTANPUIA : Pu Speaker, ka lawm e. Minister zahawm tak hnena ka zawh belhna chu -

- i) Mizoram-a National Park pahnih, Tiger Reserve (pakhat) leh Wildlife Sanctuary (pariat) te hi engtin nge sawrkar hian a enkawl thin?
- ii) Fire watchman-te hi thal lai hian lak a ni thinin ka hria a, kum tina lakna tur provision hi a awm em? A awm anih chuan kum tin lak a ni thin em?
- iii) Wetland Conservation dan hmangin Ramlaitui-a Bualsen tui leh Pau dil te, Haulawng-a Khuaisih te hi humhalh tumna a awm em, tih te a ni e.

SPEAKER : Zawh belhna zawt turin Member zahawm tak Dr. Vanlalthlana ka sawm e.

DR. VANLALTHLANA : Pu Speaker, ka lawm e. Environment, Forests & Climate Change Department changtu Minister zahawm tak chhan a tan, tlem sawi lawk a ngai a. Guwahati High Court, Aizawl Bench-in judgement Ni 27.1.2021-a siamah khan Tuirial Hydel Project compensation siam chungchangah khan thutlukna a rawn siam a, hemi chungchangah hian meeting neih niin ka hria a. Khatah khan Member tam zawkin Supreme Court-a kal kha an duh a, amaherawhchu, chunglam atangin tul lo tihna a awm avangin kal lovin hma laka buaipui mai tumna awm te khan ka hria a, hetah hian LSC rawn pung that te kha a awm a, NEEPCO lam te pawh an buai viau a, CBI pawh koh hial a ni a, ka zawhna chu - Supreme Court-ah hian kal tumna a awm em? Kal tumna awm lo ta se compensation hi eng suma tanga pek tur nge ni ang, tih kha ka zawt e.

SPEAKER : Awle, staff quarter atanga Sakei awmzat thlengin, a theih ang anga chhang turin Minister zahawm tak Pu TJ Lalnuntluanga ka sawm e.

PU TJ. LALNUNTLUANGA, MINISTER: Pu Speaker, Member zahawm tak Pu VL Zaithanzama zawhna kha, kan sawrkar hmun land lease la awmlohna hmunah land lease nei turin buaipuia hmalak mek a ni. Tin, Sakei chungchang kha, Sakei hi an vak kual an vak kual a, a chang leh thlang lamah an chhuk a Bangladesh ramri lamah te, a chang leh helama rawn fang kual pawh hi an ni ve bawk a. Sakei hi ‘Ramhnuai Lal’ an ti a, an vak kual nasa khawp mai a, an hniak te pawh la hmuh tur a awm a. Tunah tak hi chuan, ‘chuti zat a awm e’ han tih tur vak kan nei lo a ni.

Tichuan, Member zahawm tak Pu Vanlaltanpuia zawhna, National Tiger Reserve leh Wildlife Sanctuary ho hi engtia enkawl nge tih chhanna chu, CSS hnuiah hian Integrated Development of Wildlife Habitat Scheme hnuia APO te siamin fund tiam thin a ni a, chumi fund kan dil te chu a vai vaiin kan dil hmu lem lo a, an rawn approve chin central-in an rawn nei a, chumi hmang chuan enkawl thin an ni a. Kum tin hian 1st installment leh 2nd installment anga thenin sanction an rawn pe thin a, heng hi department-in a lo buaipui zui thin a ni.

Tin, zawhna pahnihna chhanna chu, heng fire watchmen-te hi kumtina rawihna provision a awm em tih chhanna chu, hengte pawh hi central sawrkar-ah pawisa dil thin a ni a, hei hi state sawrkar nen expenditure sanction leh matching share te nena kalpui ngai chi a ni a. Kuminah hian kan pawisa a tlem deuh avangin, fire watchmen kan neihna hmun pawh hi henglai Aizawl hnaivaiah te chuan kan han hmu a, pawisa awmsa atangin, mahse ama bial Khawnglung Wildlife Sanctuary leh amah Zawhna zawttu bialah kha chuan tun dinhmunah kan pawisa a tlem deuh rih avangin fire watchmen dah a ni rih lo a ni. Tin, Khuaisih, Pangdil leh Bualsen Wetland Reserve kha kan nei ve theih ang em tih zawhna kha, MLA zahzawm tak hian min rawn sawipui tawh a, hei hi department-in wetland atana tehna hrang hranga a tihdan te en hmasak phawt a ngai a, chumi a tehna hrang hranga wetland reserve leh a fund te han pe thei tur khan endik phawta chumi hnua Wetland Committee-ah te la thlen turin kan inhmachhawp mek a. Amaherawhchu hripui avang te leh thildang dang avangin tunah hian a hmunah Deptt. Officer-te pawhin an la en thei lo a ni tih kha ka chhanna a ni.

Tin, Member zahawm tak Pu Vanlalthlana zawhna chungchangah khan, ni e, thil kha a hre thui riau mai a, anni hi information an nei tha a, amaherawchu kan hriatphak loh thil te a rawn sawi niin ka hria a. Appeal chungchangah hian tunah hian ngaiantuah mek a ni a. (**SPEAKER** : *Subsidize a ni em?*) High court-in a thutlukna siam tawh a ni a (**SPEAKER**: *Subsidize a nih chuan sawi a thiang lo aw.*) High court thutlukna a ni a, chumi chu appeal tur nge tur lo tih chungchang kha tunah hian sawrkarin a ngaiantuah mek lai a ni a. Chuvang chuan a zawhna chhawng leh khami compensation chungchangah pawh kha tun dinhmunah chuan a kalpui dan tur kha decision siam fel a la nih loh avangin sawi theih a la ni lo, tih kha ka chhanna a ni e. Pu Speaker, ka lawm e.

SPEAKER : Starred Question No. 168 zawt turin Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, ka zawhna Starred Question No. 168 chu hei hi a ni -

I & PR Department hian kum 2019-2020 chhungin MJA member-te tan eng hamthatna nge siam thar a neih, tih a ni e.

SPEAKER : Chhang turin Minister changtu zahawm tak Pu Lalruatkima ka sawm e.

PU LALRUATKIMA, MINISTER: Pu Speaker, Member zahawm tak Pu C. Ngunlianchunga zawhna chhanna chu -

Kum 2019-2020 chhunga I & PR Department-in MJA member-te tana hamthatna thar a siam te chu:

1. Press Tour vawi 4 neih a ni.
2. Training Programme on Parliamentary Process and Procedures for Media Personnel at

Bureau of Parliamentary Studies and Training (BPST) at Lok Sabha, New Delhi from 25th 27th September, 2019.

3. Advertisement Rate tihsan a ni. Sawrkar-in Notification chhuah a ni a, a effective date chu 26.2.2020.
4. Ex-Gratia mi 6 hnenah pek a ni.
5. Medical Assistant mi 65 hnenah pek a ni.

Khati zawng kha ka chhanna a ni e.

SPEAKER : Zawhbelhna zawt turin Question neitu Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, zawh belhnaa ka luh hmain, zawhbelhna ban phar tur hian dan deuh in siam loh chuan a zawttuin ban a phar lai hi a buaithlak riau ka ti a, House-ah hian practise deuh nei ila. Keiniin a chhan zawa phar thin lai kha, zawh lai taka lo phar kha a awm thei a (**SPEAKER**: *Nangmahni ho tho kha a ni.*) Kan zalen lutuk mah mah em aw ka ti a ni.

Pu Speaker, ka zawhbelhna chu, Ni 21.6.2019-a MLA zahawmtak pathumte, Pu Vanlalhlana, Pu V.L. Zaithanzama leh Pu Lalrinsanga Ralte, MLA pathum ngawt maiin zawhnaa Minister zahawm takin Journalist te pension chungchang a chhanna hi sawrkarah dilna siam a ni a ti a, hei, June Ni 20, 2019 a ni tawh a, 21 pawh a kal leh ta nual a. Khami chhung khan engmah chanchin thar a la awm lo em ni, nge kan sawrkar hian Journalist-te pension pek hi kan remti lo? khalai kha chhanna eng emaw tal a awm tawh em tih ka zawt a ni e.

SPEAKER : Zawhbelhna zawt turin Member zahawm tak Pu C. Lalsawivunga ka sawm e.

PU C. LALSAWIVUNGA : Pu Speaker, ka lawm e. Accredited journalist-te hi ID Card pek vek an ni a, mahse an card neih hi a hlu teh chiam lo niin a lang a. A chhan chu sawrkar programme pawimawah leh function pawimawah hian a hrarpa a dilna an siam loh chuan an lut mai thei lova. Tun kan Assembly angah te pawh hian dilna an siam loh chuan an lut thei hlek lo mai a, chuvang chuan accredited journalist an nihna ang ngei hian a hrarpa heng sawrkar thil pawimawah hian luh phalna dilna kha siam kher lova, an ID Card kha hmang tangkai tur hian kan Minister hian hma min laksak thei ang em, tih kha ka zawhbelhna a ni e.

SPEAKER : Aw le, chhang turin Minister zahawm tak Pu Lalruatkima kan sawm e.

PU LALRUATKIMA, MINISTER: Pu Speaker, ka lawm e. Pu Ngunlanchunga zawhna, Assembly hmasa June 21, 2019-a zawhnnaa Journalist-te hmhatatna tur pension scheme hi buatsaih mek a ni a, ‘enge a thlen chin, ava rei em em ve’ a ti a. Ni e, a rei khawp mai a, Journalist-te hian MJA a din tirh atang hian an la nei ngai lova, an la hlawchham zel a. Chuvang chuan nei ngei tur khan kan sawrkar chhung khan kan han ti a, mahse kan sawrkar chhung hi a la rei si lova, a karah Covid a lo tla bawk si a. Chumi tur chuan Committee kan han din a, chu Committee-ah chuan Law Department leh Finance Department te an tel a, ruahmannan rawn siam a, study team sub-committee te kan han ti leh a. Tichuan anmahni te nen pawh sawi ho zelin, October, 2020 khan I & PR te buatsaihin MJA te nen hemi chungchang hi kan sawiho a. He meetingah hian department pahnihte pawh hi an tel a, an ngaihdan hrang hrangte, kan rawtna te kan thlir ho a. Kan sum dinhmunte enin rawtna pawh MJA lamin siamthat ngai te pawh rawn ti ula tiin thu kan dah a. Keini hmalakna hi chu a la rei lo hle a, mahse tihhlawhtlin tumin sawrkarin hma a la mek a ni tih kha ka chhanna ni sela.

Tin, zawhna 180-naah khan Member zahawm tak Pu C. Lalsawivunga khan a rawn zawt tawh bawk a. Mizoram Journalist Pension Scheme hi sawrkar chuan siam ngei a tum a, tunah hian sawrkarah proposal kal pui mek a ni tih kha ka chhanna ni sela.

Tin, Member zahawm tak Pu C. Lalsawivunga zawhna, Accredited Journalist-te tan hian sawrkar function pawimawhah hian a hrampaa card issue kher lo hianin, an card hi a rin theih mai lawm ni tih a rawn zawh kha, Assembly a thutna hi Pu Speaker, i thuneihna a ni a, keini lo sawi theih chiah pawh kha niin a lang lova. Assembly Secretariat mawhphurhna anih avangin sawi theih kha ka nei tlem khawp mai a. Kan duhthusamah chuan Pu Speaker, he House kal tlang hian ka han dil sak nghal ni mai sela, remchangah min lo ngaihtuah sak dawn nia. Covid avangin eng eng emaw harsatna kan han tawk a, Rajya Sabha election kan han neih pawh khan Journalist leh midangte pawh phal chin kan lo nei lo thei lova, Chanchinbu mite pawh mipuitling tak tak vek an ni a, khalaiah kha chhuanin kan sawi tlang zel ang a, thuneitute nen theih tawp chhuah zel turin kan han puang a ni tih kha ka chhan theih tawk chu ni mai sela a tha ang e.

SPEAKER : Starred Question No. 169 zawt turin Member zahawm tak Pu Andrew H. Thangliana ka sawm e.

PU ANDREW H. THANGLIANA: Pu Speaker, ka lawm e. Minister zahawm takin min chhan atan –

Lumpsum (Grants-in-Aid) dawng, purely Private School-a thawkte-ah Village Council Secretary appointment pek awm ta sela, ‘dual post’ tiin *show cause notice* pek theihna dan a awm em, tih kha a ni e.

SPEAKER : A chhang turin a changtu Minister zahawm tak Pu Lalchhandama Ralte i lo sawm ang.

PU LALCHHANDAMA RALTE, MINISTER: Pu Speaker, Member zahawm tak Pu Andrew H. Thangliana zawhna chhan chu –

Lumpsum (Grant-in-Aid) dawng, purely Private School-a thawkte appointment pekah sawrkar a in rawlh lo. Hetiang School-ah hian hna (post) siam a ni lo bawk a, chuvangin “dual post” tih theih a ni lo.

SPEAKER : Zawhbelhna zawt turin Pu Andrew H. Thangliana i lo sawm ang.

PU ANDREW H. THANGLIANA: Pu Speaker, tlem han sawi hmasak lawk ka duh a. Show Cause Notice dawn hrim hrim hi a na a, kan Minister khan, ‘sawrkar a inrawlh miah lo’ a ti a, amaherawhchu, hetih lai hian ka bial chhungah *incident* kan nei hlauh mai a, Kolasib DEO Office atangin show cause notice, purely Private School pakhat headmaster chuan dawngin, document phawrh tur te pawh a a awm vek a, “VC Secretary i nihna emaw headmaster i nihna emaw-ah hi i duh thlang rawh” tih show cause notice a dawng a, hei hian Managing Board te pawh a tibuai hle mai a. Dan rawn behchhanah chuan Central Service Rules dan bawhchhiaa puh a ni a, kan han chhui chian chuan hekna a lo awm vang a ni. Headmaster hi ‘a inhnahnawih nasa lutuk’ tia puhna a ni a. Ka lo hriat ve chinah chuan Consolidated fund of India atanga hlawh pek niloah hi chuan government servant anga ngaih an niloin ka hria a. Tin, School Managing Board hi Autonomy a ni a, khawtlangin an *run* ve liau liau a ni a, kum khata nuai khat bawr vel dawng pha school an ni a, provincialized pawh nilo chunga ‘dual post’ anga inpuhna hi sawrkar hian a nei chhunzawm leh palh ang tih ka hlau a, a nei ang em, tih kha ka zawh duh ber chu a ni e.

SPEAKER : Zawhbelhna zawt turin Member zahawm tak Dr. Vanlalthlana i lo sawm ang.

DR. VANLALTHLANA : Pu Speaker, ka lawm e. Ka zawhna, School Education Minister zahawm tak chhan atan -

- i) Kum 2019-20, 2020-2021 chhunga PMJVVK scheme School Education concept note emaw DPR emaw thehluh kha tute buatsaih nge?
- ii) Rationalization of teacher atan Transfer & Posting of Teachers Rules, 2020 hi engtik atanga hman tan tur nge? Kum 2019-2020, 2020-2021 chhunga notified town leh Aizawl pawnna zirtirtute luah tur quarters sak zawh tawh engzat nge?
- iii) Kum 2010 hnu lamah hian khawpuia cheng chhungkua tam takin an fate private school-a dah an duh zawkna chhan hi zir chianna neih a ni tawh em, tih kha a ni a.

Tlemin ka han sawi lawk ang a, sawrkar sikulah hian engnge an luhloch chhan hi department hian a zawng tur niin ka hria a, chu chu ka rawn zawt a ni e.

SPEAKER : A chhang turin Minister zahawm tak Pu Lalchhandama Ralte i lo sawm ang.

PU LALCHHANDAMA RALTE, MINISTER: Pu Speaker, Pu Anderw zawhna kha amah khan a sawifiah tho nghal a, kha laiah khan en zui ngai a awm emaw, a kal zel turah kan kal phung han hriat tawk lohna te pawh a awm a ni thei a. Private hi chu management hrang a ni tih kan inhriattir nawnnaah te pawh ngai mai ila a thain ka hria a.

Tin, Member zahawm tak Dr. Vanlalthlana zawhna, PMJVVK Education concept note leh DPR te kha tu buatsaih nge tih kha, khami bika kha a hnufual laite chawikanna tur a ni a, ADC lam District Council-te enkawltu, District Council and Minority Affairs Department siam a ni tih kha ka chhanna ni se.

SPEAKER : Zawhna leh Chhanna hun a tawp a, kan chhan zawh tir mai dawn em? Awle, chhang zo rawh le.

PU LALCHHANDAMA, MINISTER: A pahnihna, Rationalisation of Teachers atan Transfer and Posting of Teachers Rules, 2020 chungchang kha, kan hriat tlan angin Mizoram gazette a chhuah notify kha Ni 14.2.2020 a ni a, khata tanga hman tan tur a ni.

A dawt leha zawhna, kum 2019-2020 leh 2020-2021 chhunga notified town leh Aizawl pawnna zirtirtute luah tur quarters sak zawh tawh zat kha, hemi kum chhung hian Teachers quarters 28 sak zawh tawh a ni. Zawhna hnuhnung ber, kum 2010 hnu lamah hian khawpuia cheng chhungkua tam takin an fate private school-a dah an duh zawkna chhan hi zirchianna neih tawh a ni em tih hi, ‘nilo’ tiin kan ziakah chuan kan chhang a. Keini chuan kawng hrang hrangin mipuite hnenah pawh hriattirna te chhuah a ni a, helai bikah hian kan zirtirtute pawh tang tura inhriattirna te chhunglamah zawk hian kan nei a. Tun kum chhoah bik chuan MNF Ministry-in kan Chief Minister ruahmannaa zirtirtu 800 chuan kan lak hnuah hian private school aiin sawrkar school-ah punna nasa takin a kal tawh a, a rah tha kan hmu chho mek a ni tih kha ka sawi belh a ni e.

SPEAKER : Zawhna leh Chhanna hun a tawp a. Statement by Minister, Pu TJ Lalnuntluanga, Environment, Forests & Climate Change Department changtu zahawm tak hnen atangin kan Dan 60-na ang thlapin lehkha a rawn thehlut a, Ngaizawl khua, Khawzawl District ramkang avanga vanduaina tawka thite chungchang a ni. Tunah Minister zahawm tak statement pe turin i lo sawm ang.

PU TJ. LALNUNTLUANGA, MINISTER: Pu Speaker, ka lawm e. Tun kan Session chhungin vanduaina tum hnih tlenna a lo ni ta reng mai a. House zahawm taka han hriattir kha a tha ve bawk si a, hun tha tak min pek avangin a hmasain lawmthu ka sawi a ni.

Ni 10.3.2021 (Nilaini) zan dar 9 vel khan Khawzawl District chhunga Ngaizawl khua chuan hnuaih huan hal avangin thunun loh kangmei a chhuak hlauh mai a, Ngaizawl VC te thelh turin an tlangau nghal a. Ram kang thelh tur hian mipui an chhuak khawm nghal

a. Heta ram kang thelh tura che chhuak zingah hian Pu Khupsiansang, kum 39, S/o Tualzachin pawh a tel ve a ni. Pu Khupsiansang hian ram kang a thelh laiin vanduai thlak takin a kang thelhna hmun chuan hnuai lengkirah a tla palh hlauh mai a, kangthelh tute'n a tla tih an hriat velah a tlakna hmun atangin an zawn chhuak nghal a. A lu-ah hliam na tak a lo tuar a ni. Champhai damdawiin panpui nghal a ni a. Ni 11.3.2021 zing dar 1:30 velah Champhai District Hospital an thlen pui a, theihtawp chhuaha doctor ten a nunna chhan tuma an bawisawm hnu-ah zinglam dar 2 khan an hlawhtling zo ta lo a ni. Hetia vanduainna a lo thlen velah hian Champhai North bialtu zahawm tak Pu Dr. ZR Thiamsanga'n thil awmdan a zawl kual nghal a. Chhiatna thleng pawi atih thu leh sawrkar atanga puih a duh thute a thlen nghal a. Bialtu MLA zahawm tak hian vanduainna tawk chhungte hnenah cheng 10,000 a pe nghal bawk a ni. Pu Khupsiansang hi Ni 11.3.2021(Ningani) chawhnu dar 1 khan vui a ni. Amah hi Presbyterian Kohhran niin, Ngaizawl khaw hlun a ni a, fate 5 a kalsan a ni. Amah vuina hunah hian DFO Khawzawl, RO Khawzawl, RO Kawlkulh leh staff dangte telin thla te an lakpui bakah a ralna cheng 10,000 an pe nghal bawk a. Tin, he vanduaina avang hian Pu Khupsiansang chhungte hnenah zangnadawmna pek theih dan tur Mizoram State Fire Prevention Committee-in a ngaithuah dawn bawk a ni. Ka lawm e.

SPEAKER : Awle, Private Members Business ah kan kal ang a. Kan Dan 17(1) angin vawiin hi Private Members Business kan lak ni a lo ni leh ta a. Vawiin Ni 12.3.2021 ami tur hi Ni 3.3.2021 khan ballot a ni a, Commissioner & Seretary office-ah. Bulletin Part-2, No.166-na kan rawn pek tawh che u kha. Resolution No.1-ah kan kal ang a, 19 lai mai pawhchhuah a ni a, No.1 chu, "*Covid-19 hripui leng do kawnga sawrkar, kohhran, tlawmgai pawl leh Mizoram mipuite tanrualna avanga India rama a ti tha ber state zinga Mizoram kan tel hi a lawmawm kan ti a. He hripui dona kawngah nasa lehzuala tan ho chhunzawm zel a tha kan ti*" tih a ni a. A resolution neitu chu Member zahawm tak Pu H. Biakzaua a ni a. Tunah move turin ka sawm e.

PU H. BIAKZAU : Pu Speaker, ka Resolution move tura min sawm avangin ka lawm e. Ka Resolution chu, "*Covid-19 hripui leng do kawnga sawrkar, kohhran, tlawmgai pawl leh Zoram mipuite tanrualna avanga India rama a ti tha ber state zinga mizoram kan tel hi a lawmawm kan ti a, he hripui dona kawngah nasa leh zual a tan ho chhunzawm zel a tha kan ti*" tih a ni a. Pu Speaker, kan hriat angin, kum 2019 kumtawp dawn December thla khan China ram khaw pakhat 'Wuhan' an tihah chuan hri hlauhawm tak mai *Corona virus* a leng a, chu chu a hming lam tawiin 'Covid-19' tih a kan hriat lar tak hi a ni a. Chu hri chu a lo darh zel a, khawvel a lo huap ta a, global pandemic a thleng anih kha. Keini Mizoram pawh chumi avang chuan tukina resolution ka move-naa ka sawi duh chu, nunna chan, he hrileng thihpui mi engemaw zat kan awm a, hri avanga thi leh he hrileng kan dona kawnga duty-na hmuna thi enggemaw zat kan awm bawk a, a vanduai thlak hlein ka hria a, an duty-na hmuna thite phei hi chu anmahni nunna thapin mahni inpe ralin midangte him nan, 'martar' tih tur hial khawp niin ka hria a. Chutiang chhungkuate chu tukinah hian kan tuarpui a ni tih pawh resolution ka move tannaah hian ka sawi hmasa duh a ni.

He hripui hi a darh zel a, a thawm a lo lian zel a, mipui kan ralkhel nasa hle mai a. Engtia in ven tur nge tih pawh hriatthiam a harsa khawp mai a. Sawrkar thuchhuah leh Health Minister zahawm takin mipuite hnena thuchah an sawi thinte kan lo ngaithla a. ‘Sawrkarin eng ti takin hma la ang maw’ tia ngaiantuahna kan sen leh kan thlir reng thin kha a ni a. Chutiang anih laiin Mizoram sawrkar chu India ramah he hri laka inveng tura che chhuak hmasa berte zinga mi a ni hial zawk a. January Ni 19, 2020 khan Integrated Disease Surveillance Programme (IDSP), Delhi atangin 2019 Novel Corona Virus Advisory dawn a ni a. January Ni 20, 2020 atang khan China atanga lo hawte monitor-na tur central IDSP-in format a siam hmangin *Daily Report* pek tan a ni a. Kan fimkhur hma angreng khawp mai a. Ram kilkhawr leh te tak kan ni chungin kan hruaitute leh kan Health Minister te an bengvar em em a, tan an la nasa em em a. India rama hripui venna kawngah hma la hmasa pawl kan han ni thei ta hial a, a lawmawm hlein ka hria.

COVID-19 lo chhuahna ram, China hi kan hriat angin Myanmar ram chhak maia awm niin an inri a. Keini hi Myanmar ram ria awm kan ni leh bawk si a, Myanmar nen hian km 510 laia thuia inri kan nih avangin, he hri hian Mizoram chhung a rawn thleng thuai mai ang tih ngaiantuahna a lian em em a. Chuvangin, that muan mai chi a ni lo tih hriain, January Ni 30, 2020 khan Health Minister leh a kaihhruaite nen thutkhawmna neih a ni a. Chief Secretary Chairman-na hnuaiyah *State Level Task Force on Covid-19* chu he ni hian din nghal a ni. Lengpui Airport-ah Covid-19 hoarding tar nghal a ni a. Kan Chief Minister hoin kan ram hruaitute leh Health Department lam chet ran avang hian awmze thui tak a neih phah ta a. Hma kan la hmain tan kan la chak em em a, India ramah *lockdown* kalpui hmasa ber state niin, *National lockdown* puan anih hma March Ni 22, 2020 (Pathianni) khan Mizoram sawrkarin lockdown a puang nghal a. March Ni 29, 2020 thleng khan a puang nghal a ni. National lockdown kha March Ni 25, 2020 – April Ni 14, 2020 chhung khan an rawn puang chhunzawm ve ta anih kha. India ramah *airport screening* ti hmasa ber kan ni bawk a, February Ni 6, 2020 khan Lengpui airport-a passenger lo haw te screening kan kalpui tan a ni. Hetih lai hian India rama international airport pathumah chiah screening hi kalpui a la ni a. India rama domestic airport zingah phei chuan screening kalpui hmasa ber state kan ni.

February Ni 4, 2020 khan Zokhawthar lama ramri lo kante screening tih nghal a ni a, a hnu reilo teah ramri luhka zawng zawng khar nghal vek niin screening point pawh dah nghal a ni bawk a. Zokhawthar-a screening point kan dah tan lai hian India ram border dangah screening point siam anih hriat a la nilo a ni. February Ni 9, 2020 khan Kawrpuijhua leh Missionary kai, Tlabung-ah screening kalpui tan a ni a, February Ni 11, 2020 khan Vairengte leh Bairabi-ah screening neih tan a ni bawk a. February Ni 19, 2020 khan Kanhmun-ah screening neih tan a ni bawk a. Kan inpuahchahna a that avangin February, 2020 chhung khan Mizoram-ah Covid-19 case hmuhchhuah a ni lo va. Sawrkarin ruahmanna fel tak neiin, healthcare professionals te leh healthcare workers te training tha tak pein hma a la a. NGO, khawtlang hruaitute, kohhran leh mi thiam bikte nen vawi tam tak inhmuhkhawmna neiin ngaiantuahna an seng nasa em em a ni.

Heng hmalaknate hian rah duhawm tak a chhuah kan ti thei awm e. District tina District Level leh Village Level Task Force kan din thuai mai te khan hmalakna kawngah nasa takin awlsamna min siamsak a, heng Task Force-te hian mipuite zirtirna kawngah te, border screening chungchangah te, quarantine leh isolation centre bakah mihring quarantine ngaite buaipui kawngah te leh thil dang dangah tha takin a thawk a ni. Kan hriat theih angin March Ni 25, 2020 khan Mizoram-ah Covid-19 case hmasa ber kan nei a, Netherlands atanga lo haw niin, amah hi a fimkhur thiam a, midang tumah a kai chhawng lo a nih kha. Tin, PPE, mask te leh Covid-19 dona kawnga kan mamawh chi hrang hrang lak khawmna chungchangah India rama state hrang hrangte chang hmasa nih duhna a lian em em a, PPE leh mask te hi India ramah indaihlohma a nasa em em a. Kan hruduit lamin hma lak dan tur ngaihtuahna thui tak an neih laiin kan Chief Minister zahawm tak Pu Zoramthanga hian hma lain Union Home Minister, Pu Amit Shah a zuk bia a nih kha. A hmalaknain rah tha a chhuah a. PPE leh mask kan mamawh ang te kan chang thei ta hlauh a. Remchang ngaihtuahin, ram chhunga airport-te an khar vek laiin March Ni 27, 2020 khan Air India special flight charter-in Lengpui Airport-ah bunguate hi a lo thleng a. Mizoram chu India hmarchhak state zinga PPE leh mask te thlawhtheihna hmanga lalut hmasa ber leh a che rang ber kan ni hial a ni.

Hemi kawngah hian kan Chief Minister a fakawm em emin ka hria a. Health Minister leh thawktute remhriatnate chawpchilh tak chung pawhin a takin a lo lang thei a, a lawmawm takzet a ni. Covid-19 hripui leng do kawnga kan hmingthatna hi sawrkar, tlawmngai pawl leh Mizoram mipuite tanruualna a that avang a ni tih hi kan hmalak danah a lang chiang hle a. State Level Task Force hnuaiah sawrkar department hrang hrangte an tangruual a, Task Group chi hrang hrang 11 lai din a ni a, an chanpual leh mawphphurhna tha taka an hlen chhuak te kha a ropui hle a ni. District, Local leh Village Level Task Force te hnathawh a ropui zia kan hre vek a. Mizoram pumah Local Level Task Force leh Village Level Task Force 754 vel lai din a ni a. Heng khua leh veng hrang hrangte hian sum phut miah lovin Mizo tlawmngaihna leh ram leh hnam hmangaihna avanga tlaivarin duty-a hun hmang tam tak an awm a.

Mizo nih a nuamin a thlamuan thlak em em a, kan thawhhona leh kan tanhona te, tumah inngaihvenlo biklo leh ithliar bik pawh awmloin, pawl pawl emaw group emaw pawh awmloin kan vaiin Corona virus kan bei a. Kan lungrualna hi hetiang ang hian thildangah pawh awm thei se a duhawm hlein ka ring. Sawrkarin ngun takin a ngaihtuah a, sawrkar ngaihtuahna leh duhdan ringawt pawh hi a fel ber vek lo ang tih te ngaihtuahin Kohhran leh tlawmngai pawlte, khawtlang hruduit leh medical lama mithiam bikte rawn nachang a hria a, a rawn thlap zel a, chutiang chuan hmalakna a tisawt hlein a hriat a ni.

March Ni 16, 2020 atangin Zirna-in zawng zawng khar a ni a, mipui punkhawm khap a ni bawk a. Chutiang bawkin sawrkar thu ngaichangin sakhaw biakna hmun pawh March, 2020 chawlhkar thumna atangin khar a ni a. Kum khat dawn khar anih hnuin Zirna-in pawh January thla tawp atangin a tah tawla hawn leh tan a ni a, sakhaw biakna hmun

pawh February atanga hawn leh tan a ni. Hemi inkara Zoram mipute thuawihna leh dawhtheihna kan hmuh hian a ropui kan ti takzet a. Kan zavaivin ‘dam leh tlang khatah, thih leh ruam khatah’ tia thukhat vuana ke kan pen hona rah tunah hian kan seng mek zel niin a lang a ni.

Covid-19 hripui a len tan tirh hian Mizoram-ah swap sample test-na khawl kan nei lo a, Guwahati leh Silchar lamah sample hi thawn zel a ni a. Sawrkarin chak taka hma lain Silchar Medical College-ah Doctor-te leh Lab Technician-te tirin sample test dan leh pawimawh dangte training an zuk nei a. Hetihrual hian Covid-19 testing laboratory rang taka neih theih dan kawng a dap zung zung a. ZMC-ah RTP-CR khawl bunna tur siam in April Ni 6, 2020 atang khan RTP-CR khawl hmangin sample kan test tan ta a ni. District dangah pawh Covid-19 test anih theih nan hma chak takin lak nghan a ni a. June Ni 12, 2020-ah Lunglei District Hospital-ah TrueNat hmangin sample test tan a ni a, TrueNat khawl Dsitrict tina dah turin theihtawp chhuah a ni bawk a. Kan Chief Minister zahawm tak Pu Zoramthanga thahnemngaihna kaltlangin September thla ral hmain District tinah TrueNat khawl bun hman vek a ni a. RAgT hmanga sample test hi July Ni 20, 2020 khan Lengpui Airport-ah tih tan a ni a. July Ni 23, 2020 khan Vairengte-ah tih tan leh niin, a hnu reiloteah Border Screening Point zawng zawngah kalpui tan a ni bawk. October Ni 28, 2020 atang khan private hospital-ah te pawh RAgT sample test phalsak a ni a, December thla laihawl atangin Bawngkawn leh Chawlmun-ah awlsam zawka mipui ten an pan theihna turin *stall* siam a ni nghe nghe a. Sawrkarin Covid-19 dona kawng a mumal leh awmze nei zawka hmalak anih theih nan a bika thawktu tur Medical Operational Team chu Dr. Z.R. Thiamsanga, MLA, Chairman-na hnuai ah March Nii 20 khan a din a. He team-ah hian sawrkar leh private doctor thiam tak takte telin an ni hian Mizoram dung leh vang, hmun kilkhawr ber ber thlengin an tlawh chhuak a. Mipui leh Task Force-te harsatna tawh zir chiangin leh Mizoram himna tur atan tih hmasak ngaite an zirchiang a. An thawhrimna leh an inpekna kan chhawr tangkai em em a ni.

Tin, TV kaltlanga thuchah leh talk show vawi tam tak an buatsaih kha a ropui takzet a, I & PR Department-in emergency leh hmanhmawh thilah mipuite hriattur an puangzar zung zung a. media leh thil dang hmangin, I & PR Department an tangkai em em a ni tih kha kan la theihnghilh loh ka ring a. A hun taka mipuite zirtirna kawngah leh information pekchhuah kawngah NASA takin min tanpui a ni. Ka bulah Dr. Z.R. Thiamsanga a awm a, ani hi Operational Team-ah Chairman a ni a, kan Chief Minister, Health Minister leh Home Minister leh mi dang dang pawh theihtawpa tan an lakna piah lamah ti ila, ani hi a meizang hlaptu, mi pawimawh berte zinga mi niin ka hria a. Amah medical doctor a lo ni bawk a, heng chungchangah experience tam tak lo neiin min finchhuah a. A ni hi a zam pawh a tha a, vawiinah pawh a hming hi a mala han mention ka duhna lai a awm nghe nghe a ni. Hmanhmawh ngai leh thiltih tulah pawh Member dangte’n kan va rawn a, damdawi tul, thil pawimawh leh sanitizer, gloves leh mask chungchangeh pawh a niin min kawhhmuh zung zung a, lawmawm ka ti a. Ani hian hmanhmawh deuhin thil a han ti zung zung a, kan tangkai pui em em a.

Tumkhat lai phei kha chu Corona Virus kan tih thin kha ‘Covid-19’ tiin an han thlak leh a, a rawn leng a, a rawn darh zual sung sung mai a, kan phu nasa a kan hlauthawng a. Tunah phei chuan ‘Covid-19 aiin community spread a hlauhawm tawh zawk em ni’ an ti deuhthaw hial khan a lang nghe nghe a. Chutiang chuan tan an la a. Community spread a awm palh ang tih hlauin kan inveng nasa thin a nih kha, khalai hunah pawh. Tin, ICT Department pawhin April 3, 2020 atang khan m-Covid mobile application an rawn tlangzarch a, he mobile application hi a tangkai zia chu sawi ngai loin kan hre theuh awm e. A bik takin Mizoram lo lut tur leh zinchhuak turte tan a tangkai zual em em a ni. Hetih rual hian Mizo thalai thiamna sang tak tak nei, sawrkar hna thawk loa mahni firm dina awm te pawh an rawn pen chhuak a, *curfew pass dilna* leh *Sulhnu App*-te bakah thildang tangkai tak tak a thlawna mipuite hmantur an rawn chhawpchhuak kha a ropuiin kan tanrual zia a tilang chiang em em a ni.

Kan hriat theuh angin kum kal ta chhung khan vawi engemaw zat kan in lockdown a. Sawrkar laipuiin ‘Unlock’ a puan tantirh lai pawh khan kan ram dinhmun a zirin kan la in lockdown a nih kha. Khatih hunlai boruak rit lutuk kha a ngaihawm loh hle mai a. Chutih rual erawh chuan Zonun ze mawi, kan ze mawi a rawn parvul thar leh thin a, zofate kan inpumkhatna leh kan thawhhona kan ti tha lehzual thin a. Sawrkarin vegetable supply chain te siamin veng tin leh khaw tinah Task Force-te ruahmannain thingtlang lam atanga loneitute thar chhuah thlai leh eitur awmte rualkhai takin kan inse a. Tumah duham bik loin, “sem sem dam dam, ei bil thi thi” tih kha a takin kan nunpui a ni. Chutih rualin thingtlang lam atangan Aizawl district-a veng thenkhat te ei atan man phut miah loa thlai thar chi hrang hrang a thlawna an rawn pe te kha a ropui ka ti a ni. Kha te kha mi tupawhin a hlu kan tiin kan lawm theuh ka ring a ni. Khawpuiah thlai a awm lova, thingtlang lamin an rawn zuar thei bawk silo a, mahse a thlawnin khawpui lama mite ei atan thlai hnah leh chawhmeh dang an rawn pe a, a man pek tum pawhin an duh lova, chumi, khami veng tan a thlawnin kan rawn phur e an ti a, kan inhmangaihna leh kan inlainatna, Mizo society thatzia te a ropui em em a. Kan kristianna nen a inmil zia pawh hi Covid-19 hrileng kan do lai hian a lang chiang hlein ka hria a ni.

Kan sawi hmaih hauhloh tur chu Local Level Task Force leh Village Level Task Force duty-te zingah hian VC te, Local Council hravuitute, mahni awmna hmun theuha NGO hrang hrangte, Association ding tawh phawt leh Federation ang te pawh, pawl ding tawh phawt chuan Covid-19 dona kawngah hian sawrkar hmalaknate an thlawp tha em em a, Upa Pawl te, Hmeichhe pawl hrang hrang tepawh a ni, kan vaiin kan tangrual vek a ni. Sawrkar hnathawk zingah a bik takin zirtirtute phei chu ral hmatawng tak takah an awm a, thawhhona rah tha duhawm tam tak a lang thei a, an tlawmngaihna te leh sum leh pai sengin, phut leh beisei nei miah lovin volunteer-a inpe te engemaw zat an awm bawk a. Kan volunteer te kha 870 vel lai niin ka hria a, an inpekna a zahawm em mai tiin sawrkarin lawman tepawh tlema zawng chu a siam nghe niin ka hria a. Covid-19 dova hmalaknaah mi zawng zawng kan tel emaw tih mai tur a ni.

PPE leh Mask te pawh puanhui thiam ten an thui a, Dawrpui Veng-a pitar pakhat kum 94 miin a pasal pension pawisa a khawlin puan a lei a, a mamawhte tan mask a thui tih te kan hria a, a ropui ka ti em em a ni. Khatiang khan naupang leh puitling tepawhin tangrual takin sawrkar hmalakna thlawpin theihtawp kan chhuah tak meuh meuh a nih kha.

Tin, Chief Minister Relief Fund-a cheng vaibelchhe eng emaw zat kan thawh te hi a ropui takzet a. Sawrkar hnathawk pawl hrang hrangte leh zirtirtu pawl hrang hrang ten ambulance leh thil dang dang tangkai tak tak an donate te kha a ropui khawp mai. Phai lama zirlaite leh hnathawkte bakah damlo inenkawl thi an awmin ruang rawn hawn kawngah te harsatna tam tak a awm tih kan hria a. Chutih karah kan mizo thalai ten mithi ruang kilometer sang tam fe an rawn thutchilh a, Zoram an rawn luhin an paltlang khawtinah Mizo tih atana mawi takin kan lo dawngsawng a. Mizoram mipuiin kan lainatna leh kan ngaihvenna te kha kan inh mangaihna leh unauna lantirtu a ni. Harsatna karah eng mawi tak alang a, beiseina leh rinna nung min neih tir tu a ni.

Tangkhang haw runpui hun a lo thleng a, Rel leh by-road in Bairabi leh Vairengte an rawn lut nguah nguah a, Bairabi leh Vairengte ah sawrkar hnathawkte bakah khawtlang mi tlawmngaite chhunzan zawmin an duty a, a lo haw ten hri an lo vei ru reng em tih pawh hriat a ni lova; eng hunah nge an lo thlen dawn tih lah a hriat chian theih lohva, zan tlaik takah te an lo thleng a ni. Hetih karah Mizo tlawmngaihna leh kan inchhawmdawl na chanchin ngaihnawm tak tak khan kan hmel a ti tha hle ani.

Covid-19 avangin sawrkarin khapna leh SOP vawi tam tak a tichhuak a, mipui ten phunnawi hauh lovin kan zawm thap thap a. Ka hriatsualloh chuan Ministry of Health & Family Welfare khan positive 5,000 chuang awm turah min ngai a, January-ah chuan 6,000 kan pelh tur thu an sawi kha a ni a. Tawngtai mite nasa takin an tawngtai a, sorkarin theihtawp a chhuah bawk a, kohhran leh NGO nen, a mimirin hma kan la anih kha. Pathian zarah tun hun thleng hian covid-19 case kan neih hi 4,500 ala tlinglo a ni.

Sawi tawh angin Zoram chhunga cheng zawng zawngte kan tanrualna a that avangin India ramah pawh Covid-19 tuar nep ber state kan ni a, a dona kawngah pawh hmala tha pawl kan niin ka hria a, vaccine pek chungchangah pawh hma la tha ber pawl kan ni. Tunah hian Healthcare worker-te leh Frontline worker-te pek zawk tawh niin, kum 60 chunglam leh natna benvawn neite pek mek anni bawk a. State dangte ngaihtuaha Mizoram in vanneihna riau kan neih chu ziak leh chhiar thiam kan tam te, thingtlang khaw kilkhawr ber thleng pawhin smart phone hmang kan tam em em a, mipui mimir zingah zau takin covid-19 inkai darh dan leh nihphung te kan inhrilhfiah thei a. State lian zawk ziak leh chhiar pawh thiam lo, TV news puan leh chanchinbu pawh chhiar theilo, smart phone pawh hmu phalo mi sang tam tak awmna hmunah chuan he hripui leng chungchang inhrilh darh leh inhrilhfiah hautak dan tur chu kan hrethiam mai ang a. Mizoram mipui chuan social media, chanchinbu leh TV news kaltlangin chak takin kan inhrilhfiah zung zung thei a, khawtlangah

information mike-in kan puang a, reiloteah mipuiin kan hre darh zung zung a, inven dan tur leh fimkhur dan tur te kan hriathiam phah thin a ni.

Kan Chief Minister zahawm tak Pu Zoramthanga hi a fakawm takzeten ka hria a, Covid-19 dona kawngah mamawh a awm chuan harsatna awm lovin hma ala thuai thuai zel a, *Pa chan chang takin min khaikhawm a*, a remhriatna leh a thurawn ten awmzia a neih zia chu tuna kan dinhmun hian a tarlang awm e. Sum leh pai hman angaihna apiangah harsat deuh lai pawhin sum a sanction zung zung a, biak ngai leh amah kaltlanga thiltih ngai reng rengah pending emaw harsatna emaw a siam ngai lova, a hnuaia mite tan hnathawh a nuam em em a, chutiang chuan he hrileng dona kawngah kan Chief Minister hi a zahawmin a fakawm em em a ni.

Tin, kan Health Minister zahawm tak leh a thawhpuite zawng zawng hi an fakawm hlein ka hria a, a bik takin kan Health Minister zahawm tak hi hetiang hun kan tawh lai taka kan Health Minister a ni leh kan Chief Minister zahawm tak pawhin Health Minister atana alo dah hi a lawmawm hle pawhin ka hria a. Mi huikhawm a thiamin rorel dan leh ruahmanna siam dan te a thiam em em mai a. Mumbai-a Cancer inenkawl mek zinga positive hmuhchhuah anih tuma a hmalak dan te kha a ropui ka ti a, a tul angin state dang minister-te pawh phone-in a zuk be pawp reng thin a, Maharashtra Health Minister leh an sawrkar hotu liante bia in, Mizoram House kha Maharashtra sawrkar pawhin a rawn ngaih pawimawh phah em em anih kha. India ramah Covid vanga tuar nasa ber leh buai ber state pawhin Mizoram min ngaih pawimawh phah a, a ropui tak zet a ni. Covid chungchanga thuthlukna pawimawh siam anih dawn reng reng a Kohhran hruitute leh NGO te bakah Health expert-te rawn nachang a hre thin khan Mizoram mipui te kan thawhhona a ti tha hlein ka hria a, a remhriatna leh a thahnem ngaihna rah kan seng a ni.

Hetih rual hian he House zahawm taka Member-te, ruling leh opposition sawi lova ram leh hnam himna tur dah hmasaa kan tangtlang kha a ropui ka ti a. MLA Fund leh kan hlawh atanga CM relief fund-ah ui hauh lova kan thawh thin te kha a ropui tak zet a, mipui aiawha rorel tute kan tanrualna hian rah tha tak a chhuah a ni tih pawh alang chiang hlein ka hria a. Hetia relief fund-a pek mai bakah mahni bialah ei leh in an neilo palh ang tih hlauvin lockdown chhungin chhuanchham an awmloh nan bial tinah a bial tuten buhfai te, eitur chi hrang hrang dal te leh chawhmeh chi hrang hrang kha an phur a, an sem a. Tin, sum te pawhin an pe bawk a, mask te, glove te, sanitizer te, thil tul tam tak mahni bialah kan thawk a, kan pe a. Mipuiin an thlamuan pui em em a, chutiang chuan MLA-te hmalakna leh tanrualna hi bial mipuite pawhin hmun tam takah an hmuhin mipuite pawh an tanrual phah a. He hrileng dona kawngah hian vawiina ka member-puite Legislator zahawm tak takte hmalakna leh thawhna te hi a ropui ka ti a. In vai hian in insen dan tur te, sum leh pai mahni biala kan khawhral dan kha chhut dawn ta ila, a nasa hle theuh ang tih hi ka ring nghe nghe a ni. Kan dinhmun a tha e kan tihmek lai hian inthlahdah thei kan la nilo tih hi kan hriatchian erawh chu a tul viau awm e. Vaccine a awm kan ti a, hemi avang leh hri kai kan tlem tak avang hian kan inthlahdah erawh a thiang hauh lo tih kan hriat a pawimawh hle a. Mipui

nawlpuiin vaccine kan dawn phak ve hun tur a hriatloh a. Chutih rualin, Covid-19 hri thar khawvel hmun hrang hrang ah leng mekin khawthlang lam ramte an buai leh tan mek a. Kan han inthlahdul hret avang hian dinhmun him takah kan awm ta e, tihna a ni lova, zan khat thil thuah boruak danglam that thei, pung leh hluai thei dinhmunah kan ding a ni tih kha kan hriat reng a tul khawp mai a tih hi covid-19 do kawnga sawrkar, kohhran, tlawmngai pawl leh zoram mipuite tanrualna avanga a tuar nep ber state kan ni leh, hma la tha ber te zinga mi kan ni hi rampawn thlengin ngaihven tu kan nei ta a, a lawmawm hle a ni.

Hetih rual hian hmabak ko tak kan la nei a, sawrkar, kohhran, tlawmngai pawl leh zoram mipuite kan tanrual renga, Pathian au chunga tawngtaina nen theihtawp kan chhuah chhunzawm zel chuan kan hlawhtling ngei ang tih ka ring a. Hei leh chen hi kan tangrual a, kan thawk hova, Pathianin min awmpui a, min kaihruai a, min veng a; chuvangchuan, hun lo la awm leh turah pawh tanho chhunzawm zel a, theihtawpa hma kan lak hi tha kan ti a. Chutiang tur chuan vawiinah hian he resolution atang hian thawhhona tha lehzual nei leh zel turin kan insawmin kan innge a ni. Pu Speaker, ka lawm e.

SPEAKER : Awle, Resolution neituin a rawn move ta a. Kan sawi ho tawh ang a, member pakhatin minute engzat ngei kan inpek leh ang le? Awle, minute 10 kan ti ang a, hmang zo lo an awm pawhin a pawilo ang a. Tin, dar 4 kha rilruin kan tinzawn dawn nia. Awle, tunge han sawi hmasa ang le? Member zahawm tak Prof. F. Lalnunmawia ka sawm e.

Vawiinah MLA zahawm tak Pu H. Biakzaua resolution sawina hun tha tak mai kan nei hi ka lawm a. He a Resolution, “*Covid-19 hripui leng do kawnga sawrkar, kohhran, tlawmngai pawl leh zoram mipuite tanrualna avanga India rama ti tha ber state zinga Mizoram kan tel thei hi a lawmawm kan ti a. He hripui dona kawng ah NASA leh zuala tan ho chhunzawm zel tha kan ti*” tih hi kan thlawp duh ve a ni.

Pu Speaker, kan hriat angin Covid-19 hripui tun thlenga khawvel puma mi nuai 26.4 chuang zet mai suattuin khawvel a tihbui dan te, tin, Mizoram ngei pawh min tihbui dan te kan hre theuh a. Hengte hi kum 40, 50 lo awm leh turah thangthar he chanchin hrelote hnenah hian thawnthu ang tein sawi dawn ila, a rapthlak hlein a rinawm a ni. Pu Speaker, hei, kawng hrang hrangin Mizoram sawrkarin he hrileng dona atan hian hma a la a, kan hruaitu rintlak tak tak kan CM zahawm tak hoin, kan Health Minister-te leh sawrkar hotu hrang hrangte hmalakna avangin Mizoram chu India state zingah he hrileng dona kawnga che tha ber pawl kan han ni hi a chhuanawm ka ti a, a ropui ka ti bawk a, kan hotute chungah pawh hian lawmthu sawi tur tam tak kan bain kan hria a ni.

Tin, he hrileng dona kawngah hian kan ram hruaitute mai bakah zoram mipui kohhran, tlawmngai pawl hrang hrangte thawhhona tha tak mai kan hmuh avang khanin hetianga mizo-a kan lo piang te pawh hi a vanneih thlak hlein kan hria a ni. Mizoram keini anga pianphunga tangrual tha khawtin leh veng tina hetiang ang local task force tha leh

thawhhona tha nei hi an awm ve pawhin ka ring lo a ni. Chuvang chuan, mizo-a kan lo piang hi a lawmawmin a ropui a, a nuam hlein ka hria a ni.

Awle, Pu Speaker, helai kan hun kal ta chungchanga ka hriatrehng han tarlan ve ka duh chu, he hrileng, he hripuiin India ram a rawn thlen tirha kan chiai zia te ka ngaihtuah a. India ramah pawh doctor tam tak, mithiam tak tak an thi a, Khawvel hmundang chu sawiloh kan ramah pawh khan mithiam te an thi a, an do na kawngah ruahmanna thate a awm hman si lova, mipui kan chiai tak zet anih kha. Kan Resolution move-tuin a sawi tak ang khan, March Ni 25-ah covid-19 *positive case* kan han neih phei kha chuan mipui kan ralkhel nasa hle anih kha. Chutih rual chuanin, kan ram hruaitu kan CM ho in inkaihhruaina tha tak mai dawn a ni a, kan Chief Secretary te, kan Health Minister-te hoin mipui tha takin min kaihruai a, mipui chiai karah ruahmanna an siam a, mipui pawhin kan thlamuanpui hle anih kha.

Tichuan, hemi kawnga ka tarlan duh chu, hrileng vei leh veiloh test-na khawl hi engtikah nge kan neih tih hi mipui thlir a ni a. Chutah chuan kan sawrkar hotute remruatnain hrileng kai leh kai lo enna khawl Covid-19 Testing Lab. din dan tur ngaihtuatu Core Committee' din a ni a, a din tuk 24.3.2020-ah an thukhawm nghal a, kan Health Secretary kaihhruainain,. Chumi hnuah chuan a din chuk chuk dan kha ngaihtuah nghal a ni a, a dinna order-ah phei chuan thlakhat chhunga ruahmanna siam turin tih kha a ni a. Amaherawhchu, Pu Speaker, thil lawmawm em em chu, he Core Committee hianin nasa tak leh thahnemngai takin hma a la a, karkhat chhunga he laboratory peih hman a ni kha a lawmawm takzeten ka hria a ni.

Tichuan, ka han tarlan duh chu, he laboratory dinnaah hian ZMC-ah sawn District Laboratory Centre a awm a, chutah chuan TB Research ti tur leh zirturin MZU Biotechnology Department te leh District TB Centre (DTC)-a kan doctor thiam ten hma lo la mekin PSL-II Laboratory kha an lo buatsaih mek a, an la puitlin lo deuh hlek a. Chu laboratory chu eng pawh nise a aia hmanhmawhthlak zawk Covid-19-in min rawn tihbui avangin hemi atan hian hman mai ni se tiin dil a ni a. Tichuan, MZU leh DTC lama thawkte pawhin phal takin an lo remti a, peih tep ni tawh sa chu laboratory atan chuan hman a lo ni ta a. A hmunhma te, laboratory room-te peihfel loh anih avang khan hmanhmawh takin hnatiang te koh a ni a, police hnatiang te koh a ni. Tichuan, police leh khawtiang mi a theih ang angte leh sawlai ZMC-a thawktu ten theihtawp chhuahin an bei a. Hengah hian mithiam hrang hrangte pawh pun an ni a, MZU, PUC, Veterinary College, RIPANS, ZMC Microbiologists leh Civil Hospital Microbiologist-te tang khawmin theihtawpin an hawk a, hun reilote chhungah kha laboratory kha an peih ta a ni.

Tichuan, a hlimchhawn positive case kan neih tirh atangin a test-na kan han buaipui chhoh kha a ni a, a hnu lawk April Ni 6 atangin sample kha test ve theih tan a ni. Heta tan hian MZU leh PUC-a RT-PCR khawl chu hmang hawhin tan a ni ta a. Lam hla tak Guwahati, Silchar-ah te a sample thawn ngai thin kha inkalpawhna khar anih tak avangin thawn a harsa ta a, chutah chuan Mizoram-ah ngei a test-na kan han nei thei ta kha mipui pawh kan

thawhuaiin ka hria a ni. Thawktute lo inpek nasat zia kha a lawmawm hle a, mipui nawlpuite ralkhelin pawn pawh chhuak ngam mang lovin an awm kha a ni a, chutiang kara thawktu kan mithiam rualte inpekna avangin khatiang mipui mamawh an din thei kha a ropui ka ti hle a ni. Chulai chu he House kaltlang hian, khang zawng zawng thawktute inpeknaah khan lawmthu ka sawi duh bawk a ni.

Tin, he Core Committee-ah hian Pu Speaker, MLA zahawm tak Dr. K. Pachhunga leh Dr. Vanlalhlanga te pawh hi an tel a, anni pawh hian contribution tha leh ropui tak takte pawh an nei a ni tikhka ka han tarlang ve duh hrim hrim a ni.

Tin, helaia han tarlan leh lawk ka duh chu Pu Speaker, he hrileng dona atang hian thawhhona pawimawh zia kan hmu a. Heng thawhhona atan hian VLTF te din a ni a, din anih theihna tura kan hotute ngaihtuahna a lo awm hi a ropui ka ti a, Pathianin finna a pe niin ka hria a. Khawvel hmun dangah pawh an tih kan hriatloh helai Mizoram-ah Kohhrante, NGO pawl hrang hrangte leh sawrkarte thawhhona tha tak mai din a ni a, hemi hmanga khawtin leh veng tinah hrileng kan han do thei kha a ropui ka ti a. Ramri lama duty-te leh an inpeknate pawh kha hriatreng tlak a niin ka hria a. Frontline Workers leh Police-te, a bik takin an inpekna te pawh kha a ropui ka ti a, heng zawng zawnga min hruaitu chu Pathian a ni a, Pathianin kan CM zahawm tak leh ram hruaitute finna a pe a, anni kaihhruaina hnuaih kan Health Minister-te, Medical Operational Team Chairman te leh MLA zawng zawnge, Kohhran leh NGO hruaitu zawnge zawnge inpekna avanga hetianga tha tak maia he hri kan han do thei hi a ropui ka ti a, India rama che tha ber state kan han ni te hi a bulpui ber chu Pathian kaihhruaina a ni tih vawiinah hian ka sawi duh a. Chutih rual chuan kan ram hruaitute Pathian tih mi kan lo nei leh zel te hi a ropui a, a lawmawm ka ti a ni.

Tichuan, henga kan thawhhonate hi tunah pawh hian kal zel sela, hri te a la reh lova. Hri a reh thlengin leh thildang pawh a la rawn thleng thei a ni, chungah te pawh chuan midangte tana entawn tur hetianga kan awm thei hi a lawmawmin a ropui ka ti a, chungah chuan lawmthu ka sawi duh a, Zoram mipuite pawh kan lawm tlangin ka hria, Pu Speaker. Heng zawng zawnge hian kan ram sawrkar lu ber kan CM zahawm tak atanga mipui nawlpuite thawhhonaah hian lawmthu ka sawi a ni e. Ka lawm e.

SPEAKER : Tunge han sawi leh ang? Awle, Member zahawm tak Pu Lawmawma Tochhawng ilo sawm ang.

PU LAWMAWMA TOCHHAWNG: Pu Speaker, ka lawm e. He Resolution tha tak, “*Covid-19 hrileng dona kawngah sawrkar, kohhran, tlawmngai pawl leh Zoram mipuite tanrualna avanga India rama ti tha ber state zinga Mizoram kan tel hi a lawmawm kan ti a, he hripui dona kawngah nasa leh zuala tanho chhunzawm zel a tha kan ti*” tih kan han sawihi tur hi kan hun tawn tak leh kan tawn mekte atangin Resolution awm tak, sawiawm tak pawh a niin ka hria a, a hun nen a inhmeh bawk a ni.

Ka sawi tum dan leh ka thliar dan hi tlemin a danglam hlek maithei a, kan Bible nena tekhinin kan hun tawn mek leh kan ram inkaihhruai dan leh kan rama thil lo thlengte hi han sawi lawk ka duh a ni. Pu Speaker, min lo hriathiam a tul anih pawhin min lo hrethiam turin ka han ngen a ni.

Kan thil tawn tak leh tawn mek hian, ‘tanrual hi chakna a ni’ tih te, Bible-in ‘hrui 3 hrual chu a chat lawk lawk lo e’ a tihte, a hun laia roreltu Pathian ruatte thuawih thatzia te, chu mai bakah zawlak, awihtlak rorelna leh thutlukna fing tak siam thei sawrkar kan neih hlutziate, ‘thawhrimna zawng zawngah hlawkna a awm’ tih thufinga kan hmuh dik ziate a lo lang uai uaiin ka hria a. Chubakah engkim chunga roreltu van Pathian, a mite tawngtaina chhangtu, ‘min au la ka chhang ang che, thil ropui leh inthupte ka hriattir ang che’ titu rinawmna leh a zahngaihnate a lo lang chiang hlein ka hria a. Eng ang pawhin bei mah ila, thawk mah ila, insengso mah ila, kan Pathian malsawmna tel lo chuan engmah lo mai kan ni dawn chiang si a.

Chuvangin Pu Speaker, helai thua mite hruai kawnga van Pathian inrawlh nasat zia hi Israel fate chunga lo lang kan hmuh leh kan Mizoram Zofate min kaihhruai dan hi tekhin tham a awmin ka hria a.

SPEAKER : Chair kan han inthlak lawk ang e aw. (*Dr. Vanlalthlana, Chairman-in Chair a la.*)

CHAIRMAN : A chhunzawm theih e.

PU LAWMAWMA TOCHHAWNG: Mosia hnenah, ‘Ka mite an sal tannaa an rum ri leh mangang au thawm chu ka bengah a lo lut a, van atangin ka lo hria a ni. Anmahni hruaichhuak turin ka ruat che a ni’ a ti a, Pathian chungnung bera miruat Mosia, hruaitu ropuiin Israel fate sal tanna ata a hruaichhuah zia kha, Tin, thlalerah Israel fate an tam a, an mangang a, tam a tlaka thlalerah eitur awmloh lai khan an phunnawi a. Chutah Pathian miruat Mosia chuan a ban a phar a, manna leh vahmim eitur an nei ta anih kha.

Kan ram pawhin mautam, tam kan tuar a kan chhe hle dawn anih hi tihlaiin, chung lam remruatnain MNF sawrkar Pu Zoramthanga kaihhruai a lo ding hlauh a, ‘tampui mitthi’ pipu ten an sawi thin kumte chu puar kum, a thlawna buhfai sem kum, dawn kum, a vur kum ang mai kan lo ni ta zawk a. *Paran* thlalerah khan Pathian miruat hruaitu sawisela kalhtu Kora, Dathana leh Abirama-te an lo chhuak a, sawiloh tur sawia tihloh tur an tih avangin leiin a ka a ang a, sawichhe tute chu a lem a, a nung chungin Seol-ah an liamthla ta a nih kha. Thlalera an awm lai bawk hian rulchukna mi a lo pung a, mipui an hlau a, an thlabar a, mahse Pathian remruat ang zelin hruaitu Mosia’n dar rul a khai a, mipui damna tur a lo ni leh ta a.

Kan ramah pawh hripui khawvel zawng zawng tuam chhuaktu chu a lo thleng a, mahse Mosia ang mai hruaitu Pathian-in min pek a, min hruai lai a lo ni leh hlauh a, a tih tur takte ti thei sawrkar kan lo nei leh hlauh a ni. Mosia'n a rorelnaa mi 1000 chunga rorel turte mi 500 chunga hruaitu turte leh 100 chunga roreltu turte a ruat ang khan, ram hruaitu, kan sorkar hruaitute chuan a minister te leh department hrang hrang hotute, NGO-te, District Level Task Force-te, Local Level leh Village Level Task Force-te tih tur fel takin a han ruahman a. Rul chukna mi hripui Covid-19 chu doin mipui, sorkar, kohhran, NGO-te kan han tangrual ta a. India rama a titha berte zingah lang phaka chhiar tel kan lo ni ta hi a lawmawm em em a ni. Hruaitu mumal lo chu nei ila hetiang hi kan ni ang em aw tih ngaihtuahna thui tak awm thei a ni. Pu Chairman, he hripui dona kawnga VLTF te, LLTF te inpekna san zia kha. Mahni in leh lo chhuahsanin, daiah, thosi leh vangvat karah mutna tha pawh nei lovin, a thim a var thlu loin an duty kha a ni a. An inpekna kha a hlu thlawt a, an thawhrimna a thlawn lo a ni. Hlawnka um chu sawi loh, a man pawh beisei lova an thlai thar neih ang ang khawpuia thawnlut thin thingtlang loneitute kha an fakawm thlawt ka ti. Malsawmna dawng zel tlak an niin ka hria. Hmuh let leh beisei hauh lova mahni neih leh thiam thil te hmanga duty te hman tur thawmhaw an han thui chur chur mai te kha a ngaihsanawm a ni.

Kohhran ho sawrkar thuchhuak zawn tura an mite fuih sauh sauh thina, a chhun a zana bang lova tawngtaina khan rah duhawm tak a chhuah ta mek a, India ram pumah kan Mizo hming min ti tha ta a nih hi. Ram hruaitu a tana thlan annih ang taka kawhmawh bawl lo leh mipui rilru sukthlek tikawi zawn a khawlhkham leh ngaihtuahna thalo pu hauh lova sawrkar hmalakna tawiawmtu, opposition MLA te leh Party-te pawh an fakawmin ka hria. House Leader zahawm tak Pu Zoramthanga kaihhruaina hnuai Department hrang hrang ten hripui kai pawh hlau lova, an nunna pawh hlut zo lova an hmalakna te, hma tak leh a hun takah, a hmun dik takah Screening Test kan han nei nghal thei te, National Lockdown neih hmaa State Lockdown kan lo nei hmasa te, Local leh Village Level Task Force, District leh State Level Task force din nghal vat vat te, a hming pawh kan la hriat ngai loh PPE a rang a ranga kan han chah thleng te kha hripui dona kawngah kawngro a su thui hle mai. Vegetables Supply Chain kalpui zung zungna chang kan han hria te kha a va remhriat thlak e aw!

Hripui dona kawngah ‘a kipui ber a ni e’ tih theih hial sample test-na khawl hrang hrang han pawhkhawm zung zung te. district tina test khawl dah a anih theihna tura Health Deptt. leh a changtu Minister Pu Thangtea leh kan Chief Minister zahawm tak, Finance changtu ni bawkina hma an han la zar zar te kha kan him phah tih loh rual a ni lo. Ram mipui te Covid-19 laka kan him zel theihna tura vaccine pek kal char char a han ni zui ta hian sawrkarin a mipuite a hmangaih a, a lainat a, thahnemngai takin a tih tur a ti zar zar hi a thlamuan thlak khawp mai. Hmabak erawh a la ko.

Pu Chairman, hripui do kawngah te, tampui mithi hmachhawn kawngah te ‘MNF sawrkar chu a vanduai em mai’ kan han ti thla zen hi a dik tawk em aw tih hi ngaihtuah

nawn a tul fo thinin ka hria. Tehna leh thlirna dang atanga han thlir chuan, hruaitu ropui Mosia'n Israel fate ei tur awmlohma hmuna Pathian hnena ta ei tur leh in tur a pe ang te, Rul chukna mi laka himna tur dar rul khai tura hrilh anih anga a khaia Israel fate an him ta ang khan, tampui leh hripui laka ram leh hnam, mipui himnana hmantlak hruaitu Pu Zoramthanga, kan Chief Minister zahawm tak leh MNF sawrkar Pathian-in min pe hi ram mipui leh hnam tan vanduaina ni lovin hnam vannei, mipui nihlawh kan niin ka hria, kei ka teh vena atang chuan. "Ka nu hi a vanduai e mai, ka damlo a, ka muthei lo a, chaw ka ei thei lo a, a tlaivar a, min mutpui a, ka mamawh tinreng min pe a, ka nu hi a va han vanduai em!" kan ti ngai em ni? Emaw, "Ka pa khu a va vanduai em, chaw kan ei theihna tura tan kawla nichhuak chhiarin hna a thawk a, lo-ah beka thlantui luangin a bei si a, ka pa khu a va han vanduai em!" kan ti ngai em ni? "Hetiang pa ka nei hi ka va vannei em!, hetiang nu min hmangaihtu ka nei hi ka va vannei em" kan ti thin a ni lo vem ni? Ram mipuite pawh hian hetiang sawrkar a hun taka che thin, a hun taka mipui tana thawk thin, a ngaihna hria kan nei hi kan va vannei em tih hi kan tawngkam chhuak tur a ni zawk dawn lo em ni?

Pu Chairman, a tlangkawmnaah chuan he Resolution, Covid-19 hripui do kawnga, sawrkar, mipui, kohhran, NGO-te tanrualna vanga India rama a ti tha ber zinga kan tel hi a lawmawm zia leh, hmabak la awm nasa zawka tangho zel tura ngenna hi resolution tha tak, pawmawm tak niin ka hria a, he House zahawm tak hian pawm turin ka thlawp thu ka han sawi a ni e. Ka lawm e.

CHAIRMAN : Tunge sawi leh dawn? Tlai lamah hian in inhnawh chep leh viau kha a ni ang a, minute 10 zel a ni bawk si a. Pu KT Rokhaw, Member zahawm tak ka sawm e.

PU K.T. ROKHAW : Pu Chairman, ka lawm e. He Private Resolution hi a tha viau a, keiina kan rawn sawi duh chu Covid-19 hri dona kawnga Mizoram chet that chhan hi sawrkar chet that vang aimah hian mipui thuawihna niin a langin ka hria a, sawrkar in thutlukna engpawh siam sela, mipuiin thuawih takin kan zawm zel a. Hei hi tlawnmgai pawl-te, kohhran-te, local leh village level task force-te inpumpekna leh thawhrimna vang a niin ka hria a. Tin, kan sawrkar pawhin theih tawp a chhuah a ni tih kan hria a, mahse chutiang lai chuan kan sawrkar thu tlukna siam fuh tawklo lai a awm ve nual a, hemi avanga hri darh, rin aia hri darh pawh a awm a ni.

A point pakhatnaah ka han sawi lan duh chu, Mizoram-ah Covid-19 hrileng vanglai takin local council leh village council election buatsaih a ni a, mipui leh official tam takin Covid-19 an kai a, harsatna ramin kan tawrh phah a ni. Tin, a pahnihnaah chuan, hunlo taka school naupang leh school hawn anih avang khan covid-19 vei an pung bawk a. Tin, a pathumnaah chuan, Rapid antigen test hi mithiam ten a rintlak tawk lo tih an sawi chhuah tawh hnuah Mizoram sawkar chuan a ring lui tlat a, RagT hian result dik lo a pek chhuah nasat avangin vei mek thenkhat vei tawh lo angin a lan tir a, damdawiin atangin a then te

chu discharge an ni a, hei hian covid-19 a tidarh bawk a ni. Kan sawrkar hian theih tawp a chhuah a, mahse hei hi kan fimkhur tawk lohna a niin ka hria a.

Tin, Pu Chairman, Covid-19 hrileng chungchangah ka ngaihtuah a, Mizoram hi 100% deuhthaw Christian kan ni a, Pathian-in kan tawngtaina te a chhang a, Mizoram hi kan mualpho a hlau a, chumi avang chuan tun tumah pawh state pakhata a thi tlem ber kan ni a, a lawmawm takzet a ni. Tin, a lehlamah chuan he hrileng chunghangah hian term hmasaa Pu Lalthanhawla Congress sawrkar kha Pathian hian a hmang ve tlat hian ka hria a, a chhan chu, tuna Falkawn hospital kha Pu Lalthanhawla sawrkar khan Referral Hospital, Mizoram hospital zawng zawnga hospital lian berah min lo din sak a. Tin, chumai chu ni lovin MBBS zir theihna Medical Collge min lo dinsak hman bawk a, Covid-19 a lo thlen meuh chuan Falkawn Referral Hospital chu Covid-19 veite enkawlna hmunpui ber a lo ni ta a ni. Congress sorkar liam ta khan Referral Hospital kha min lo dinsak lo ta sela tuna kan sawrkar hi kan buai viau ka ring a ni; kha kha Pathian malsawmna a ni tak meuhin ka hria a.

Tin, ka ngaihtuah thin a, Bairabi Rail Station pawh kha Congress sawrkar liamta khan rail lian zawk tlan theihna tura a lo tih len avangin Covid-19 vanga phailam atanga lo haw tam zawk ten awlsam takin Mizoram an lo lut thei a, chuvang chuan kan sawrkar hmasain infrastructure lo siam tawhte pawh kha kan chhawr hle a ni tih mipuite pawhin kan hriat a pawimawh hlein ka hria. Sawrkar hmasa thil tih that avanga malsawmna kan dawnte hi hai der lo ila a thain ka hria a ni. Tuna kan sawrkar pawh hian theihpatawp a chhuah a, sawrkar tharina sawrkar hmasa thil tih that a hai der anih chuan, tuna kan sawrkar ngeia kan hotute pawh hi an tawrh ni se rilru a na ve hlein ka ring a. Chuvang chuan, Pu H.Biakzaua, Member zahawm takina Resolution a rawn putluh, “Covid-19 hripui leng do kawngah sawrkar, kohhran, tlawmngai pawl leh Zoram mipuite tanrualna avangin India rama a ti tha ber state zinga Zoram kan tel hi a lawmawm ka ti a, he hripui dona kawngah NASA lehzuala tanho chhunzawm zel tha kan ti” a tih hi a that em em rualin hetiang hian tlem belh ta ila - “Covid-19 hripui leng do kawngah sawrkar, kohhran, tlawmngai pawl leh Zoram mipuite tanrualna leh sawrkar hmasa Congress sawrkarin infrastructure tha tak te min hnutchhiah avangin India rama a ti tha ber state zingah Mizoram kan tel hi a lawmawm kan ti a, he hripui dona kawngah NASA lehzuala tan ho chhunzawm zel tha kan ti” tih ni zawk sela chuan a that dawn tehlul nen ka ti a ni. Pu Chairman, ka lawm e.

CHAIRMAN : Kan Oppsition Group Leader zahawm tak Pu Zodintluanga Ralte ilo sawm ang.

PU ZODINTLUANGA RALTE: Pu Chairman, Member zahawm tak Pu H. Biakzaua Resolution kan sawiho mek a ni a, he kan resolution kaihhnawiha han sawi ka duh chu, kan sawrkar, kan minister-ten engkim an sawi dawn apiang hian Covid vanga harsatna anih zia, hma an lak theihloh zia an sawi reng mai a. Amaherawhchu, tukin zing chanchinbu kan hmu a, an lo harsa lo viau anih ka ring a, Covid vanglai khan ruling MLA-te khan uang takin an

MLA fund atangin nuai 50 an thawh tur kha chanchinbuah te, hmun hrang hrangah an sawi a ni. Amaherawhchu, vawiin thleng pek anih loh chhan kha, sawrkar hian sum hi a lo harsa tak tak lo a ni tih hi vawiina ka rawn sawi hmasak duh a ni. Chanchinbute leh sawrkar press released-ah khatih laia sawrkar a harsa viau emaw kan tih lai khan kan Minister pathumte chuan mipui hmaa an intiam nuai 50 kha an lo thehlut daih mai a, mahse, sawrkarin sum kha alo mamawh tawh lo a ni ang chu Pu Chairman, nuai 50 atanga nuai 25 kha an kir leh a ni. Chuvang chuan kan sawrkar hi he hripui dona sumah hian a harsalo tih hi zoram mipui hmaa an inpuanna a ni a, sawrkar chaklo an nihnaah chhuanlamah he hripui hi an hmang mai mai a ni. Chuvang chuan vawiina kan resolution-te pawh hi han sawi vak tur a awmin ka hre lem lova.

Kan Health Minister chak tak mai hian a duh angin khang Covid buai laite khan hma han la thei sela chuan hei aiin a chakawm mang e aw, ka ti a, thutlukna an han siam a, zanah order cancel leh a ni a, nimin maiah pawh Biak In-ah inkhawm a theih a, zai a theih tih kan han hria a, chawhnu lamah chuan a zai theih leh loh an ti a, an rorelna hi a mak thei khawp mai a. Chuvang chuan, kan Health Minister chak lutuk, hmingtha tur, ropui tur dodalna mai maiah hian he Covid hi kan hmangin ka hria a ni. Ani hi Chief Minister lo nita sela chuan he Covid donaah hi chuan kan harsa lo ngawtin ka ring a, a hmalakna tur tam tak tih thuanawp hian a awmve tlat a ni. NEC atang tein sum a rawn kal a, finance atangin an han audit rup rup mai a, kan Health Minister hmingthatna tur apiang hi dodala tih hmingchhiat tum emaw ni le, tih hi kei ka ngaihdan a ni deuh tlat mai a, Covid-19 kan do chhung zawng hian kan sawrkar hian Bio-Safety Level (BSL) 3 laboratory tha pakhat pawh kan neih belh lo a ni. Congress sorkar zara Referral Hospital-a laboratory tha tak an hman bak hi district dangah pakhatmah BSL level-3 neih belhna kan nei lo reng reng, tun ang Covid harsat lai te hian kan district hospital hrang hrangte laboratory tha kan neih theihna tur atana nakin zel pawha kan hman tangkai tur, siamna hun tur anih lain, a tir atanga kan hman TB Hospital-a TB enna tur Lab. kha vawiin thlengin kan hmang a, buaithlak khawp mai.

Tin, Covid-19 kan donaah hian nimin lamah pawh kan sawi a, kan Minister-te pawhin min chhan theihloh, mi tlawmngai tak tak, hripui khawvelin kan hlauh rawn laiin Bairabi Rail Station-ah kan thlaite tam tak an rawn hawng a, chung lo phur tur driver-te hlau tak chungin, tlawmngaiin an kalna turah an phur a, tin, chawei tur lo buaipuitute ho pawh kha khang an tlawmngaihna rah sawrkarin kan pe thei lo kha a pawi ka ti a, khangte kha zawhna chhannah pawh khan kan pek theih loh dan emaw an pek theih dan te kha sawi a awmlo a ni. Tin, nichina ka hmaa kan member zahawm takin a sawi ang khan, he hripui donaah hian congress sawrkar hmasa khan theihtawpin MNF sawrkarina a lo hluihlawn tawh Referral Hospital, Falkawn ami kha lo tuaihnuma cheitha lehin, lo siamtha lo ila chuan eng ang takin nge he hripui hi kan lo hmachhawn anga, engang takin nge mipuiin kan tawrh ang tih hi a hriat loh a ni.

Tin, pawnlam atangin zirlaite leh eizawnna hrang hrang a vanga State pawnlam a awm te, Congress sorkar in a Bairabi Rail Station tha tak a lo duan a zarah hahdam zawkin

kan ram an rawn thleng thei te kha a lawmawm ka ti a. Pu Chairman, ka hmaa mi sawi ang khan, kan Resolution, “Covid-19 hripui leng do kawnga sawrkar, kohhran, tlawmngai pawl leh Zoram mipuite tanrualna leh Congress sawrkar ina infrastructure lamah nasataka hna a lo thawh avanga India rama ti tha ber State zinga Mizoram kan tel hi a lawmawm kan ti a, he hripui dona kawngah nasa leh zuala tanho chhunzawm zel hi a tha kan ti” tiin thlak thei ila chuan hetilam a tang pawhin lungrial takin kan pawm thei ang tih kha ka rawn sawi a ni. Pu Chairman, ka lawm e.

CHAIRMAN : Hun a la awm nual a, a hmaa mite pahnih khan minute 10, 15 an hmang a. Sawi duh kan awm tawhloh chuan kan chawl mai dawn nge, engnge kan ngaihdan? Awle, ‘chawl mai ang’ ti kha an tam zawk a, helamah ka thu ve tlat bawk si a, meeting te a awm dawn bawk si a. Darkhat a ri dawn ta a, kan chawl rih mai a. Dar 2:00 PM-ah kan thukhawm leh dawn nia.

Recess (1:00 PM)

2:00 P.M.

DEPUTY SPEAKER : Tunge sawi leh ang le? Dr. ZR Thiamsanga, Member zahawm tak i lo sawm ang.

DR. ZR. THIAMSANGA : Pu Dy. Speaker, Member zahawm tak Pu H. Biakzaua Resolution, “*Covid-19 hrileng do kawnga sorkar, kohhran, tlawmngai pawl leh Zoram mipuite tanrualna avanga India rama a ti tha ber state zinga Mizoram kan tel hi a lawmawmawm kan ti a, he hripui dona kawngah nasa lehzuala tanho chhunzawm zel a tha kan ti*”, tih kan sawiho a, a lawmawm hlein ka hria a, pass ngei turin ka rawn thlawp a.

Kan hria a, India ram mai nilo khawvel pumina kan buaipui, khawvel ram changkang ber berte pawhina tih ngaihna an hriat loh kan ram a lo thleng ve a. Hemi chungchangah hian a hmasa berin kan Chief Minister zahawm tak hmalakna hi a ropui hlein ka hria a. Kan ngaithla tawh a, a rawn puluttu khan felfai takin, kimchang takin a rawn sawi tawh a. Kan Chief Minister hian a hun takah engkim mai ruahmann a han siam zung zung a, sum leh pai kan harsat zia te pawh kan hria a, amaherawchu a niin, “kan hnam himna turin, kan dam khaw chhuahna tur chuan development-te chu lo chawl hrih ila, kan dam khaw chhuahna hi a pawimawh ber a ni” tiin sum awm ang angin he Covid dona atan hian min hman tir a. Tin, national lockdown hma kar khatah Mizoram khan lockdown kan han ti a awmzia a nei khawp mai a, domestic flight-te kan han titawp a, International flight-te pawh aniang chu, a hma ber pawl kan ni a, airport-ah phei chuan a khar hma ber kan ni a, khami avang khan foreign atanga lo lut tur tam takte kha an rawn lut ta lo a, kan ram kan him chho ta a ni. Hemi chungchangah hian kan Health Minister hi a hming lam pawh hian sawi loh theihloh niin ka hria a, a hmalakna hi a ropui a. Department zawng zawngte, NGO zawng zawngte, kohhran zawng zawngte, pawl engkim mai hi a co-ordinate tha a, Health Department-a Doctor zawng zawng, Indian Medical Association-te, Mizoram Government-

a Doctor Association-te, private sector-a Doctor zawng zawnge hui khawmin lungrial takin ama hona hnuaiah kan thawk tlang a, a lawmawm hle a ni. A hun takah Health Minister niawm tak mai kan han nei leh, hetiang hun khirh tak kara Chief Minister tur dik tak Mizoramin kan nei hi a lawmawm hle a, a vanneihthlak hle a ni.

Kan hria a, khawvel pumahn a nuai telin nunna an chan a, India ram pawh nuai 1 leh sing 5 chuang zetin nunna hlu tak an chan a ni. Medical Doctor-te pawh India ramah hian ka hriat sual loh chuan 300 chuang zetin nunna an chan a, kan thenawm State Assam-te pawh 1000 chuangin nunna an chan a, State te Sikkim kan tih ang te pawh 100 chuang meuhin nunna an chan a ni, kan thenawm state-ah pawh chutiangin 100 boral hi an tam a ni. Amaherawhchu, Mizoram chu kan vannei a, vanduathlak taka mi 10 an boral tih loh erawh chu vawiin thlenga kan la him dam te hi a lawmawm hle a. Vanduathlak taka nunna chan chhungte zawnng zawnng pawh vawiinah hian kan tuarpui tak zet a ni. Covid-19 dona chungchangah hian kan tangrual a, nichina a rawn move-tu sawi ang khan MLA, Legislators-te kan tangrual a, kan Speaker honain MLA fund-te pawh kan thawh a, kan hlawh atangte pawhin kan han thawh chho a, opposition leh opposition lo sawi lovin keimahni bial theuhah sum leh pai te, PPE te, hand-sanitizer te, mask te, ei leh bar chungchangah pawh MLA theuhte pawh hian kan bial hi kan vil tha khawp mai a, kan tangrual a a lawmawm hle a ni.

Kan Chief Minister chetna hnuaiah chak takin hma an han la chho a, Village Level Task Force-te, Local Level Task Force-te, NGO hrang hrangte, chumai bakah kohhrante pawhin theih tawp kan chhuah tlang a, a thim a var pawh thlu lovin ramhnuaiah, khaw chhe karah pawh, thih huamin, ramriah, hmun tinah kan duty a, kan awm a ni. Covid duty avanga boral ta, nunna chan mi eng emaw zat *pasaltha* kan nei a, khangho zawnng zawnng inpekna, an nun kan ram leh hnam tana an pekna kha vawiinah hian kan chhuang a, an chhungte zawnng zawnng vawiinah hian kan tuarpui hle a ni tih hi he House zahawm tak kal tlang pawh hian ka rawn sawi duh a ni. Hei hi mi pakhat mai tih theih a ni lo a, kan tanrualna, kan Chief Minister hova Health minister-te, kan Minister zawnng zawnge, MLA-te, kan sawirkar hnathawkte, department zawnng zawnge tan hona avangin vawiinah hian hetiang dinhmun hi kan lo thleng ta a, a chhan ber chu kan thawhrimna hi Pathianin mal a sawm a, kan tawngtinate Pathianin a chhang a, vawiinah hetiang dinhmun kan lo thleng ta a ni. A lawmawm hle a ni.

Covid-19 karah pawh kan buai a, Assam hovin ramri min han tibuai a, engtiangin nge ei leh bar te pawh kan hmuh ang tiin kan mangang em em a. Chutihlai chuan Supply Department, a Minister hovin ei leh barah pawh engmah harsatna nei lovin thla 3 lai mai eitur an lo chhek khawm theite kha a ropui hle a ni. Thingtlang lama kan mirethei te te thlai tharte pawh Horticulture Department leh kan Chief Minister zahawm tak hmalaknain, MIZOFED nen tangrualin *vegetables supply chain* an han ti a, thingtlanga kan unau mi retheite te te pawhin an thar chhuahte pawh kha helaiah khawpuiah an rawn hrall chhuak thei a, a lawmawm khawp hle a. Chutiang chuan kan Police-te ramriah an duty a, ramri mai

ni lovin khawpui chhungah te pawh chhun leh zan zawms hah em emin vawiin thleng pawha an duty te hi a lawmawm a, an inpekna hi a ropui a ni.

Vawiinah lawmthu sawina tur hlir niin ka hria a, a lawmawm ka ti a. Hetiang Resolution rawn put luh a ni hi a lawmawm a, he hripui dona kawngah tunah hian chawl hman kan ni lo a, muang mai tur pawh kan ni lova, kan la fimkhur chu a ngai khawp mai. “Zai te pawh a theih tawh in han ti a, in thulh leh a” an ti a, nichinah khan an sawi a, Pu Dy. Speaker, kan la fimkhur hi a ngai a ni. Consultative meeting chuan a sawi a, amaherawhchu, SEC chuan ngun taka mithiam te an rawn khan, Zai hi chakawm hle mahse kan la inven rih hi a ngai a ni tiin khatiang khan inthlahrung takin la zai hrihloh ni rawh se an rawn ti te pawh kha medical mithiam ho in an ngaihdan a ni a, Pu Deputy Speaker, khangte pawh kha kan ram kan hnam thatna tur zawk a ni tih hi mipuite pawhin kan hriat a tha awm e.

A tawp berah chuan TrueNat leh RAT-te pawh kha thalo ang khan kan han sawi a, thil reng reng hi diagnostic thil hi 100% accurate hi a awm lo a ni. A tha a ni, that kha chu, amaherawhchu, engemaw hmuh sual palh pawh awm thei a ni a, kan hmang tangkai hle a ni tih te pawh kha kan hriat a pawimawh a. Tin, ZMC, kan medical college saw tlem te Pu Deputy Speaker ka han sawi lawk ang a, Prime Minister hlui Pu Devi Gowda hun lai khan vaibelchhe 40 min rawn pe a, MNF sawrkar hmasa khan Referral Hospital kha sak a ni, pawisa tlem tein. Chutiang chuan an han sa kha kum 2018-ah India sawrkarin India rama District Hospital-te upgrade turin medical college-a let turin vaibelchhe 180 leh tih kha a rawn sanction belh a, chumi hmang chuan sawrkar hmasa Congress sawrkar khan an han chhunzawm ta a, MNF sawrkar khan khatiang khan lo sa lo se chu dik tak chuan saw Medical College saw a ding dawn lo reng reng tih hi kan hriat chian te pawh hi a thain ka hria.

Tichuan, MNF sawrkarin, tiang khan Congress sawrkarin Medical College-ah an han hlangkai ta a, a lawmawm khawp mai. Amaherawhchu, tipuitlingtu tak tak chu MNF sawrkar a ni. An han chhunzawm a, kan Chief Minister te, Health Minister te, kan sawrkarin tunah hian thahnem ngai taka an chhunzawm avangin Medical College hi lo puitling theiin, Covid-19 pawh enkawlna theihna dinhmunah a lo ding ta a ni tih hi Member-te pawhin kan hriat a tha awm e. Pu Deputy Speaker, hun min han pek belh a ka lawm khawp mai. Ka lawm e.

DEPUTY SPEAKER : Tunah chuan Member zahawm tak Pu Ramthanmawia ka sawm ang a, a niin a sawi zawh hian Pu Lalrintluanga Sailo alo inring dawn nia.

PU RAMTHANMAWIA : Pu Deputy Speaker, ka lawm e. Hei vawiinah Pu H. Biakzaua Private Resolution, “*Covid-19 hrileng dona kawngah sawrkar, kohhran, tlawmngai pawl leh Zoram mipuite tanrualna avanga India ram a ti tha ber state zinga Mizoram kan tel hi lawmawm kan ti a, he hripui dona kawngah nasa leh zuala tanho chhunzawm zel a tha kan ti*” tih hi a lawmawm ka ti khawp mai a, han hnial vak emaw, han

sawiselna tur hi a awm loin ka hria. Kan tangho a ni, zep thu awm loah chuan, mitin mai hi kan tanghoa, thudik hi kan sawi chhunzawm dawn a ni mai a, han sawi bawrhban emaw, han sawi eng emaw kha tul lovin ka hria. Chuvangin hei hi kan zavaai lungrial taka kan thlawp tha ka ti a, keipawn ka rawn thlawp thu ka sawi a ni.

Pathian hian Mizote hi min hmangaih ka ti thin a, kan hun tawn a zir zelin he ramah hruaitu min pe thin a ni. Ram buai laiin sipai an hrang em em a, chung laka min thlamuan tur leh min hum turin Brig. T. Sailo zoramin min pe a ni. Ani hoin kan thla a muan phah em em a, Sipai Lal a lo ni a, Mizo mipuiten kan thlamuanpui a, a hun laiin thil tha tam tak a thawk a ni. Vawiin thleng pawhin ama sulhnu tam tak hmuh tur a awm a ni. Chumi hnuah hun a lo kal leh a, Mizo mipuite'n ram buaia awm hreawm kan ti a, *Remna leh Muanna* awm se kan duh a, Kohhran atang te, NGO atang te nasa takin tawngtaina nen kan dil a ni. Tichuan remna a awm theih nan Pu Lal Thanhawla, Pathianin he Ram kaihruai turin min pe leh ta a ni. Ani hunah *Remna leh Muanna* kan han nei a, zalen takin Mizoram pawh kan awm a kan hlim em em a ni. Tichuan, hun a lo kal zel a, he Mizoram hian hun khirh te, hun harsa tak takte a lo hmachhawn dawn tih kha Pathian chuan a hre reng a, chung hun atan chuan vawiina kan Chief Minister zahawm tak, kan House Leader kaihruai MNF sawrkar chu 1998 atangin sawrkarna a pe leh ta a, chu soawrkar chuan theih tawpin he ram tan hna a thawk a, ka hma a sawitu sawi ang chiah khan he hripui lo leng tur hi kan hre lawk miah lo a, amaherawhchu chutianga kan inenkawlna tur MNF sawrkar khan ‘Referral Hospital’ tiin a hmun hmate hmun dang dangah a zawng a, a tawpah saw laiah hmun hma an khuar ta a. Building tam tak a sa a, staff quarter tam tak a sa a, chumi hnuah sawrkarna a inthlak a, chutianga sawrkarin hma a lo lak tawh chu sawrkar leh khan a rawn chhunzawm a ni. Chu chu a dik a ni. Sawrkar lo awm leh Pu Hawla sawrkar khan tha taka a rawn chhunzawm leh khan vawiina ZMC hi a lo ni ta a ni.

Khalaiah khan kan sawi thin a, kan hotu thenkhat te'n MNF sawrkar hmasain a din leh a lo duan kha engmah lo maia sawi bawrh ban hi kan tum mai thin a, hei hi chu a pawi ka ti khawp mai. Thil reng reng hi a bul tumtu a awm a ngai, bul tumtu tha tak, ruahmanntha tak lo neitu hi awm a ngai a ni. Eng project emaw, building emaw, thil dang dang pawh ni se, chu proejct leh thil ropui tak lo tumtute, an thil tum leh an ruahmanntha chu a tawp thlengin an chhunzawm thei lo anih pawhin a hnua sawrkar ten tha taka an chhunzawm hi mipuiteina min thlan chhan a ni a, chu chu sawrkar tha awm dan a ni. Chu chiah chu tun sorkar pawh mipui sawrkar kan nihna angin mipui duh dan, min thlan chhan ang ngeiin he ZMC pawh tha takin a chhunzawm a, nasa lehzualin a ti phuisui a, vawiinah chuan kan mamawh em em he Covid-19 hri dona tur, damlote enkawlna hmun tur pawimawh tak a lo ni ta a ni. Chuvangin sawrkar hmasa chungah pawh lawmthu kan sawi a ni, an thil tih kha a tha em em a ni. Sawrkar lehzela chhunzawm tlaka an lo dah te pawh kha a lawmawm a ni. Chuvang chuan, ‘kan tih hi a tha bik, tha lo bik’ tih hi vawiinah hian sawi sawi hi a hun loin ka hria, kan thil tih chhun keimahni hunlaia kan thawh hi kan tih theih tawk kan tih hi a tha em em a ni.

Tichuan Pu Dy. Speaker, tun hun hnu hi eng hun nge tih hi ngaiantuahna ka hmang thin a, ka sawi tak ang khan a hunlai zelin Pathian-in rolreltu min pe a ni, kan mamawh ang zelin. Tunah chuan Pu Zoramthanga kaihhruai sawrkar hi min pe tlat, kan hnial thei miah lo. Engvang nge he hun khirh tak hmachhawn tur hian ani hi Pathian-in ama hnenah hian hriak a thih tlat a ni. Inthlan hmate chuan ‘MNF nilo, Congress nilo’ tiin kan au a ni, nasa takin khawpuiah pawh thingtlangah pawh kan au a, sawrkar turte pawh an inrinsiak nasa a. Amaherawhchu Pathian thil tum chu vawiina mipuiin a thlantlin, he MNF sawrkar hi a ni tlat a ni. Chu sawrkar chuan engnge a tih kan tih chuan, vawiina kan sawi tak Covid-19 lo chhuak tur do tur leh he huna mipuite kan himna tur, he harsatna atanga min hruai chhuak tur hian he sawrkar hi Pathian-in min lo dah reng a ni. MLA te, Minister te, kan pu ber tan pawh a lu hai thlak ang tih ka ring, ‘ava hrehawm tak em’ tih tur hi a tam em em ang tih ka ring a, kan phur a rit a ni, he sawrkar hi a phur a rit em em a ni. Hmasawnna pawh duh anga kal theiloin kan awm a ni, mahse Pathianin he hun atan hian a ruat miau si a, tlanchhiat theih a ni tlat si lo, chutiang tak chuan Pathian duh danin he sawrkar chu langtlangin a kal a, he hri dona kawngah pawh kan Chief Minister te, Health Minister te, Pu Thiama te, doctor leh nurse rual te leh sawrkar official zawng zawng te’n tan an la a, mipuiin an neih sum ui lovin an rawn thawhkhawm ruih ruih a, sawrkar hnathawkin an thawhkhawm ruih ruih a, tin, MLA tam zawkte pawhin an thawhkhawm a ni. Chutiang hmang chuan he dona leh a hmanrua tul ang te lang tlangin an han hmang ta a, Pathian-in mal a sawm a, vawiinah chuan India ramah a ti tha ber kan ni tih hi kan sawi lo thei lo, a tehna leh inelna chu awm lo, amaherawhchu state dang chanchin te kan ngaihthlak chuan a vanduai pawh kan tlem ber, hri vei pawh kan tlem ber, vawiinah pawh 10 hnuaiin hri kan vei a ni. Chung zawng zawng chu kan tanhona, kan thawhkhona rah a ni a, chu chu Pathianin mal a sawm a ni. Thingtlangah pawh zankhawtai rek thlengin an duty tlaivar a, VLTF te an hah em em, NGO te an hah em em a ni, an khuaah hri lo lut tur vengin chutiang chuan tan an la a ni. Sawrkar thu leh hlate ngaichangin, ngaipawimawhin, tih tur leh tih loh turte an ngaipawimawh a, kan tanrualna, sawrkar, NGO-te leh kohhran -te kan tanrualna rah chu Pathian-in mal a sawm ta a. Vawiinah chuan kan rilru pawh a hahdam deuh a, inkhawm thei turte pawhin hun kan han nei thei dawn ta a, kar khatah zan 2 Pathian biak inkhawm te kan nei thei dawn ta hi a lawmawm em em a ni. Hengte hi Pathian malsawmna a ni. Tuvang bik emaw bik kha a ni chuang lo, kan vaia kan tanrualna hi Pathiain mal a sawm a ni e.

Chuvang chuan, vawiina kan thusawi Resolution, “hripui dona tura tan laknaah hian nasa lehzuala tanho chhunzawm zel a tha kan ti,” tih lai hi a pawimawh lutuk, hei hi ala tawp mai dawn lo. India ram pawnte kan thlir chuan hri a leng nasa leh em em a, India ram chhungah ngei pawh a lo hluar leh ta a, keini ram pawh hi kan la inven a ngai nasa dawn a ni. Mi thenkhatin, ‘zai an phal leh lo’ tia vui hmuite pawh a awm, a dik khawp mai, zai te pawh hi a chakawm em em a ni (**Dy. SPEAKER: I hun a tawp e.**) Amaherawhchu kan zai avang hian harsatna lo thleng thei a awm avangin tuna kan fimkhur hian nakina kan zai leh theihna tur, kan zai reng theihna tur a ni tih hriain tuna kan zai loh hi a pawimawh a ni. Kan mipuite pawhin lo tuar hram hram ula, kan la zai dawn chauh, bang lovin van thlengin kan la zai dawn a ni tih kha ka sawi theih ni rawh se. Ka lawm e.

DEPUTY SPEAKER : Kan inkoh leh hmain kan hriat hrim hrimah, Member zahawm takte dar 4 hi kan bang hun thin kha a ni a, dar 3 leh tih vel atang chuan Motion neitute, tin, a changtu Minister te leh kan House Leader zahawm tak te kan sawm chhuah kha a ngaih dawn avangin, kan insawm danah khan kan lo sawi hmanlo anih pawhin kan inhriathiam deuh te pawh kha a tha awm mang e tih kha ngaiantuahnaah a awm deuh a, chu chu member zahawm tak ten hre tlang ila a tha awm e.

Tunah chuan Member zahawm tak Pu Lalrintluanga Sailo kan sawm ang a, a niin sawi hnu hian Dr. K. Pachhunga, Member zahawm takin a rawn zui dawn

PU LALRINTLUANGA SAILO: Pu Speaker, ka lawm e. Private Resolution, Pu Biakzaua, Lawnglai East bialtu zahawm takin he House zahawm taka a rawn put luh, “*Covid-19 hripui leng do kawngah sawrkar, kohhran, tlawmngai pawl leh Zoram mipuite tanrualna avanga India rama ti tha ber state zinga Mizoram kan tel hi a lawmawm kan ti a. He hripui dona kawngah NASA lehzuala tan ho chhunzawm zel a tha kan ti*” tih hi Resolution tha tak niin ka hria a, vawiin hian ka thlawp a ni tih ka sawi duh a.

Heng Covid-19 hripuiin khawvel pumpui min tuam a, kan ramah a ti thaber han tia sawi theih tur khawpa hmalakna tha kan neih chhan chu thildang niin Pu Dy. Speaker, ka hre lo a. A hun taka thutlukna siam thin Chief Minister zahawm tak kaihhruai sawrkar-in a hun tak mai a thutlukna a siam avanga national lockdown te pawh an neih hmaa lo nei advance khawpa sawrkarin hma a la kha a bul tanna kan ti tha a,a tawpah kan zo tha a ni ti ang zawngin ka ngaiantuahnaah a awm a ni tih ka rawn sawi duh a. Chutih rual chuan, a hun laiin mangan thlakin lang hle mahsela, kan hla thuin, “lawmna tak mai ka nei,” a tih ang deuh hlek kha a niin ka hria a. Amaherawhchu vawiinah hian lawmna chang la hre lo deuh te kan awm em aw tiin ka ngaiantuahnaah a awm a ni tih ka sawi duh a.

Tin, Private Resolution hi vawiinah hian a tha hi ka ti hrim hrim mai a, a chhan chu Referral Hospital te pawh i vei lama mi thenkhat khan an sawi a, Pu Dy. Speaker, MNF Ministry Pu Zoramthanga kaihhruai hmasa lo dingah helaia i vei lama Opposition Group Leader pawh i thutnaa a thut lai ngeiin he Private Resolution 1992-93 chhoa Pu Zoramthanga kaihhruai MNF opposition-a an thutlaia vawiina kan Health Minister zahawm tak Dr. R. Lalthangiana putluh Congress Ministry-in a lo passed sak tak, 1998-a Pu Zoramthanga Ministry lo dingina he Referral Hospital hi a lo din a ni. Hre lo tawkte an awmin ka hria a, khatiang daih atang khan Covid dona atan hian Pathian-in hma alo hruai zawk a ni MNF hruaitute hi, tih hi a lang chiang a ni. Sawrkar tih that ai mahin mipuite tih that niin ka hria tih te khan an han tarlang a, thutlukna dikah hi chuan mipuiin thu kan awih mai a ni tih hi he House zahawm tak hian kan hriat nawn a thain ka hria. Sawrkar kal tain Zu zawrh a puan khan mipuiin thu kan awih em tihte kha kan ngaiantuah nawn a tha lawm tih te kha ka sawi duh a, Member zahawm tak Palak bialtu pawh kha lo inngaiantuah nawn sela tih kha ka han sawi kher a ni. Thutlukna dikloah hi chuan mipuiin thu an awi lova, chu thutlukna diklo siamtu chu nasa takin an paihthla thin a ni tih hi nasa takin alang chiang

hlein ka hria. Chuvangin, thutlukna tha hi chu mipuiin an zui a, Covid hriin min tuam lai pawha harsatna NASA tak tawk lova, “Inpekna kimah lawm a kim thin” ti ang deuha kan hotute inpekna kim tak avang khan mipuiin lawmthu kan sawi ta hial a ni tih te kan ngaihtuah a tha hlein ka hria.

A dawt leh ah chuan hripui dona kawnga tha taka kan tih chhohna chhan chu kan Chief Minister zahawm tak remruatna atanga Sawrkar, Kohhran, Tlawmngai Pawlte thawh hona a that vang a ni tih hi hai rual a nilo a ni.

A dawt lehah chuan, he hripuiin kan ram a lo luh hma atanga inrin lawkna dar a lo vua kha sawi hmaih chiah ka ngai lo a ni. Tin, hrileng dona atana hma la thin Health Department leh Police ho, a thim a var pawh thlu lova hma la thinte vang a ni tih hi ka tarlang duh a. Tin, kohhran pawl ho sawrkar-in thutlukna dik a siam avanga vawiin thlenga zai chak em em hmui insum thei khawpa kohhran pawl hrang hrang ten an member-te tan lak vang a ni tih te hi sawi loh phal chi ni lovin ka hria a ni. Tin, tlawmngai pawl pawhin sawrkar thu an awih a, hmalakna hrang hrangah hma hruaitu niin ram mipuite thlamuanin tan an la a ni tih kha ka sawi duh bawk a.

Kan Chief Minister kha vawiinah tarlan leh thani ka hria a, hripui a lo luh khan kan hruaitupa hian engtin nge a sawi tih kan ngaihtuah nawn a thani ka hria. Pakhatnaah chuan “Covid-19 avang hian mizo mipuite an thih kan remti lo” tiin challenge a siam a ni. A pahnihnaah chuan, “tunah Covid-19 hi Mizoram dung leh vangah pawh hian NASA takin lo leng pawh nisela ei leh bar tur kan tlachham tur a ni lo” tih principle neiin he sawrkar leh he ram hi a hruai a ni. A pathumna ah chuan, “Covid-19 hi NASA leh zual pawhin lo thleng sela electricity leh tui in tur thianghlim kan tlachham tur a ni lo” tih ang tiatin kan ram min hruai a ni. Thildang development te chu ramdang sawrkar pawhin an mal mak vek a ni. Chuvangin hnam din khawchhuahna chiah kha kan leader hian a ngaihpawimawh a, chumi avang chu a ni tih kha kan hriat tel pawh a thani ka hria a ni.

Vawiinah hian thenkhatin “A hun a vanduai a ni, a hun hma sa lamah tampui mithi a hmachhawn a, tunah kan hriat ngailoh hripuiin a sawrkar hi a rawn sawp leh a ni” te an ti a. Hei hi a nilo tih hi vawiinah hian ka sawi duh a ni, Tampui mithi hmachhawn tura sawrkar Pathian-in a lo ruat kha amah hi a ni, chhuan chham pakhatmah awm lovin ram mipuite min hruai tlang a ni. Tunah pawh Covid vanga harsatna lutuk kan tawrh theihloh khawp kan tawrh phal lova min hruai chhuaktu a ni tih hi kan hriat a tha a ni. Chuti ni lova sawrkar hmasa anga rui deuh, harh fim mang lo chungin kil tinah zu an zuar bawk si a, khatiang khan Covid-19 hi han hmachhawn ta ila chu kan tlu hlum NASA awm mang e, tih te ka ngaihtuahnaah a lian hle a ni. Chuvang chuan vawiinah hian kan vannei bik hle a ni, hruaitu tha chu Pathian-in mal a sawm thin, Israel hun lai pawhin kan hria, *a hun taka che thin* leader kan nei hi a ropui ka ti a ni.

Nizan TV te kan en a ropui ka ti hle mai; Youtube te, Facebook lam te ka han en a, kei mithiamlo pawh ni ila, ka ngaihtuahna mittui tla khawpin min sawr chhuak a ni. Pu Deputy Speaker, nizan Youtube-a mi kha i remtihnaing ka han han tarlang duh a, Myanmar chhunga zohnahthlakte leh zofate manganga awm authawm kan House Leader-ina, “kan lo welcome e, kan lo enkawl ang” a tih kha an thlamuan pui zia a lo lang chhuak ta a, Tahan an kawngzawhnaah te an flag card-a thu inziak chu, “Thank you, Chief Minister of Mizoram State, Pu Zoramthanga, Leader of India” tih te, “Thanks, Pu Zoram, for standing with the people of Myanmar. May the Lord bless you abundantly” tih te a ni. A ropui ka ti, hetiang leader chhuanawm kan nei hi. Vawiinah kan ngaihtuahna tak tak sengin he private resolution hi kan ngaihtuah a ngaiin ka hria. Hun hmasa lama ka sawi tawh angin, thihna ruama ta kan leader hian min hruai chhuak a, nunnaah kan lut ta a ni. Kan chhak lama zohnathlakte pawh a ni tho mai, thlamuan an ngaih lai ngawih ngawihin kan leader-in a thlamuan a, khawvel hriatin lawmthu an sawi a ni lawm ni. Hetiang leader tunge kan neih tawh tih hi i ngaihtuah nawn ang u, tiin uar takin ka sawi duh a.

Chuvangin, “Hripui leng dona kawngah sawrkar, tlawmngai pawl te leh zoram mipuite tan rualna avanga India rama state ti tha berte zingah Mizoram kan tel hi a lawmawm kan ti a, he hripui dona kawngah nasa leh zuala tanho zel a tha kan ti” tih resolution hi pass ngei turin ka thlawp a ni e. Ka lawm e.

DEPUTY SPEAKER : Awle, tunah chuan Dr. K. Pachhunga ka sawm ang a, a sawi zawh hian Member zahawm tak Dr. Vanlalthlana a lo inring dawn nia.

Dr. K. PACHHUNGA : Pu Dy Speaker, ka lawm e. Member zahawm tak Pu Biakzaua resolution, Pu Dy Speaker, i remtihnaing ka chhiar chhuak lo mai ang a. Member duhawm leh zahawm tak tak ten an sawi tawh ang khan kan resolution hi tha ka ti hle mai a, pass ngei pawh thain ka hria. Kan hriat angin novel corona virus a ni a. ‘novel’ han tih hrim hrim hi la awm ngai miah lo, bacteria/virus la awm ngai miah lo tihna a ni a, chuvang chuan khawvel a barakhiah a, han indem vak tur pawh awmin ka hrelo. Sawrkar hmasa a ni emaw tun sawrkar a ni emaw engkim mai kha la awm ngai lo kan han tawng that kha a ni a. Ka tehkhin ber chu, in a kang that kha a, a thelh turin thelh dan lo zir lawk chu a awm a mahse a kang dawn tih kan hrelo a, In neitupain a nupui fanau te an kan hlum hlauin theihtawp a chhuah a, a thiam dan danin a thelh a, chutih lai chuan a thelh fai ang tih hlau ni awm taka tute’n emaw an hawl nung reng hi chu ram hruaitu tan kei chu ka thlang lo tawp a ni. Mi pangngai chuan vawiin a Zoram mipuite covid dona kawnga kan chet lak hi tha an ti a an sawisel ngai lo a ni. Kan hlawhtlinna zawng zawng hi Pathian vang a ni a, chawimawina, ropuina chu Pathian kutah a ni a, a hmanruah Mizoram/MNF sawrkar a lo ding hi a ropui ka ti a, Pathianin a hun takah ram hruaitu min pe niin ka hria.

Thli pakhat han sawi peng lawk i la. Party pakhat hruaitu chuan, ‘keini party chu hun harsa leh hun khirhahte min thukru’ a ti a, ram mipuite thlabara an awm laia hruaitu han

thuhruk te chu, keini chu Mizoram leh mipuite an thih ai chuan ti in MNF chu kan ding a ni tih kha he House member zahawm takte hian min hriatpui ka duh a ni.

Tin, medical science-ah medical facility-ah kan hria, kan ram doctor-te an thiam em em a, nursing te phei chu international quality a ni, a chhan chu kan nurse te tlawnmgaihna leh hmangaihna nen, ‘pleasant looks’ an ti a, an hmel hmuh a nuam a, an international a ni kan medical doctor te pawh. Nimahse kan ram medical diagnostic, natna hrik zawn chhuahna kawngah khawl kan nei chau em em a. Kan sawi tak tak dawn anih chuan 2014-ah tute nge sorkar le? ICMR atangin Mizoram-ah medical science hmanga natna hrik zawn chhuahna khawl leina tur vaibelchhe 6 an rawn pe a, vaibelchhe 2 installment an tih chingpen avanga pek zui loh te kha Pu Dy Speaker, a tul chuan House Property-ah ka la rawn dah dawn nia. Tute nge kan tih chuan, anih leh Bio-safety Level-3 lab kan neilo chuti khati kan ti maw, ZMC-a vawiina kan hman hi Pathian-in a lo ruahman niin ka ngai a, a chhanchu, Mizoram University a bio-technology research mithiamte leh ZMC professor mithiam te’n project an nei a, University project hi state govt. leh party hming that nan kan sawi ngai lo reng reng, kei ngei pawh hi ka thawk ve nual tawh, chuvang chuan kha kha inpuhmawhna leh insawitheihna turah ka ngai lova. Chutih lai chuan kan sawrkarin theihtawp a chhuah a, tunah kan nei tawh tih te pawh kan ngaithla tawh a.

Tin, kan hotute’n awmlo a ta, kan hriat angin vai ramah hri a leng a, min hnaih tual tual a, sakei chuan kan ram a rawn lut dawn a, kan Chief Minister leh kan hotute an lu a hai a, ram mipuite vengin mutmu pawh an tuah lo a ni. Chutih lai chuan, ‘engmah kan nei si lova’ tiin core committee kan CM/Health Minister te ruahmannna in din a ni a. Mithiam bikte sawm an ni a, health lama kan hotute Prof. Mawitea ngei pawh, University mithiam a ni a, a ni pawh a tel a ni. Chutiang chuan ruahmannna awmlo ata, a hmanrua hawh chawpin chu lab-ah chuan, lab. a awm tih pawh kan hrelo reng reng a ni. Mahse, Pathianin a lo ruahman lawk vek a, a la zo lo, hnawhsarumin hnatleng in sawekarin a buatsaih a. Chutih lai chuan, a khawl pawh chu awm teh reng se tu nge handle/khawih thiam? Pathianin nula fel tak mai Australia atanga Ph. D zir zo chiah alo dah kha kan zawng chhuak a, tichuan sawrkarin hmun dangah training te tirin kan handle thei a ni. Anih leh, eng harsatna nge kan tawh chiah kan hrelo mai thei a. Thisen sample exam tur khan Kolkata ah thawn a ngai a, sample pakhat thawnna man a to a ni. Airport an lo lockdown leh a, a luhai thlak a ni. Covid hrik sample exam-na turin Silchar-ah tlanpui a ngai a, pakhat man pawh a to a ni. Chuvang chuan, kan hotute’n tih tak zeta an ngaiantuah hnuin, hawh khawmin, tin, kan CM-in a tul hun hriain sum neih ang ang te pein kan thawh ho vek a. Mihrang hrangte pawhin an thawh khawm a, rawn donate-te pawh an awm a, a lawmawm a ni. A khawlte chu neiin vawiinah hlawhtlinna ropui tak kan nei a ni.

Kan thawktute inpekna sawi hmaih rual a ni lo. Medical-a kan hotute a te ber atanga a lian ber thlengin, a frontline-ah kan police te, LTF te, kohran leh NGO te, mitin an fakawm tak zet a. Kan him nan theihtawp kan chhuah a, a ropui a ni. Kan thiante hmun dang danga mi te pawhin kan thawm te lo hriain thawh ho na tha Mizoram-ah, khawvelah a awm an ring

lo a. Kan hming a thang a, zonun zemawi tlawmngaihna, christianna dik tak chu hun khirhah a rawn luang chhuak ta hi sawi chhiat phal chi a ni loin ka hria.

Thil dang, ramri issue-ah pawh hetiang hian thawk ho leh i la, ‘party, party’ ti lovin, insawisel mai lovin, natna khirh tak Covid leh HIV dona kawngah pawh theih tawpin he ram leh hnam chhan tur hian i thawk ho zel ang tih kha Pu Dy Speaker, he House zahawm takah hian ka sawi duh hrim hrim a. Tin, a hautak a ni tih pawh kan hria, mahni bial theuhah theih tawpin MLA-te pawhin kai kan hlau em em, nimahsela kan mite avangin a hlauhawm vanglai ber pawhin kan bial theuhah kan kala, kan theih ang angin VLTF te kan neih ang angin, a thenin eitur te an pe a, a thenin sum te kan pe a, duty-te tlaivarin mahni ramrite lut leh chhuak kan veng a, kan thawh hona a ropui takzet a ni. Ram hruaitu pangngai leh eng party pawh ni ila, lawmthu sawi tur bak a awmin ka hre lo va. Mimal ang pawhin pawisa tam tak an pe a, sawrkar hnathawk association ang pawhin an pe bawk a. Thingtlang lamah lockdown laiin chawhmeh lei tur te pawh a awm lo va. Hei hi Aizawl lamah pawh kan hria a... (**Dy. SPEAKER:** *Minute khat i la nei e*) Thla tam tak lockdown a nih avangin a lu haithlak a, kan intodelh lohzia te hriain agriculture leh horticulture product lamah te pawh hian tanna nasa tan min pein ka hria a, harsatna karah hlawnate pawh a awm ve a ni. He ram leh hnam hi a rawn ding chhuak leh turah pawh ka ngai a, ka beisei bawk a ni.

Lockdown laia ei tur kan neihloh laiin Horticulture Minister, kan Chief Minister ni bawk hi Pathian-in finna a pe a, vegetables *supply chain* kan han nei te kha a ropui takzet a, tih leh zel pawh a chakawm a ni. Tin, thingtlang khaw thenkhatin veng thenkhat VLTF leh mipui tana an neih ang ang an rawn keng te kha khawvel dangah hian a awm ka ring lo reng reng a. Zo nun zemawi, Kristianna tha a rawn luang chhuak kha. (**Dy. SPEAKER:** *I hun a tawp a*) Pu Deputy Speaker, ka zo dawn e. He Covid hri kan dona kawngah hian kan sawrkar hotute leh kan Chief Minister zahawm tak kaihhruaina te, kan Health Minister leh Minister dang te, MLA te, NGO te, mipuite leh kohhrante thawhhonna leh Pathian mi te tawngtaina avanga vawiina hlawhtlinna kan nei hi a ropui ka ti a, he resolution hi pass ngei ni se ka duh a ni. Tin, fimkhur taka inveng chho zelin, sawrkar-in SOP a tih te pawh zawm zel turin mipuite ka ngen tel bawk a ni e. Ka lawm e.

DEPUTY SPEAKER : Ka lawm e. Tunah chuan, Member zahawm tak Dr. Vanlalthlana ka sawm ang a, Aniin a sawi zawh hian Pu Lalrindika Ralte, Member zahawm tak a lo inring dawn nia.

DR. VANLALTHLANA : Pu Deputy Speaker, ka lawm e. Vawiina kan resolution hi sawi tur a tam khawp mai a. A hmasain khami kan hun tawn lai vela ka rilru kaptu tlem ka han sawi lang ang a.

Kan resolution hi a tha viau a. Amaherawhchu, hripui kan tawh laiin sawrkar hnathawkte pawhin hlawh kan lak that theih loh laiin Village Council leh Local Council inthlan tur engto vang nge ni, kan workers te inhlawhna tur estimate sang tak tak kan siam

a, restricted tender te kan han inpe kha chu a hrehawm chu ka lo ti deuh a. Kei hi a sum lampang kheuh peih deuh chi ka ni a. Hripui do laiin, tan ho a hun em em laiin, inhekna avangin rilru pawh mumal hleithei lovin kan awm te a ngai a. Khang khan rilru chu a ti hrehawm viau a. A bak chu ka sawi belh tawh lo ang a.

Vawiin hian ka ding lam leh vei lama mi te'n mahni an infak siak a, lehlam an han sawisel leh a. Kei chuan ka bial chhunga tawn hriat ka neih leh a state ang te pawha ka tawn hriata lawmthu sawina tur ka neih ho hi lawmthu han sawi a tulin ka hria a.

A hmasa berah chuan Kan Chief Minister kaihhruaina hnuaih, kan Minister te, a bik takin Pu Thangtea te, Pu Thiamsanga, Pu Ruatkima te, Pu Sangtea te, Pu Rintea te hi an pawimawh lehzualin ka hria a. Kan medical lam te, kan police te, VLTF, Local Task Force te, phai lama kan Mizoram House enkawltute, Central Service lama Mizo Officer kan neih te leh kan lam sen loh tam tak te pawh, kan thawhhona hi a ropui ka ti a, kan hmazawn theuhah theihtawpin hma kan lain ka hria a, a lawmawm ka ti khawp mai.

March Ni 22, 2020 ah lockdown a intan a, mipui kan chiai a, ei tur te kan nei lo a, kan mangang hle a. Hand Sanitizer lei mai tur te a lo awm lova, MN Enterprise neitu, Pi Manuni ka han be tawp a. Nuai 16 man vel kha a bain ka han la tawp mai a....

DEPUTY SPEAKER : Chair kan lo inthlak lawk ang e.
(Speaker-in Chair a la)

SPEAKER : Awle, sawi zawm rawh le.

DR. VANLALTHLANA : Tin, Govt. Zirtiri Residential Science College Principal te, Department of Chemistry-a thawktute leh zirtirte dangte leh RIPANS lam te chu tangrualin, hand sanitizer siam hna an hawk ta a. Ramhlun South YMA lam pawhin a tul ang pu kual tur tlangval chak tha tak tak an rawn tir bawk a. Heng mite puihna hian WHO-in hand sanitizer siam dan tur atih ang thlapin hand sanitizer litre 2,000 bawr vel kan han siam a, hlep pawh awm lovin litre 515 kha sawrkarah kan bialin kan va supply ve a ni tih kha ka han sawi duh a, anni hnenah hian lawmthu ka sawi duh a ni.

Tin, mask vuah tur a lo vang leh a, a rawn thleng thei bawk si lo va. Pu Vanramchhuangi, ‘Ruatfela Nu’ tia kan hriat hi a industry atangin hand-made bag siamma material kha phur chho turin kan innen a, rang takin kan la chho a. Zirtiri College-a Home Science Department zirtirtute hnenah Tlangnuam atangin theih ang angin a material hi kan insem a, anni hian an lo thui a, chung an thil thuite chu bial chhungah Task Force-te semin, State Medical Task Force lamte pawhin ramri-ah te kengin, kan bial chhung leh bial pawnna police duty-te pawh a theih ang angin kan lo pe ve a. Tin, Ramhlun Vengtharah hian tlawmngai pawl an in din a, chung ho chuan a free-in mask min lo thuisak a, an chungah hian ka lawm takzet a, lawmthu ka sawi a ni.

Tin, Covid-19 vangin eizawnnaa buai leh harsa an awm a. Open Doors (NGO) te nen hma kan han la a. Mask thuina tur puan kha Self-help Group hnenah kan sem a, chu chu Self-help Group inhlawm khawmna Federation-Zonunmawi te, Ramhlun Vengthar, Ramhlun South, Ramhlun Sporting Club te bakah Ramthar North lama Self-help Group ho te kha kan han pe ve bawk a. Nuai khat man vel kha MLA fund hmangin ka leisak a, zan ruah sur hnuiah elastic te pawh va zawngin Pu R. Dara-te pawh an inah len chilhin an dawr te kan va hawntir bawk a. Chutiang chuan kan han ti a, min puitu Open Doors (NGO) te, ALF (Federation) hruaitute chungah lawmthu ka sawi bawk a ni. Tin, thlai eitur kan han nei lo a, thlai chi theih ang angin kan han la khawm a, thlai chi zuartute zanah an inah kan kal chilh a, dawr hawng turin kan in hruai chho a. Task Force-in an hria ang tih hlau deuh bawk siin theih ang ang, a tam thei ang ber kan lei a. Bial chhung Task Force-te kaltlang in kan sem a. Lockdown lai te anih avangin a rukin kan gate-ah feren antam te, maian te, thil chi hrang hrang min rawn thar tema a lawmawm duh khawp mai. Phal taka thlai chi min leitirtute leh Task Force ten awmze nei tak leh zau zawka min han sem sak te kha lawmawm ka ti a. Intodelh pawimawh zia kan zir chho zel niin ka hria a, a lawmawm ka ti a.

Tin, bial chhung application ka buaipui laiin sawrkarin a lo buaipui tih min hrilh lehchawng a, Engineer-in. Sawrkarin a buaipui kha Google Play-in a lo reject tih kha min hrilh a, Google-ah hmelihriat ka lo nei hlauh mai a, a hming sawi lan a duh lo a, kha nula fel tak mai khan min nawrchhuah sak a. Minister pawh hrilh suh ka ti a, a hre deuh chauh mai thei, tikhan ani khan lehlam atangin a rawn ti a. Weekend-ah pawh thawk ngai lo khan Pathianni-ah kan thil mamawh ang zawng zawng ICT atangin min rawn thawn a. Chutiang chuan ani khan alo buaipui char char mai a, a chungah lawmthu ka sawi duh a ni. Tin, ka bial chhungah sown ‘Te-a’ kan ti mai a, a ni hi Innovator-a ni a. UV Sterilizing Vehicle tih hi ka rilru-ah a awm ve thin a, khulamah Philips-te kan bia a, an rawn thawn thei turah kan ngai a. A khawl nen kan buaipui a, amaherawhchu a rawn thleng thei lo a, heliaih, local-a kan hmuu theih ang ang kan han ti ve a, ZMC-ah te, khatianga boruak tih thianghlimna kha Te-a zarah kan va pe ve thei a, bial chhung hmingin kan va hlan nghe nghe a ni. A chungah ka lawm takzet mai.

ZMC Covid Testing Laboratory siamnaah sown kan Minister zahawm tak mai Dr. Thangtea hian, “Mathlan, Prof. Mawitea te nen hma lo la teh u”, a ti a. Opposition MLA pawh ring ngamin tikhan a rawn ti kha a ropui ka ti a. Whastapps Group siamin kan han ti ho a, Pu Mawitea, Pu Pachhunga leh Pu Thangmawia te ho nen kan ti a. An sawi ang khan thla khat chhunga report pe tur kha ni sawm chhungin laboratory kan nei kha a ropui ka ti a. Khata inh mang, sawrkar official te kha chu sawrkar hnathawk ni ta mai se la, kan mithiamte Prof. Tapan Kumar Datta, Vety College kan ti mai ang a Prof. Sentir Kumar-te, Dr, Vanramliana, Pu Hlenmawia RIPANS lam te, Christy-i te an thawh hlawk em em mai a. Tin, ZMC lam a an doctor-te, kan bial chhung a mi lo kai palh awm se kan va phone lawng lawng a, ‘test a ngai, chu chu tih a ngai’ kan ti a, kan bia a. Kan bialah chuan CMO (East) lampang an ni a, henghote kan han be bawrh bawrh a, zan dar sawm pahnihah te kan

phone a. An niin zo takin min lo chhang a min lo dawl bawk a, an chungah lawmthu ka sawi duh bawk a ni.

Tichuan, a pawimawh ber te pawh a ni chho ang a, bial pawn atangin ka bial chhung Aizawl North-II huam chhunga Task Force (veng) te a thlawnin chawhmeh min lo pe a, an vaiin ka sawi seng lo a, sawi kimloh palh ka hlau bawk si a, an chungah ka lawm takzet a ni tih ka sawi duh a. Tin, Aizawl North-II ah sawn veng hrang hrang kan awm a, Task Force member inpe tak tak hri kai pawh huam, a then phei chuan an kai a, mahni chhungte bulah pawh awm tha hleithei loin kimki taka awm ngai leh eizawnna aia an duty dah pawimawhte an awm a. Taxi service ngai, thil tih ngai a awm a, lock down an phelh pawhin an duty ngat ngat mai a, kan Task Force member-te inchungah ka lawm takzet a ni tih he House kaltlang hian ka bial mipuite chungah lawmthu ka sawi a. In inpekna avang hian mipuite kan him phah a, *Zahna Chibai* ka buk che u a ni.

A tawp berah chuan Pathian kaihuaina hnuaiah kan sawrkar hmalakna te, MLA leh sawrkar hnathawkte, VLTF/Local Task Force te leh mitlawmngai tam tak te inpekna a ropui ka ti a, inchungah ka lawm takzet a ni tih kha ka sawi duh a. He resolution hi rirluna deuh chung siin, mit siai deuh chung siin, tanho ngaihlaia kan tanho loh lai awm zeuhin, rirlu ti hrehawm bawk siin ‘ka pawmpui e’ tih kha ka sawi duh a ni e.

SPEAKER : Awle, tu nge sawi leh ang? In sawi hmain ka han sawi lawk ang a, tun kar tluanin Pathian zarah tluang deuhin kan ti a, in hah viau mai a. Private Members’ Resolution hi dar li pelh ngai loh a ni tlangpui a, a Minister-te, a move-tute, House Leader-te sawi an awm bawk ang a. A hma khanin whip ta ila chu, sawikhawm ila chu, ‘helam atangin chuti zat in sawi ila, khalam atangin chuti zat in’ te pawh a tih theih ang a. Amaherawhchu Member-te zalenna a ni a, ‘i pel hret ang aw’ tih pawhin, kha chu i ti phawt ang. Pu Lalrindika Ralte, member zahawm tak ka sawm e.

PU LALRINDIKA RALTE : Pu Speaker, ka lawm e. Vawiina kan Private Members’ Resolution hi dukhawp lohna pakhat ka nei tih mai loh chu a tha khawpin ka hria a. Member thenkhat ten an sawi tawh a, telh thei ila ka duh chu, tunah hian Bairabi-ah khuan Rail lian a lo lut thei a, khu khu sawrkar hmasain hma a lo lakna niin kan hmang tangkai em em mai a. Tin, MIMER sawn sawtiang dinhmun saw sawrkar hmasa khan lo thlen lo se kan buai dan turte ka ngaiantuahin sawrkar hmasa kha telh theih ni se tih ka duhthusamah a awm a, chu chu ka sawi hmasa duh a ni.

Pu Speaker, a lawmawm khawpin ka hria a, Mizo te hi Kristian kan ni a, Kristian kan nihna hi a lang ngei tur pawh a ni a, kan danglam ngei tur pawh a niin ka hria a. Ziaktu pakhatin a tih chu, “Kristian ti Kristian tu chu a thluaka theology ni loin, a thinlunga hmangaihna hi a ni” a ti a, chu chu a dikin ka hria a. Hmangaihna hi Kristiante ti Kristian tu a ni a, chu hmangaihna ngei chu kan ti langin ka hria a. Pathian hnenah pawh lawmthu kan sawi hi a ngaiin ka hria a ni. Kan hriat angin Mizoram chu nunna chan pawh kan tam lova,

heng zawng zawng hi Pathian avang a ni tih hre tho mah ila, kan hriat nawn leh hi a tul ka ti a ni.

Ka sawi leh duh pakhat chu, ka bial khu inter state boundary a ni a, Tripura leh Assam ramri a ni a. Kan bialah hian YMA group hniih, Taitesena Group, YMA leh Langkaih Group, YMA a awm a. YMA member leh hruiitute an hah em em mai a, bial dung tluan khuan ramri a ni mai a, chuvang chuan indaihloh pawh ana a, an riah chilh a, an hah em em a, nasa takin, theih ang tawkin kan bei ve a ni. Chungah chuan ka bial mipuite chungah hian he House zahawm tak kaltlang hian lawmthu ka sawi a. MLA ka nihna angin an duh ang tawkin ka che chhuak theilo tih ka inhria a, chutih laiin an niin theihtawp an chhuah avangin khulai tlangdung kan hming a mawi phah a, an chungah lawmthu ka sawi a ni.

Harsatna han tawh kher loh hi chuan mihring zia tak tak hi a lanchhuah lohna chen pawh a awm a, “nun tak tak hi chu harsatna hian a rawn tlangzarh thin a ni” te pawh an lo ti a. Chuvang chuan, khang kan harsatna tawh khan kan Kristianna te, keimahnia hmangaihna awmte a rawn tur chhuak a, chu chu kan in share tlang a, kan inhmgaih tawnna kha Pathian pawhin mal a sawm niin ka hria a, Covid-19 tuar nep ber pawlah kan tang hi a lawmawm ka ti hle a ni.

Tin, vantlang ina kan hriat lemloh mimal thawh hlawk tak tak an awm ka ring a, chungte pawh chu Pathianin a hrereng ang tih ka ring a, an inpekna te chhunzawm zela, harsatna leh manganna kan tawk leh anih pawhin mimalte pawh hian kan theih ang tawka kan mihring puite tana inpek zel hi kan uar pawh thain ka hria a. Chutiang tur pawh chuan infuih ila. Tin, chutiang atana Pathian-in a siam leh a din mihring kan ni tih hi kan hriatnawn a thain ka hria a ni. Pu Speaker, ka lawm e.

SPEAKER : A inziak saah hian Pu Zothantluanga a inti a, tunah i lo sawm ang.

PU ZOTHANTLUANGA : Pu Speaker, ka lawm e. Kan Private Member Resolution hi a tha hle mai a, ka chhiarchhuak kher loving a. Covid-19 hripui lengah kan state sorkar hi a che tha hle mai a. Tunhmaa la awm ngai lo anih avangin lo inven dan tur te, hmalak dan tur te ruahman sa awm lovin kan Chief Minister zahawm tak kaihruainain rang takin China atanga alo len tan a, alo darh atang khan hmalak a ni a. Mizo zawng zawng huapin kan Chief Minister-in phungbawm a sawm a, MKHC te, NGO hrang hrang te, Mizo zawng zawng huap phungbawm sawma kan kalpui te hi a malsawm kan dawnna a ni tih hi a langin ka hria a ni.

He hri donaah hian sawrkar hi fakloh theihloh niin ka hria a, a inbuatsaihna te, a remhriatna te leh Pathian rawn chunga kan Chief Minister kaihruaina avanga tun hi thleng kan niin ka hria. A dawt lehah chuan Kohhran ho te, NGO te, veng tinah LLTF te leh VLTF te dingin, chung chuan kan thiam danin Covid-19 do turin hma kan la a, hri dona

kawngah kan ti tha takzet a ni. Tin, sawrkar hnathawk zingah pawh a hotupa ber Chief Secretary hovin State Level Task Force te din a ni a, sawrkar hnathawk ho pawh nasa takin an tang a. Kan sawi tawh ang khan, he committee-ah hian Kohhran hruduit, NGO te an tel a. Tin, state-in sum leh paiah harsatna a nei dawn a ni tih hriain Chief Minister Relief Fund-a sum chhun luh lamah theih tawp kan chhuah a. Sawrkar hnathawk pawl hrang hrang te, NGO te, contractor te, mi haus a leh covid-19 dona atana thahnemngai hrang hrang te an rawn pen chhuak a. A hmanna lamah Chief Secretary leh NGO leh Kohhran hruduit kha a thu ber an nih avangin vawiina kan thusawi hrang hranga Chief Minister Relief Fund-a sum tlingkhawm hmannaah a hming putu kan Chief Minister te leh Minister dangte, MLA te tel ngai miah lova tha deuh maia an hmang te kha a ropuiin ka hria a. He bawma sum lut eirukna emaw, misappropriation emaw a awm miahlo a ni tih han hriat te hi a lawmawm ka ti a, a chhinchhiah tlak hlein ka hria a ni. Chu chu ka han sawi hmasa duh a ni.

Tichuan, sawrkar remhriatna ang zelin damdawi lam thiam Dr. Thiamsanga te kan nei a. Chu mite kaihhruduita chuan medical operational team-te insiamin zoram hmun hrang hrang an han fang kual a, kan inenkawlna kawnga kan mamawh leh kan tih tur awm chu an hre zel a. Chuvang chuan, anni team hi an tangkai hle mai a, thingtlangah te team anga zin a ni chungin damlo te an han enkawl a, an buaipui leh ang nawk nawk a. Chutiang chuan hah takin anni an che a, chu chuanin he hri do kawngah hian nasa takin state sawrkar a tanpui a ni tih kan hria. Tin, kan hriat theuh angin khawtin ah mahni hreawm leh hlawh pawh beisei lovin an theihna zawng zawngin village level task force te, local level task force ten hna an thawk a, hlawh an beisei lova, kha hripui covid laka kan him theihna tur atan khan kan thiam ang angin, kan hriat ang angin hna kan thawk a ni.

Chutih laia kan buai em em laiin Assam lampang te, election dawn avang ani ang chu kan ramri-ah min rawn tibuai reng bawk a, hripui kan do laiin kan supply kan ei leh bar lo luhna tur min dan chah an tum a, min rawn bei a, min rawn tibuai chungchangah te pawh hian state sawrkar te hi an fakawm em emin ka hria a. Tun hmaa kan tawlh thin te, state thenawm ina min rawn tihbuaia zuk counter tute kan tuar thin ang ni loin, vawiinah erawh chuan kan ram tizim zawng niloa, he buaina, hripui karah hian kan ram zauh zawngin vawiinah hian kan police force-te camp an la khuar reng a ni tih kan hria a. Heng kawngah te pawh hian kan police force-te ‘constable mai mai’ kan tihte pawh kha an lo tangkai em em a ni. Chuvang chuan, helaiah hian kan sawrkar-in covid hri dona kawnga a tih that rual rual hian ramri humhalh kawngah min tibuduitate laka tlawm lova, a hmatawng zawngah kan state ram tizau zawngah hma kan lakna hi chhinchhiah reng tlak niin ka hria a, chu chu kan sawi duh bawk a.

Tin, a *four front*-ah hnathawktu kan nei teuh mai. Ramri kha covid hri lo luhna ber te a ni dawna hriat avang khan chungah chuan kan duty nasa a. Health worker-te, healthcare lama kan mithiamte, tin, sawrkar hnathawkte mai bakah khatiang lampanga mithiam kan neih hrang hrang nurse te voluntary-in an inpe a, vawiin thlenga tam tak mai hlawh pawh

phut lo, tawrh pawh huama an inpekna te hi vawiinah hian lawmthu sawi kan bain ka hria a. Chu chu, a ropuina kan tih leh pakhat chu a ni a.

Tichuan, keini kha chu atir khan north-east-ah positive nei hmasa ber pawl kan nih avangin mipui khan theihpatawpa do kan duh a, kan inlungrual a, kan sawi tawh ang khan kohhran hoten kohhran an nihna angin tawngtai te, tv-a live crusade-te khatiang chi hrang hrang hmang khan kan rilru mangang te, kan hlauhna te, a reh theihna tur atan Pathian thu hmangin min chawm a. Chungte chu, kohhran thiltih that leh mipui pawhin kan zawm em em a niin ka hria a. Tin, Pu Speaker, a tawpna tak tak atan, legislature ang pawhin kan theihtawp kan chhuah theuhin ka hria a, kha hri avang khan kan mipui ten ei leh barah chaw an nghei ang tih kan hlau a, kan MLA fund te leh donation kan hmuh atang tein buhfai, tel, dal, alu, a remchang apiang kha sanitizer kan ti, mask kan ti, voluntary-a min siamsak tute khawtinah puanthuite kan han nei te leh engmah phut let nei lova kan tanrualna kha a ropui ka ti a. Hri kan vei a, mi engemaw zatin kan thihpui a, a pawi khawp mai. Amaherawhchu, he natna hri avang hian kan dona kawngah hian mizote kan inlungrual ber tum; tin, kan tlawmngaihna pawh a parchhuah nasat ber tum niin ka hria a, Mizote tan hian he hun alo ral hunah pawh hian nakin zelah kan la hriat reng tur hun niin ka hria a, kan tuarna te hi a malsawm kan dawnna tur niin ka hria a. Hetiang huna sawrkar tha tak mai Pathian ringtu Pu Zoramthanga sawrkar kan nei hi Mizoram kan vannei a. Mizo mipuite hian Pathian hnenah lawmthu kan sawi tur niin ka hria a, chu chu he private member resolution support pahin kan sawi duh a ni e. Pu Speaker, ka lawm e.

SPEAKER : Hei, Ruling lam 7-in an sawi tawh a, Opposition lam kha an phar muang deuh a, nichin khan. Kan hun kha adjust ila, mahse kan thu thu anih kha aw. Member zahawm tak Pu C. Lalsawivunga ka sawm e.

PU C. LALSAWIVUNGA : Pu Speaker, ka lawm e. Sawi thui lutuk tur awmin ka hre lova, vawiina resolution kan sawihoa hi “*Covid-19 hripui leng do kawnga sawrkar, kohhran, tlawmngai pawl leh zoram mipuite tanrualna avanga India rama ti tha ber state zinga Mizoram kan tel hi a lawmawm kan ti a,*” tih a ni phawt a. “*Hripui dona kawngah nasa lehzuala tan ho chhunzawm zel a tha kan ti*” tih a ni a. Vawiinah kan ramah he hripui avanga thihna tawk mi 10 awm mah sela, tun hun thlenga Pathian hruaina kan chang hi a ropui ka ti a, a lawmawm hle in ka hria a. Sawrkar a lo ding a, sawrkar a lo din chuan sawrkar chuan mipui himna tur te, mipuite thlamuanna te hi a tih tur ve hrim hrim a ni tih te pawh hi kan hriat tel a niin ka hria a, chumi atana hma an laknaah pawh kan lawm a, kan hlim tlang hle a ni tih kha a hmasain kan sawi duh a.

Tin, Pu Speaker, Govt. of India, central sawrkar chungah pawh hian lawmthu kan sawi a mamawhin ka hria a. Kan mamawh zawng zawng kan tana thil tul tur te min rawn pe a, vaccine a thlawna lak tur thlengin central-in min rawn pe a, kan tan a central inhawnna hi vawiinah hian lam rik a awm miah lo mai kha ka rilru tlemin a dam lo deuh hlek a.

Chuvangin, central zar kan zona leh kan chunga a thatna te hi kan lam chhuak turah ka ngai a.

Pu Speaker, keini hi chu Committee-ah pawh a engahmah kan tel ve loh avang khan sawi tur hi kan hre lo khawp mai a. Lawmthu han sawi vakna tur leh sawrkarin hmalakna a kalpui dan pawh kha han sawi dawn ila a engahmah khan kan tel ve loh avang khan sawi tur hi a vang khawp mai kan tan chuan. Amaherawhchu, chuti chung pawha ka sawi duh chu, Mizoram-in Chief Secretary fel tak kan nei a, kan CS hi a fakawm thlawtin ka hria a, an chungah he hripui dona kawngah pawh hian lawmthu hi a bik tak a sawi hi a than ka hria a. Tin, Health Department-a thawktute, Law and Order kengkawhtu Police lam te leh hetah Deputy Commissioner leh a naute ho zawng zawngte inpekna leh thawhrimna te hi a chhuanawm hlein ka hria a. Lawmthu ka sawi a.

Tin, ka rilruah tak phei chuan vawiinah hian Pathian hnena lawmthu sawina engatinge he House hian a rawt loh tih hi ka rilrua lian ber a ni, thildang zawng zawng aiin. Pathian vanga tun dinhmun hi thleng kan ni a, chuvangin Pathian hnena hian lawmthu hi kan sawi dawn lawm ni tih hi he resolution kan sawiho dawn atang khan ka rilrua lian ber a ni. Kohhran ho te, mimal ang pawhin 2020 kum kha a huho pawhin Pathian hnena tawngtaina kan hman tam ber kum, sawrkar tan pawh tawngtaina kan hman tam ber kum a niin ka ring a, chuvang chuan Pathian khawngaihna kan ram hian kan dawng a ni a.

Vawiin hian mihring hi a langsar lutuk a, Pathian hi a langsar miah lo hian ka hria a kan zingah hian, a pawi ka ti a, chu chu ka sawi duh a ni. Chuvangin kan zingah Pathian hi lo langsar ber se, keini hi a hmanrua kan ni tih pawh kha hre thar leh ila tih kha Pu Speaker, ka sawi duh a ni.

Chutih rual chuan ka bial bikah lawmthu sawina tawite han hman leh ka duh a. PPE leh mask ang te pawh a thlawnin an thui a, ZMC, Cancer Hospital, Civil Hospital leh hmun dangah te pawh kan bial atangin kan pe a, face shield thlengin a thlawnin kan siam a ni, thahnemngai takin. Khang a thawktu zawng zawngte leh kan bial ten khang an tih theihna tur atana hmanraw rawn tumtu zawng zawngte chungah lawmthu ka sawi a.

Tin, lockdown chhungin ei leh bar zawn a lo har a, chhuanchham te an lo awm bawk a. Khangah khan mi inphal leh mi inpe, chhuanchhamte tan an thilneih hlu tak tak leh pawisa faite leh thildangte nen rawn petu zawng zawng Aizawl South-I bial mipuite hnena lawmthu ka sawi a. Tin, bial dang thingtlang lam atanga kan eitur thlai khaw hrang hrang atanga min rawn petute, a khaw hming hi a mal te tein ka lam seng lo ang a, an chungah vawiinah hian Aizawl South-I hmingin lawmthu ka sawi a.

Tin, Aizawl South-I huamchhunga kohhranho te inthurualin tawngtainate kan nei a. Kohhran thahnem ngai tako Pathian hnena min dilsak thintu a hminga roreltute tana Pathian hnena tawngtaina min hlansaka, min dilsak thintu kohhrante chungah lawmthu ka sawi a.

Tin, engmah hlawh pawh beisei miah lo, a hrehawm pawh engmah sawi lo, chan pawh engmah sawi lo, hlawkna pakhat te pawh beisei miah loa mipuite himna tur atana a chhun zan zawma thawktu LLTF-te inzavai chungah lawmthu ka sawi bawk a ni.

Pu Speaker, kan lawmna vawiin niah hian sawi tur tam tak a awm ang a, khami karah khan chu chu ka sawi theih tawk ni mai sela. Pathian aiin mihring hi vawiin niah hian a langsar in ka hria a, chu chu kei ka rilru chhungrelin tinatu a ni a. Vawiinah hian kan zingah Pathian hi langsar ber se tih hi ka duhna a ni e. Ka lawm e.

SPEAKER : Pu Muanpuia hi a inziak hmasa a, mahse kan hun hi ni e, member te right a ni a, Pu C. Lalmuanpuia, Member zahawm tak ka sawm e.

PU C. LALMUANPUIA : Pu Speaker, nichin khan ka phar tawh a, mahse hun kha a lo tlem viau mai a. Engpawh ni sela vawiina kan Member zahawm tak Pu H. Biakzaua Private Member Resolution ka thlawp thu leh thil pawimawh leh tul, he Covid dona kawnga ka tih te sawi lan ve ka duh a. Hun pawh ka hmang zo lo maitei a, han sawi ve hram ka duh a ni.

“Covid-19 hripui leng do kawnga sawrkar, kohhran, tlawmngai pawl leh Zoram mipuite tanrualna avanga India rama a titha ber state zinga Mizoram kan tel hi a lawmawm kan ti a. Hripui dona kawngah NASA lehzuala tanho chhunzawm zel a tha kan ti” tih hi ka rawn thlawp a.

Kan hriat theuh angin kan tum zawk leh kan beisei miah lohin hripui Covid-19 hri a lo leng that a, kan ramte pawh a rawn thleng chhoiin kan buai em em a. Chutih karah chuan kan Chief Minister zahawm tak Pu Zoramthanga kaihhruaiin he hri hi a theih ang angin kan Minister a changtu kan Minister-te leh department leh mipuite kan zavaein, kohhrante, tlawmngai pawlte kawng hrang hranga kan tanrualna rah vawiina lo lang hi a lawmawm ka ti khawp mai a. India ramah pawh he hripui leng karah a titha berte zinga kan han awm hi a lawmawm ka ti a. Vawiinah hian lawmthu sawina tur tam tak a awmin ka hria a. Kan thawhho tlanna, kohhrante an tawngtai a, a ri a mawi thin khawp mai a kan han tang mar tak tak kha chu. Kohhran Hall-te pawh quarantine centre-ah an han phal zel a, an inhwang em em a, kawng engkimah sum leh pai thawh thlengin an rawn inhuam te kha a lawmawm ka ti a.

Tin, NGO-te, YMA-te leh pawl hrang hrangte kan thawhhona a tha a. Covid-19 dona kawngah a duty-na tur kawng tam tak a awm a. Local Level Task Force, Village Level Task Force-te kan thawhhona a tha em em a, ramria duty te, vengchhung leh khawtlang kawng engkimah duty-na kawng hrang hrangah te kan thawhhona a tha em em a. Khang kan hmalakna khan vawiin ni hi min thlen a ni. A lawmawm ka ti khawp mai, Pu Speaker.

Tin, kan sawrkar-in hmalakna kawng hrang hrang a neihte zingah chuan, a hmasa ber han nihna ang chi, lockdown-te pawh han inkhuahkhirhna te pawh a ti hmasa pawl kan han ni a, Airport-ah kan thlawhna a rawn zinte screening han nei hmasa ber pawl kan ni te, kan advance em em mai te kha kan sawrkar-in hma kan lakna kawngah khang khan engkim mai kha a tha a, a hmasa kan nihna khan vawiin kan hunah hian min pui em em a, tun dinhmun hi kan thleng a ni.

Tin, Department hrang hrangte an tangkai em em a, Home Department kawng engkimah a sul sutu an ni a, department hrang hrang Supply Department kawng engkim, ei leh in kawngah min supply a nghei loin kan awm thei a. Chutiang bawk chuan Department dang dangte pawh an ni a, Vety-te, Fisheries, Department zawng zawng mai han lam sen pawh a ni lo, kan zavaiin kan tangrual a ni.

Tin, kan Doctor leh Nurse-te an in pawh luahlum hman loin an awm a, an hah em em a. Transport Department-a kan driver-te thlengin an chhungte nen pawh an awm hlei thei lo a ni. Khatiang khan lawmthu sawina tur hi a van tam em! Tin, Tourism Department-te pawh kha quarantine centre-ah an hmun zawng zawng kan hmansak a, khatiang khan kan han hmanske kha a lawmawm khawp mai a. Sports lam te pawh an ni tho a, an Indoor Stadium-te zawng zawng pawh quarantine centre-ah te kan hmang a, khatiang khan kawng engkimin department hrang hrang pawh kan tangrual em em a, chutianga kan tanrualna rah chu vawiinah hian a lo lang a ni.

Pu Speaker, ka sawi rei lo ang ka ti a, han sawi loh theihloha ka hriat chu ka bial chhung lamte pawh han luhchilh ve ka duh a. Ka bial chhungahte pawh LLTF-te an thawk tha em em a, chu mai ni loin mi harsa chhuanchhamte an zawng chhuak a, kawng engkimah an chhawmdawl a. Chumi piah lamah zokhaw lama kan unau harsa zawkte tanpui turin Electric Veng, Chanmari, Chanmari ‘W’, Hunthar leh Eden thar te pawh an thawkchhuak a, zokhaw lama mi harsa zawkte pawh eitur te an pe a ni.

Chutiang khawp chuan ka bial mipuite ka bial chhunga mite pawh an tangrual a, lawmthu he House kaltlang hian ka sawi duh a. Zokhaw lama kan unaute pawh kan tlakchham hlauin eiturte min rawn pe a, vegetable, thlai hnah leh tlai rah ang chi eiturte min rawn hlui a, engmah a man pawh la duh loa min rawn hlui te kha an chungah lawmthu ka sawi duh a. Vawiinah hian lawmna tur hlir niin ka hria a.

Tin, Medical Operational Team, Dr. ZR Thiamsanga leh kan MLA-te kan zavaia kan thawhhona te bakah MLA zawngte pawh keimahni bial theuha kan thawhhona hi a lawmawm ka ti a.

A tawp berah chuan Pu Speaker, Pathianin he Zoram min humhimnaah lawmthu ka sawi duh a. Kan Chief Minister zahawm tak finna leh remhriatna a pe a, kan Health Minister te an thawkrim em em a, an chungah lawmthu ka sawi duh a ni. He Private Members'

Resolution “Covid 19 hripui leng do kawnga Sawrkar, Kohhran, Tlawmngai Pawl leh Zoram mipuite tanrualna avanga India rama a ti tha ber State zinga Mizoram kan tel hi a lawmawm kan ti a. He hripui dona kawngah nasa leh zuala tan ho chhunzawm zel a tha kan ti” tih hi ka thlawp a, pass ngei turin memberte ka sawm a ni e. Pu speaker, ka lawm e.

SPEAKER : Member zahawm tak Pu C. Ngunlianchunga ka sawm e.

PU C. NGUNLIANCHUNGA: Pu Speaker, kan hun a kal nual tawh a, rei tak ka sawi lo ang a. Vawiina Private Members’ Resolution kan sawi hi a tha khawp mai ka ti a. Chutih rual chuan, ‘Pu Zoramthanga’ tih reng mai te kha he lama kan hotute khan an ngaithiamlo pawh a ni ve mai thei a. Vawiinah hian he kan kal chhohna lawmthu kan sawina turah hian he sawrkar fak chiamna emaw, MNF Party sawrkar fak chiamna emaw zawnga kan kalpui kha a fuh lovin ka hria a. Hei, kan resolution wording-ah hian a lang chiang em em a, kohhran te, khawtlang te leh mimal ang te pawhin he Covid chungchangah hian mahni phak tawk theuhin an thawk a. Helaia lang lem lo hmeithai nu berh te tea kan ngaihte Pathian miten anmahni inah te kha hri a lo len lai khan nasa takin an lo tawngtai ve a ni tih te pawh hi kan hriat a tha a. Kan sawrkar leh Chief Minister ek nei sawia sawi tum tlat laia kha chu a dikan ka hre lo a ni.

Chuvang chuan, vawiinah hian he sawrkarin hri kan dona chungchanga a pawr lai sawi tum ila, sawi tur hi tam tak a awm ve ang. Kan Minister pakhatin “kan chief Minister-in Pathian a tih avangin Covid pawh kan ramah a awm lo” a ti a, a tih tuk chiah-ah Covid a rawn leng thawt nghal mai a.

(...*interruption...*)

PU TJ. LALNUNTLUANGA, MINISTER: Pu Speaker, voice record a nei em, sawi rawh le

PU C. NGUNLIANCHUNGA: Media-a an sawi kan lo hmuh ve kha a ni a. Voice record leh record loh lam ni lovin media-ah kan lo hmuh ve a ni a....

(...*interruption....*)

PU T.J. LALNUNTLUANGA, MINISTER: Pu Speaker, a tang ngam em amah kha, khati chiah khan a sawi em? Pu Speaker, voice record a neih leh neih loh kha kan member khan rawn sawi rawh se.

PU C. NGUNLIANCHUNGA: Pu Speaker, amahin a sawi ka ti lo a, Media-a kan lo hmuh ve maia kha vawiinah chuan kan rawn sawi a ni.

(..*interruption...*)

PU TJ. LALNUNTLUANGA, MINISTER: Media-a a hmuh anih pawhin hetah amah a sawichhuaktu kha a ni a, chuvang chuan kan member khan rawn sawifiah rawh se. Ama sawi a ni a, media-a sawi anih kha chuan rawn sawifiah rawh se. Voice record a nei em tih kha.

PU C. NGUNLIANCHUNGA: Pu Speaker, khalai kha media-a kan lo hmuu thu kha, vawiinah hian kan sawi tum chu ..

(...*interruption...*)

PU TJ. LALNUNTLUANGA, MINISTER: ‘Vawkte mawng ping’ tih ang chauha sawi mai mai chi a ni lo.

PU C. NGUNLIANCHUNGA: Pu Speaker, khalai pawh kha a document kan nei tho a, khalam kha chu sawi ka tum a ni lo a, Pu Speaker, khawngaihin lo hrethiam se la. A mimala kha keiin ka charge a ni lo a, “he kan Covid donaah hian tha tak a awm laiin a pawr lai zawng dawn ila sawi tur a awm ve tho a ni, media-ah te pawh” kan han tihna lai kha a ni zawk a ni. Chuvang chuan, vawiin a ka sawi tum

(...*interruption...*)

PU TJ. LALNUNTLUANGA, MINISTER: Voice record a neih loh chuan kha kha chu a in withdraw chuan a tha a, Pu Speaker, voice record a neih loh chuan kha kha chu a dik lo a ni.

PU C. NGUNLIANCHUNGA: Pu Speaker, keiin ka sawi ni lovin media-a kan lo hmuhte a pawr zawnga kan sawi duh dawn chuan tih lai kha a ni khalaiah khan

(...*interruption...*)

PU TJ. LALNUNTLUANGA, MINISTER: Ama rawn sawichhuah ngei a ni a, kha kha Pu Speaker, aman a rawn prove tur a ni. A nih loh chuan a in withdraw tur a ni kha kha.

PU C. NGUNLIANCHUNGA: Kei ina ka sawi lam ni lovin, ka lo hriat ve thu kan sawi chhawng mai zawk a ni a, khalaiah khan a lo hrethiam lo anih chuan lo hrethiam se la, ka sawi tumna lai zawka chu, “khang thilah te khan a pawr zawnga kan sawi dawn chuan sawi tur a awm ve tho e,” ka han tihna lai maia kha a ni. Chutih rual chuan, ‘sample bo’ han tih ang chi te leh khatiang te te kha tam tak a awm a. Vawiinah chu chu ka sawitum lam ni lovin, he Covid kan dona chungchang thuah kawng leh lamah chuan India ramah, khawvelah Covid-19 a awm a ni tih kan hriat rual rualin *total lockdown* kan han ti nghal a. Entirnan: Kan ram keini Lairam Isua Krista Baptist Kohhran-ah ngat phei chuan Assembly kan neih lai a ni a, kan Assembly pawh kan resolution neitupa-in a sawi ang khan kan zawh hma, Ordination pawh Sunday tuka tih tur kha Inrinni zanah kan ti rum rum a. Khatiang khan kan lo buaipui em em a, kan lo mangang a, kan lo chiai a ni. Khatihlai khan a pawr lampang tur sawi dawn chuan han fel tawk lohna lai te, kim tawk lohna lai deuh te, tlin tawk lohna lai deuh te a awm ve ang. Am Maherawhchu chu chu vawiinah hian sawi ka tum ber a ni lo, hemi chungchang thuah hian kan tanhona, kan thawhhona te, entirnan, heti lama kan thiante’n an han sawi, hemi chungchang atan hian Pu Lalthanawla sawrkar kal hmasa pawhin hma a lo lak leh a lo hma chhawp tawh ZMC te, Lengpui Airfield te, Bairabi rail station te a tangkai em em a ni tih an han sawi ve te pawh kha a dik vena chin a awm tho a ni. Khami atang khan kan thawk ho vek a, hma kan la tlang vek a, alo tangkai a, chumi zarah chuan leh kohhran mite tawngtaina zarah vawiinah hian India ramah pawh State ti tha berte zinga mi kan han ni te hi a lawmawm ka ti a.

Chutih rual chuan sawrkar ang pawhin order te kan han chhuah a, nimin piah maiah pawh kan Health Minister-in ‘zai kan phal lo miahlo a nia’ a ti a, khatiang khan zai chungchangah pawh phal leh loh han tih ang chi te, khangte te te kha thu thang hi a tam ve em em a. School han tan turah pawh tan ‘leh loh tur’ tih ang chi te. Entirnan, keini bial ang te chu a lo hla a, school tan tur anih chuan Aizawl an rawn pan vang vang a, ‘kal leh loh tur’ han tih ang chi-ah te khan, kha lai kha tam tak han sawi hnawk tur chu a awm ve tho ang. Amaherawhchu, chulai chu ka sawi tum lam ni lovin, he Covid-19 kan dona kawng chungchang thu ah theih tawp kan chhuah tlang theuh a.

Thi pakhat ka han sawi leh duh mangan thlak deuh chu, MLA te nangma hovin meeting an han nei a, keini ho kha min han puh chhe ang reng viau a social media-ah te, MLA fund cheng nuai 50 theuh thawh tur han tih ah, tukin zing lam chanchinbu kan hmuah te chuan, “pawisa kha kan indaih ta nge ni, MLA pathumte hnenah pek let leh a ni” tih ang chi te pawh kha a pawr zawng chuan sawi duh ila sawi tur kha a awm ve zel tho a ni. Tichuan keini ho pawhin kan phak tawk theuhin kan hlawh atang te pawhin kan han pe ve lawp lawp a, kan bial te alo zau a, total lockdown alo nih takah chuan eitur neilo, chhuan chham mai tur te local task force-ah engzat nge khawtlangah in mamawh ang tiin kan MLA fund te pawh kan lo sem ve mawp mawp a, chutiang chuan Lawngtlai District a awm kan nih angin Lawngtlai khawpui damdawi-inah te sawrkarin alo dah vek seng lova, khum kan mamawh an ti a, engzat nge in mamawh, in mamawh ang chu kan han siam ang, MLA fund atang tein kan ti a, kan thawk ho vek a ni kan vaiin. Khalaiah khan nichin a hmaa sawituin a sawi ang deuh khan, khang ang zawng zawng kha Christian kan nihnaah, ‘lawmte lawmpuia tahte tahpui’ tih nuna kha a takin alo langin ka hria a. Chu chu thildang vang a nilo, Pathianin kha hri kan dona tur atan khan inlungualna te, inpumkhatna te leh, kha ri khan kan ramah, kan chhungkuah kan mipui teah bu a khuar ang a, a luh chilh ang tih kan hlau em em a, veng tinah positive hmuh anih tawh chuan sawrkar a chet hmain local task force ten a rang thei ang berin district level te nen inbe rawnin total lockdown an ti nghal a, kan inkharkhip rup rup mai a. Chutiang chuan positive contact deuh an lo awm anih pawhin kan local task force te’n sawrkar chet hma pawhin, keini ngei pawh MDC inthlan lai khan kan nula an khuaah vote thlak turin a kal a, a kalna driver kha positive alo ni tlat mai a, zan dar 9 velah an hre chhuak a, keini chhung pawh kha local task force-in a zan zanin min rawn home quarantine tawp nghal mai a ni. Chutiang ang chuan hma an la nasa em em a ni.

Vawiinah hian kan zavaia kan thawh hona zarah tun hun hi alo thleng a ni a, chungah chuan kan hma lama kan kal lehna turah pawh sawrkar pawhin ngaihtuahna fim tak mipuite ti chiai mai lova, thu tlukna kan siam dawn anih pawhin ngun taka thlir a, thu tlukna kan siama order kan siam anih pawhin a tha ka ti a, eg. zai phalloh kan tih laiin khawilai emawah chuan kan lawm avangin avangin kan zai luih luih leh tho a, kha lama kha thenkhat kohhranah te chuan kan han chawi tir a, thenkhatah an chawi leh lem chuang lo a, khang ang kha a fel zo vek bik chuang lo ang, a famkim vek lo ang. Amaherawhchu chutih rual chuan tuna kan resolution-ah, ‘hmalama kan kalna turah pawh thawh ho zel nise a tha kan ti’ tih lai hi a support-awm ka ti a, chutihrual chuan kan zavaiin tang tlang ila sawrkar

pawhin sawrkar anih ang taka ro a rela, decision a siam dawnah pawh zawm ngei theih tur chi thlir hram hram sela, chaw hmaa order chawhnua thleng thlak leh ang chi te, vawiina chhuah naktuk a tihdanglam leh ang chi te kha awm lo hram hram sela, chutiang chuan order kan siam anih pawhin kan order tur kha thlir lawk thiamin kal hram hram ila a thain ka hria a.

Vawiinah hian, heng zawng zawnnga hnehna min chantirtu chu kan Pathian a ni tih hi kan thinlungah awm lian se ka duh a. Pathian thuhrliltute'n Home Crusade te an nei a, ‘ram pumpuii tawngtaina i nei ang u’ te an ti lawm lawm a mahse kan ti hlei theilo a ni. Ninevi khawpuiah chuan zawlnei Jona a kal a, “he khuaah hian in sim loh chuan he khua hi a chhe dawn a ni” a ti a, an lal chawpin Saiip puan sinin Pathian hnenah ngaihdam an dil a, chu chuan an khawpui a ti him a ni tih kan hria a. Vawiinah hian he kan resolution kan pass rual rual hian he House-a member-te chauh nilo, Zoram mipuite hian zaninah pawh hian lawmthu sawina resolution kan pass rau rau anih chuan Pathian hnenah mahni awmhmun theuh atang pawhin lawmthu i sawi ang u. He hri laka min humtu, thawhhona tha, inpumkhatna tha, inlungualna tha min petu hi kan Pathian a ni tih hi i hria ang u tih hi ka sawi duh a ni e, ka lawm e.

SPEAKER : Opposition Group Leader Pu Vanlalhlana, Member zahawm tak ka sawm e.

PU VANLALHLANA : Pu Speaker, ka lawm e. Kan thusawi dan a inthlak deuh tlat mai a, a kia kha, bial chhunga lawmthu sawi zawng ten a kal ta a, engpawh nise, a tha tho e. Pu Speaker. “India rama a ti tha ber state zinga Mizoram kan tel hi a lawmawm ka ti” tih hi bul tan nan ka sawi duh a. India rama a ti tha ber kan ni anih chuan a lawmawm khawp ang a, hei hi keimahni inti mai nge kan nih central minister-in ‘in ti tha ber’ a ti nge, a tehna hi a awm em, a criteria a awm em tih hi kan question deuh hlek a.

Engkimah hian a tha ber nih hi a har viau a, India ramah state 28 a awm a, UT 8 a awm bawk a, chung zinga a tha ber nih chu a hlu viau a ni. Amaherawhchu, eng ang nge a tehna, a criteria leh ‘pakhatna’ kan nihna laia hi hriatchian deuh hlek ka chak khawp mai. Sawrkar, Kohhran, Tlawmngai Pawl leh Mizo mipuite tanrualna vang a ni ta a, a tir atangin ka ngaihtuah vang vang a, khawilaiah hian nge ka telve aw, ka ti a. Sawrkarah hi chuan ka tel lovin ka hria a, kohhran mi chu ka ni a, mahse kohhran aiawh ang chuan hetah hi chuan ka tel bawk si lova, NGO-ah ka tel bawk si lova, mipuiah hian ka tel ta ni berin ka hria, ta a na. Mipui anga he thawhhonaa ka participate dan hi ka ngaihtuah ta a, mipui ka nihna aiin mipui tlanchhuah MLA ka nihna anga ka participate-na hi keia ngaih chuan a lian zawk a, chu chu bial kan enkawlna leh bialchhunga mi harsate kan puihna angah ni tase, a pumpuia kan thawhhona, Sawrkar, Kohhran leh Tlawmngai Pawlte tanrualna avanga titha ber kan nihna chu Covid do kawngah a ni a, chu chu ralpui phiara kan phiara, kan ram chang ni lovin, India ram chang pawh nilo khawvel pumpuia harsatna min thlentu hi a ni ta a ni. Chumi kan beihna kawngah chuan Sawrkar, Kohhran leh Tlawmngai Pawlte, Mizoram mipui zawng

zawngte kan tanrualna avangin India ramah pakhatna kan lo ni ta tihna a ni a, a lawmawm khawp mai.

He covid avang hian Mizoram mipuite kan intodelh loh zia a langchiang a, harhtharna pawh hi kan nei deuhin ka hria, kan hriat tawh kan tih hi kan experience atangin a lo chiang a, he hripui hian ei leh barah harsatna a rawn thlen a, chu chuan ei leh barah kan intodelh loh zia hi mitin thinlungah a rawn tuh ta a ni. Chuta tang chuan ei leh barah kan intodelh thei a ni tih pawh a lo lang leh ta zel a, chu chu he hripui lak atanga hlawkna kan hmuh pawh a ni thei awm e. Tin, ei leh bara kan intodelh chang ni lovin thil chihrang hrangah pawh hian skill hi kan lo nei a ni, innovative mind te pawh kan lo nei a ni tih hi a langchhuakin ka hria. Mask te a lo ngai a, PPE te a lo ngai a, motor a rawn luh loh avangin harsatna kan tawk ta a ni. Chutih lai chuan ngaihtuahna hmang thiamten an han hmang a, mask-te Mizoramah an thui ta chur chur a, PPE kan la hriat ngai loh angte pawh an lo thui thiam zel mai a, chung chu thil tha tak pawh a ni.

Tin, Chief Minister Relief Fund te a lo awm a, a tirah chuan Chief Minister Relief Fund hi thil thar pawh a ni lova, a awm sa a ni a. Amaherawhchu Covid avang hian Chief Minister Relief Fund-ah donation a lo lut tuk tuk a, atirah chuan Chief Minister Relief Fund ni lo hian hming dang vuah hi ka chak ang reng a. Central-ah pawh Prime Minister Relief Fund hi a awm reng a, chutih rual chuan Covid atan chuan ‘Prime Minister Relief Cares’ te an han ti a, khatiang deuh khan ‘Chief Minister Cares’, kha kha chu Covid atan liau liau ang te pawh kha a lo ni ta a. Engpawh nise, Chief Minister Office atang pawhin expenditure/pawisa hmanna te kan hmu thin a, a lawmawm khawp mai.

Mizo ten thu kan awih zia hi a langin ka hria a, thu hi kan awi ngawih ngawihin ka hria. News ah te kan en a, Vai ho thuawih loh zia te hi a lang chiang leh zualin ka hria. Mask vuah tur an han ti a, kan vuah thap mai a, Social distance tih te pawh hi a theih chinah hi chuan kan *keep* a ni. Amaherawhchu, Vairam-ah chuan Police pawh bei let ngam khawpin thu an awihlo a ni. Chuvangin, he harsatna hian Mizo mipuiten kan tana tha turah hi chuan thu kan awih zia hi a tilang chiang a ni.

Kan theihpatawpin kan tang a, Pu Speaker, nang pawh i theihtawp i chhuahin ka hria. MLA te pawh Committee hming hmerh tel lovin in kokhawm a, party represent angin. Tichuan, Covid a ni a, MLA fund te kan nei a, engtinnge kan do ve ang, i theih ang tawkin tan i la a, keini te pawhin kan hlawh atang te, kan MLA fund atang te pawhin nuai 50 thawh turin kan inti a, kan han thawh chho a ni a. Nangmah tak pawh hian he hripui venna kawngah hian tha i thawh nasa in ka hria. Tin, sawrkar pawhin tha a thawh khawp mai a, a bikin kan Health Minister hi langsar khawpin a tangkai in ka hria a, a fak pawh a fakawm khawp mai a. Amaherawhchu, Covid do laia nasataka hna a thawh laia *internal audit* han awm that kha chuan a barakhiah vein ka ring a. Engpawh nise, khangte pawh kha thil thleng ve turah ngai ila. Tin, kan vaia kan tanrualna lan lehna chu Doctor te, Nurse te Lab. Technician te leh mitin ten engtinnge sorkar tan kan tangkai ve theihna, he Covid, he hripui beihna kawngah

hian engnge tih theih ka neih tiin an thiam thil te leh an talent neihna te nen rawn pen chhuaka an rawn in volunteer hi an fakawm ka tiin a ropui pawh ka ti em em a ni.

Tin, chutihlai chuan, hmannah te pawh kan sawi tawh a, Kolasib leh Bairabi te, raltnan te, hripui tlanchhiat sana lo hawte rawn tlan luhna a ni a. Hotel 7-ah hian ba nuai 44,50,980 hi a awm a, tin, khutilaia tangkhangte motor a han thiarna leiba hi nuai 24 chuang a awm bawk a. Heng hi engtia rulh tur nge ni ang tih hi ngaihtuahna pakhata awm a ni a. A pawisa hi a tlem vak lova, chaw eina bill ringawt pawh hi nuai 44 a ni a, Transport, intthiar velna hi a pahniha belkhawm hi nuai 69 a ni a, chu chu kan sawrkar pawh hian hre ve ta se, hei hi RTI hmanga Information atanga lakchhuah a ni a, a dik turah a ngaih theihin ka hria.

A tawp bera Pu Speaker, ka sawi duh chu, dan bawhchhia kan sawi thin a, mipuite kan him theihna turin sawrkar pawhin SOP te a siam a, Standard Operating Procedure a bawhchhe hmasa te chu kan House Leader te, kan Sport Minister te an ni vek a ni. News ah te, Chanchinbu ah te kan lo hmu a, an zin a, an zawn a, mipuite nen an inhnaih dan en khan social distance kan tih ang kha chu an keep lem lo a ni. Chuvangin, dan bawhchhiat hi chu a awm ve a ni tih kha vawiin niah hian kan tarlang duh a ni. Chu chu tawk mai teh se, hun a ren awm e. Ka lawm e.

SPEAKER : Pu Mawia hi a zahawm khawp mai a, kan bawhchhe thui lutuk ang em? Aw le, Member zahawm tak Pu L. Thangmawia ka sawm e.

PU L. THANGMAWIA : Sawiloh kan tum zet a Pu Speaker, amaherawhchu politics ball-ah kan hmang ti tih dawnin ka hria a, tlem han sawi ka duh a. Kan resolution hi i veilama mite hian an hre thelh deuh emaw ni aw ka ti a. “Covid-19 hrileng do kawnga sawrkar, kohhran, tlawmngai pawl leh Zoram mipuite tanrualna avanga India rama a ti tha ber state zinga Mizoram kan tel hi a lawmawm kan ti a” tih a ni a, ti tha ber a ni lo a, “ti tha ber State zingah” tih a ni, hei hi ber angin kan Opposition Group Leader zahawm tak pawn a rawn ti a, a chhiar chiang lo a nih ka ring a. “He hripui dona kawngah nasa lehzuala tanho chhunzawm zel a tha kan ti” tih lai phei hi chu kan sawi hmaih deuh nualin ka hria a.

Tawite ka han sawi duh chu Pu Speaker, sawrkar hi a inpuahchahna a tha a ni, phawt mai a, chu chu ka sawi zau tawh lo ang, hun a tlem avangin, kan hre vek a Zoram mipuiten. Amaherawhchu, sawrkar inpuahchahna kha tha mahse, mipui tel lovin he hri hi do hneh chi a ni lo. Mipui kan han tih hian mipuiah organisation hrang hrang leh rinna lamah kohhrante, tlawmngai pawlte a awm a, tlawmngai pawl pakhatina min support loh pawn a buaithlak vek, kohhranah pawh a ni tho. Kohhranah tawngtaina nen, hall kan hman duh pawhin engkimah, keima hmuh phak chinah chuan kan kohhran hruaitute hi an tang em em, sawrkar thuchhuah, sawrkar inbuatsaihna tha tak kha an keng kawh tha a ni. Inkawm loh tih thlengin an phun nawi lo. Tlawmngai pawlah pawh hian Pu Speaker, Standard Operating Procedure (SOP) an han siam a, Local leh Village Level Task Force dinna zawng zawngah

tlawmngai pawl leh kohhran telloin khawimah hi a kal lo a ni. Chuvangin, sawrkar inpuahchahna a tha a, a inpuahchahna bawhzuina kawngah kohhran leh tlawmngai pawl, a tawp berah chuan a pawimawh ber mipui, mipuiin Village Level Task Force-te, Local Level task Force-te, State Level Task Force-te leh kan Chief Minister zahawm tak pawhin thuchah a sawi thin a, kan Health Minister zahawm tak pawn, khang khan zawm a hlawh em em a ni. Chuvang chuan he resolution hi a thlawp awm ngaih ngawih a, kan Member zahawm tak Pu Biakzaua rawn tih hi, “a ti tha ber” intih chu tehna a awm chiah lo a, Opposition Group Leader sawi ang deuhin, state dangin min hmuh dan India rama *The Hindu* chanchinbu tih September Ni 29, 2020 ami a ni a, ‘Mizoram remains the only State without Covid-19 fatality’ tiin a ziak a ni. Hetih lai September Ni 29-ah pawh hian Mizoram chiah hi State-ah thihna Pathian hruaina zarah tawk lo kan ni a, he chanchinbu ziaktu hian, “Assam leads the Covid-19 table” a ti a, Assam-ah 667 hemi ni hian an thi tawh a, a dawtah Tripura 276, Manipur-ah 64, Meghalaya-ah 46, Sikkim-ah 34, Nagaland-ah 17 leh Arunachal Pradesh-ah 15 an thih tawh thu hi *The Hindu* hian a ziak a ni. Hetih laia India ram state-ah, kristian State-ah, Pathian hruaina a ni hei chu, hetah ziak lang kher lo mahse a chiang a, kan sawinaah pawh kan sawi ngun a ni. Hei ringawt pawhin a prove-in ka hria a. Wikepedia-te pawh hi kan download a Pu speaker, a en theih vek, ka sawi tawh lo ang a, hun a chep avangin.

A tawp nana kan sawi duh chu, politics a inrawlh hian kan buai zel, kan tangrual viau dawn emaw kan han ti a, sawrkar inbuatsaiah dan, khawl neih chungchangah pawh kan member zahawm tak Dr. Vanlalthlana’n a sawi ang khan kan Health Minister zahawm takin meeting-ah pawh min rawn ko tel ve a, a tirah, vawi khat bak chu ka telpui tawh lo a, khawl bun tur, natna hrik putchhuah lohna, loh theih loha siam hmasak a tul ziate mithiamte zarah ka va hre ve a ni, sorkar tih mualpho tum nan hrim hrima khawl leite kan awm em tih hi vawiinah hian Pu Speaker, ka rilruah chuan zawhna a lian em em a ni. ‘A ni’ tih erawh chu ka sawi thei lo a, a chhan chu member zahawm tak takte an ni a, va inpuh dawt chu a dik lo ang a. Ngaihtuahna thui tak han sen chuan khawl bun tura thil ngai, Health Minister room-a kan meeting tuma mithiamte sawi ka hriat atang chuan, khatia khawl lei ringawt lam kha a ni lo, sawrkar inbuatsaiahn ngahtuah lek lo a, ‘sawrkar hi kan timualpho teh ang’ tih hi kan lo awm anih pawhin Pathian hruaina zarah mipui thlawp kan la hlawh chho zel a, sawrkarna pawh inthlanah kan han chang zel hi chu, mipui hian fel lo te te ni mah ila MNF MLA-te hi theihtawp kan chhuahnaah Pathian hruaina kan dawngin ka hria a.

Tin, Member zahawm tak Lawnglai West bialtu pawh khan tlem a rawn sawi ka rilrua awm chu, sawrkar hmasaa thusawi kan lo ngaithla vek, tun tum tluka Chief minister kan sawi tlem tluk a la awm lovin ka hria. Khatah phei chuan a sawi apiang khan ‘Chief Minister Pu Lal Thanhawla’ an ti vek zawk a ni. Tunah erawh chuan alo theih loha sum petu a ni a, decision siamtu a nih thin avangin. Pu Speaker, ka lawm e.

Pu C. NGUNLIANCHUNGA: Pu Speaker, tun subject bikah hian a nia ka han tihna chhan, vawiina kan resolution mai bikah hian a nia ka tih, a bakah chuan duh tawka in sawi

pawn sawi tur kan nei chuang lo a, lo sawi pawh ni ila fak Leader a ni a, fak tur pawh a nihna chin a awm ang. Vawiinah kan resolution sawihoah hi chuan kan zavaia thawhhona a ni e, tih lai kha kan sawi tumna lai zawk a ni e.

SPEAKER : In tang ulh lutuk a ni. Tunah sawihona kan duh tawk tawh ang a, kan Minister zahawm tak Health & Family Welfare Department changtu Dr. R. Lalthangliana, sawi duh a neihte sawi turin ka sawm e.

DR. R. LALTHANGLIANA, MINISTER: Pu Speaker, ka lawm e. Kan zawh veleh hian Lunglei lam pana kal tur ka la ni a, kawng leh lamah chuan nikum kumtluan mai khan kan buaipui a ni a, tun 8th Session-ah hian Private Member Resolution hi list ah tam tak kan nei a, vawiin balloting-ah a chhuak ang em aw ka ti a, ka chang ran ran a, a han chhuak nawlh hi kawng lehlamah chuan a vanneihthlak ka ti a, kawng leh lam ah saw lam Lunglei lamah loh theih lohna a phei tur ka nihna zawnah erawh chuan zanlaiah pawh kan thleng mai a ni ang chu. Tam tak in an sawi tawh a, a ngaihthlak pawh a nuam khawpin ka hria a ni.

Vawiinah kan Chief Minister zahawm tak MNF President ni bawkin underground-a hruaitu anih laia a hla phuah niin ka hria a, ka rilru ah lo lang zawk mai a. Kan MLA pakhat han ziak chhuak teh ka ti a, chang khat chiah a ziak chhuak thei a -

*'Kan Zoram-ah Lal Krista Kraws
Sualna hnuasia lo tlu tawh hnu,
Tungding tura dotu zawng ten
Huai leh chhel takin i tawn zel ru'.*

Ka duh lai tak hi ka hre chhuak bik lo a, ka sawi sual ang tih ka hlau si a, he hla hian mak deuh maiin nichin lawk atang khan min thawng min thawng a ni tih kha kan sawi duh a ni.

Kum khat kan buaipui kha a ni si a, thahnem kan ngai hlawm si a opposition leh pawl zawng zawng kha kan ni vek mai a, mimal, chhungkua leh tupawh mai kha min khawih che a Covid-19 hian. Chuvang chuan rei lo tea han sawi zawk chu a har deuh anih pawhin khawngaihin kum khat chhung kawng tinrenga min tibuaitu he natna hripui hlauhawm tak mai, tihbaiawm tak chungchang kha a ni tih hre ta ila a tha awm e.

Kan Resolution chungchangah hian a dahtu pawh hi a inthlahrung pawh hian ka hria a, Pu Zaua hian ‘sawrkars’ a han tih hi a dik a, chumi pah chuan a huam zau ta a ni. “Hrileng dona kawnga sawrkars, kohhran, tlawmngai pawl leh Zoram mipuite tanrualna avanga India Rama ti tha ber State zinga Mizoram kan tel ve” a ti a, a ti tha ber kan ni a, Pakhatna lawmman kan la e tih chu a sawi chiah lo, kha kha kan hriat a pawimawh hle a. Amaherawhchu, hei hi a comprehensive, a huam zau em em mai a, mi zawng zawng huapina kan thawh hona thatna, kan MNF sawrkara Chief Minister zahawm tak Pu Zoramthanga

kaihhruai laia thil lo thleng ni bawk siah khan a lo thleng ta a ni tih hi kan rilruah awm se la ka duh khawp mai tih kha ka han tarlang hmasa duh a ni.

Nimin piah khan tlemin ka lo en sual ve deuh hlek a, in ngaihdam Pu Speaker, kan dil a, chu chu “The life expectancy for India in 2020” tih hi tlem lai khan a chhuak a, India ram pumpui a average laka mimir chawh ruala kan damchhung hun a hi 69.73 yrs a ni a, Kum 69 dam anga chawh rual niin Kum 2019 ai khan 0.3% in kan sang a, chu chu India Health of the Nation State, 2017 tih endiktu pawh hi Indian Council of Medical Researchte, Public Health Foundation of India tih te, IHME tih te leh Ministry of Health & Family Welfare te tih chhuah a ni a, Northeast State bikah khan 2-na kan ni emaw ka tih kha, ‘Zero’ tih lai kha ka lo ensual palh hlauh a, amaherawhchu, kan dinhmun a chhe lo a, national average khum hi India hmarchhak State-ah hian 5 kan awm a, chung zinga a khum sang ber chu Sikkim niin, 73.15 an ni a, 2-na hi Nagaland niin 71.08 a ni a, Mizoram hian kan pha tep a ni. ‘Zero’ tih lai point vel khan 71.05 niin pathumna kan ni a, tichuan panga-in National Average-a Life Expectation an neih hi kan khum a, chutih mek lai chuan Assam hi (min haw lo ang chu maw) an hniam ber a, 65.22 an Life Expectation a ni tih kha ka tarlang lawk duh a ni.

Nunna hi a pawimawh a, chumi ngai pawimawh em em chuan vawiinniah sawrkarna chelh mektu kan nihna zawnah kan Chief Minister zahawm tak hian thildang zawng zawng hi chu kan economy leh development leh kan thil dang zawng zawng hi chu a pawimawh lo ni lovin tunah chuan khawvel min nuaitu hi a rapthlak a. Mizoram-ah health infrastructure tha kan nei lova, hmanni ka wind up a ka sawi tawh ang khan kan sawrkar hi 2019-a intan ang a ni, 2018 kha chu December, krismas dawn a nih avangin. Chutachuan sawrkar kum khat chiah kan han kal a, Covid-in kum khat hnuah min han nuai a, damdawiin tha kan neih loh zia ka hre ve nual hman a. Doctor tha kan nei lova, medical equiptment leh machinery, khawl leh damdawi tha kan finna leh remhriatna nei vea kan han tih ang chi, ropui lo hle mahse kan tum ram a la thlen hmain Covid-in min han nuai ta a. Chutah a han nuaia a tlawm tlawma tang te hi khawvela ram ropui kan tih USA leh Europe ram te an ni, kan hre veka nikumah khan. A hluar lai tak tak phei kha chuan a sing bi tak taka sang eng emaw zat tel kha nikhatah an han thi pup pup mai te kha a rapthlak lutuk a. America ram ropui ber kan tih te kha a tlawm a ni, ICU-in a daih tawh lo reng reng, PPE nei lovin an au a, nurse nu pakhat phei kha chu a khawngaihthlak lutuk anih kha. Chutiang chuan khawvel kha min ti lungngai a, lungngaiin kan kun a, kan mangang a, chutih lai tak chuan tukinah ka hrechhuak zawk a, German ram an State Finance Minister a hming chu ka hre chiah ta lo a, kha khan an rama he thilin a a nuai chhohna tur atan khan an ram economy nen an thlunzawma, State Finance Minister a nihna zawnah khan, a tawrhleawm dawn a ni, kan tuar zo dawn lo a ni tih hriain suicide, mahnia intihlum kha a niin ka hria a. Khatiang khan khawvela ram kan ngaihsan ber pawh an thlaphanga an mangang tak zet a ni.

Chutih lai tak chuan vawiinniah hian kan sawrkarna nen a lo in nang a, a dik. Thenkhat chuan, “MNF sawrkar lai tak hian engatinge hetiang thil hi a thlen thin” an ti a, a

dikna lai pawh a awm ang. Kan sawrkar term hmasa tawp lam khan kan hria a, *tampui* alo thleng a, mahse Pathian-in min tanpui a, riltama thi pakhatmah kan Chief Minister min kahhruaina zarah a awm lo, ram mipui tanrualnain.

Tin, chu lo lelah chuan nikum ber kher Covid avanga kan lungngaih mangan kumah khawchhak lampang Champhai district-ah lirnghingin min han nuai kher kher mai kha chu, thil pahnih a han thleng kawp kha chu a tuarhlelhawm a ni, a hahthlak a ni, lu a hai takzet, tupawh sorkar sela Mizoram-ah hian an hah ve chu ka ring khawp mai. Kan facility thatloh zia kan hre vek a, tihtat that theih pawh a ni lo. Kumin pawh hi Covid lamah chu a kiem ngei mai a, chutih mek lai erawh chuan harsatna kan han tawh ve leh hlek chu tun maiah khan Pu Ramthanmawia, khilam kan bialtu zahawm tak hian min rawn hrilh zauhva, “mi 163 Myanmar atangin Farkawn-ah mikhual kan nei thar ta; RAgT test-na tur Champhai-ah a rang thei ang berin thawn a ngai” a ti a. Kan Health officer ten rang takin naktukah ‘thawn nghal rawh u’ kan ti a. Kan hon. Chief Minister-in, “kan u leh naute kan hum tur a ni” a tih kha, tukin zingah youtube-ah thildang dang ka han en chu khawvel, America thleng khan kan CM hi a mak ka ti a, an rawn chhuang em em a, an fak a ni. Chuvang chuan, ka hriat veleh kan hon. Chief Minister pawh kan phone a congratulation ka han pe nghe nghe a ni. Chu chu a ni, vawiinniah hian mimal pawh a tul hunah chuan kan fak a ngai, mahse fakna ringawt kha chuan kan hun kan hmang bik lo, tul hun hi a awm a ni tih kha ka sawi duh mai a ni.

Sum chungchangah ka ngaiantuah thin a, nikum chhung zawng khan harsatna tam tak nei tur kan nihna karah kan Chief Minister hi chu a fan tawp thleng hian a fan thei a, thil engkim min enpui vek lo mahse kan va thlen ang ang engkim mai hi harsatna a siam ngai lo reng reng. Audit tih te kha chu kan hmachhawn tur a ni, duhdan phei chuan thla thum danah hian department tin hi min audit se, internal audit a ni, a tha. Kan sawrkar hnathawk pawh kan fimkhur phah, Minister ho pawh kan fimkhur phah, thil tak tak kan tihna tur atan kum khata audit lohin rei deuh deuh awm a, audit lova thil awm ai chuan a hun taka audit hi ti thei se Accounts & Treasury lam hian a that ka ring a.

Tin, State Referral Hospital hi nichin khan kan member pakhatin a rawn sawi sauh va. Opposition MLA ka nih laia ka private resolution kha a ni ve a, kan sawrkar hmasaah khan kan han din nawk nawk a, kan ngaiantuahna pawhin engkim kha a pha bik loving, mahse a dintu chu kan ni. Tichuan a hnu zelah ‘ZMC’ tih a lo ni ta a. Thil tih an nei lo kan ti reng reng lova, TB Laboratory a lo nei te kha a tha lutuk, sawrkar hmasain an lo dah te kha a tha lutuk, a hun takah an lo dah a ni. Chu chu emergency takin he kan House chhunga kan MLA te ngei Dr. Mathana te, Pu Lalthangmawia te, Prof. Mawitea te pawh an mangang a, a rang lama Guwahati leh Silchar-a sample thawn tur kha National Lockdown hnuaih atih theih tawh si lova kan mangang a ni. Chuvang chuan University lam MZU te, RIPANS te, College of Veterinary lama kan hotupa te pawh kan han be nawk nawk a, in neih ang ang te pawh rawn fawm khawm ula, a part kim lo hi vuah khawm ila a tih theih mai lawm ni kan ti a. A nihna takah chuan ICMR chuan heti ringawt chuan an function tir dawn miah lo. Mahse kan

tawngtai a, ram mipui kan tawngtai a, mak deuh maiin chawlkar khat chhung khan installation permit kha min pe a ni. MNF ten credit va la zawng hian resolution hi a lo duan ka ring miah lo, kan vaia kan thawh tlanna a ni. Chutah mimal hming te pawh han sawi ila, Hauva & Sons Pu Tluanga'n RTPCR khawl in mamawh a ni ang a ti a min han pe a. A pek dan phungah khan 'chuta tan bik' tia pe a nihloh avang khan, ZMC-ah pakhat kan nei a, a chawm zo lova, tah chuan kan han fit mai a. Kan MLA zahawm tak Thorang bialtu pawhin a han pe a, mahse a pekna lai Lunglei-ah khan Laboratory set-up sa a awm si lovah chuan a buaithlak ta a ni, kan lawm lo a ni reng reng lo. Tin, ZMC-ah chuan 'manpower' kan ti a, doctor te, Lab. technician te leh thawkta dang zawng zawng an lo awm tawhna a ni a. Kan lawm em em a, mahse thil implement a theih mai thin loh avang khan kan inhriat thiam hram hram ka duh a ni.

Pakhatna kan nih leh nih loh laia kha chu kan sawi rik dan hi a ni miah lova. Heti hian ka ngaihtuah a, Govt. of India in December thlaa kan nih zat tur a sawi lawka hi chu a daw hle mai a, Pathian avang a ni, kan sawrkar, Chief Minister zahawm tak hovin theih tawpin kan insawr fu tak zet zet a ni. Medical Operation team Chairman, Dr.Thiamsanga ka fak thlawt a ni, ani ang kha kha tih hun laia che tur kan medical doctor rual te nen khan nei lo ila chu kan mualpho ngawt ang. Khang zawng zawng kan han thawh khawmna rah te pawh kha a ni a, accumulative case kan neih hi tunah chuan, Sikkim-in 7,000 dawn a nei a, keini chuan 4,345 chauh neiin leh nunna hlu tak kan chan pawh hi 10 a ni a. Heti zawng hian a tehfung te hi ka nei ve a, Sikkim, Mizoram mihring zatve chauh awmnaah mi 135 in nunna an chan tawh a, Assam-ah 1,079, Tripura-ah 308 leh Manipur-ah 373 in nunna an chan tawh a. Ram hrisela kan ngaih thin Meghalaya, zirnan pawh kan duh em em pawhin Pu Speaker, mi 148 in tukin thleng khan nunna an chan tawh a ni. Chutih laiin 'co-morbid', natna benvawn neih vanga thi te pawh an ni kan ram ami te phei chu. Pathian chuan min hruai a ni. Kan sawrkar chauh nilo ram mipuite kawng tin renga kan tanhona mal a sawm a ni tih i pawm hle ang u tih hi ka sawi duh a ni. Chuvang chuan, kan recovery percentage te hi an sang khawp a, national recovery percent ai chuan sang tak a ni, tunah hian 99.57% daih a ni, 100% em chu a la ni lo.

Tin, he resolution kan sawi mekah hian 'digit 2' ni lovin digit 1, pakua chiah active case kan nei te hi min hruaitu chu a awm a ni tih a chiang em em mai a, hei hi ka tarlang duh hmasa a ni. A dang lehah chuan, tlema kan hriat zau lawk hi ka duh a, March thlaa positive case pakhat kan neih hi imported patient a ni. Netherland atangin a lo kal a, amah pastor a ni a, mahni invawng fel tak, ni 45 lai mahniin a awm a. Dik tak chuan eng emaw chen, chawlkar hnih khat a awm kha chuan ka thla a phang a ni. Doctor ICU-a awm hi zan tin ka va bia a, anni pawh an thla phang mahse an thlaphang aw kha chhuah a rem lo. Amaherawh chu kan tawngtaina avangin vawiinah damin keini ai maha hriselin a awm ta a ni. Dik tak chuan April leh May-ah khan covid test-na kha kan nei tawh a, mahse negative hlir a chhuak a positive a chhuak thei lo a. kan han sawisel deuh hlek hlek a, a khawl a dik lo ani ang kan ti a. Mahsela June thla a ni a, positive case 159 kan tling ta a. July-ah 253, August-ah 599, September-ah 1,006, October-ah 740 kan ni ta a. November hi a san lai ber

niin 1,089 kan tling ta a. "December-ah 5,000 chuang in ni dawn" tih warning min pek lai khan, 369 chiah kan ni ta a. January thla kan han bang liam leh a 156 chiah kan nei a, February-ah Pu Speaker, 50 chiah kan nei a. Vawiin Ni 12.3.2021 thleng hian March thla bikah 13 chiah kan nei a ni. Chuvang chuan, vawiina kan resolution ina hemi chungchanga thil lawmawm tak kan rama lo thleng hi lawmthu i sawi ang u a tih hi, 'he resolution a va timing em' tih ka tarlang duh hrim hrim a ni.

Tun hunah hian active case 9 kan neihah hian Aizawl hi 7 a ni a, Champhai ah 1, Saitual ah 1, district dang zawng zawngah hi chuan positive an awm lo a ni. A bak ka han sawi leh duh lawk chu, case kan neih tawh zawng zawngah 4,435 ah hian Aizawl District ringawt-ah 2,905 kan nei a, a dawttu chu Lunglei niin 418 kan nei hman a, a pathumna Lawngtlai 340, a palina Kolasib 295, a pangana Serchhip 180 a ni a, a parukna Champhai 106 a ni. Case nei tlem ber ka sawi hreh deuh hlek a, Hnahthial District a ni. Hreh tak chungin ka sawi anih chu aw, a nuamlo thin a hetiang sawi hi. Tun dinhmunah hian active case 9 kan nei a, Civilian 8 leh frontline worker 1 a ni. Chuvang chuan vawiina kan resolution-in a tuma hi, 'India ramah a ti tha ber pawl kan ni' tih trend hi chu a kal a ni tih ka sawi duh a ni.

Lawmthu hi in sawi tam tawh em em a, in lawmthu sawi zawng zawng kha ka ring tawh mai dawn a ni. Lunglei lam kal tur ka ni bawk si a ka ti a, mahse khalam ai kha chuan a pawimawh zawk ka ti a. Sawi tur hi an tam khawp a, kan Chief Minister, Finance Minister ni bawkin , ka sawi tawh a nichin khan, engkim kan mamawh, engmah reservation a neilo hrim hrim a ni tih hi. A bikin Covid kan dona kawngah hian tih hi ka puang duh a ni. A ropui ka ti a, ani hi Pathian-in a hun takah min pe a ni tih hi kan hriat ka duh em em a ni. Dik tak chuan khawvel min tih tihbuai zia kan hria, ka sawi tawh lo ang a khalam chu. Ka sawi leh duh lai tak chu Mizoram chauh a ni lo, ram pawnan kan medical doctor pakhat pawh covid-in, chu pawh amah private hospital, medical doctor senior tak mai Dr John, Shillong, Meghalaya-ah kan hre vek ang a. Ani phei kha chu Shillong-ah rei tak lo awm tawh ka nih vangin kan inkawmngaih a, Hospital tha lutuk mai, Bethany Hospital a nei a. 'Pu John-a leh a family an kai' an han tih kha chuan rilru hi a khawih khawp mai a, a fate ka zuk phone nghal a. Ni 2 ni 3 hnuah khan a chatthla ta mai a. A fate leh a nupui an han positive zui a, a makpa te nen lam an han test a. A tawp a tawpah chuan negative in an han chhuak ta a. Meghalaya Health Minister ka zuk phone a, "In inbuatsaihna hi engnge" ka zuk ti a, khatih lai khan engmah an lo ni lova, han hauh hrep kha ka chak khawp mai a. Quarantine Centre pawh an lo nei lo va. Covid dedicated hospital pawh an lo nei lo reng reng a ni. Chumi hnuah Mumbai lamah cancer vei lai positive patient hmeichhe pakhat kan han nei leh a, a va han manganthlak duh tak em.

Mumbai-a Mizoram House kan neih phei chu a room kha a inzawm put mai a, social distancing chu a theih loh hrim hrim a ni. Chumi karah chuan a han vei hlauh mai a, an Chief Secretary ka zuk bia a, a tih ngaihna tak pawh a lo hre bik lo a. Health Minister phone number kha rang takin neih dan ka ngaihtuah a, ka zuk phone a, a lo fel khawp mai a. Pu

Rakesh hi term 5 lai MLA leh Minister lo ni tawh a ni a, ‘khawngaih takin a lakna tur dik takah min laksak nghal rawh’ ka ti a, minute hnih chhungin Mizoram House-ah ambulance a tir phei a ni. Darkar khat aia rei tlan ngai a ni a, Ambulance chuan an la a, a dahna turah an han dah ta a. A han buaithlak zia mai chu, cancer patient kha an attendant te nen an zavaaiin 50 vel an awm a, khangho zawng zawng kha hma tel an ngai a. Kolkata-ah Pu Rohmingliana nge Pu Rohmingthanga, kha a lo ni ve leh a, ani phei kha chu phurh theih lovin khulamah vui liam a ni ta a ni, a rapthlak lutuk. Khawvel ang pawhin an invui dan te kha kan lo hmu emaw, *mass burial* hi a ni ringawt a, a rapthlak takzet a ni.

Mizoramah pawh kan han nei ve zeuh a, chhungte’n ruang an kil thei lo, lam hla kalna tur hun a awm lo. Chutiang khawpa manganna rapthlak tak mai hun kan tawn lai kha vawiina kan han su tlang chho ta hi a ropui a. “*Laipa’n he ramah hian thil ropui tak min tihsak a ni*” tih nichina in sawi kha ka pawm thlap a, a dik a ni. Chutah a hmanrua atan Chief Minister, a hun taka che thin, ngaihtuahna seng leh tawngtai mi kan nei te hi a lawmawm a. Kan Minister zawng zawng te pawh hi ka fak che u a ni. “*Pu Zir, power supply lam a ngai*” te kan ti a, kan Deputy Chief Minister pawhin BSUP building te kha min lo phalsak zung zung mai a, kan Agriculture Minister-in thlai leh thil dangah min buapui bawk a, Sports lam pawhin eng tin tin emaw min lo pui ve leh a. Pu Manuna te ho bakah Pu Chhantea’n vaibelchhe 20 tel te a han sawr chhuak leh a. Khang kha han sawr chhuak lo se a tih ngaihna a awm dawn lo hrim hrim a. Tin, kan Home Minister hian ngaihtuahna a seng nasa hle mai a, police force te mai piah lamah DM & R Minister a lo ni bawk a. A mimal tin mai, Pu Beichhua te pawh a ni, kan zavai hian kan thawk tlang takzet a ni. Chutih lai chuan kan MLA zawng zawngte pawh hi theihtawpin in tang takzet a ni. MLA Fund kha chu kawng dang ni se la, khami piah lamah khan ngaihtuahna inseng nasa lutuk. Covid hian Mizoram mipuite hi zai khatah min luahkhawmtir a, lungualna tlanga min hruai khawmtu issue dang kan nei leh ang em aw tih hi ka ngaihtuah thin a ni. A sawrkar mai ni lovin, sawrkar department zawng zawng kan tangrual a ni.

Kan Chief Secretary pawh hi ka fak thlawt a, a ngaihtuahna a seng nasa em em a ni. DM & R lama kan Secretary pawh hmeichhe fel tak a ni a, kan Police Department leh I & PR lam ngat phei chu zan pawh mu lovin kan Minister ho hian an thawk rim lutuk tlat. Kan Food & Civil Supplies Minister thawhrim zia te kan hria, TV atang pawhin Bairabi leh Kolasib lamah ringawt mai in hmu anih kha. Chuvang chuan, vawiinah hian chhuan bik, ti tha bik tih tur an awm lova. Keipawh Health Minister he tih hunlai hian ka ni a, mahsela ka thusawi pakhat vawiinah hian a la nung reng a, “Covid-19 a han awm meuh chuan ka nep zia ka hre tulh tulh. Mahse min tanpuitu ropui zia hi a lang tulh tulh” tih erawh chu ka sawi nawn leh duh a ni. Sam 46-naa a sawi ang khan, “Pathian, kan inhumhimna leh kan chakna, mangan laia tanpui vartu hnai reng” kan nei hi a ropui lutuk a. Chu chu a ni, kan Chief Minister, Chief Minister-a nih hmaa a phuah kha min rawn thawng dawt dawt ka tih lai kha a ni. Eng anga raldo lian hmachhawn pawh ni i la, kan Zoramah Lal Krista kraws a ropui ber. Mizoram chhunga zofate chauh ni loin Zoram pawn hmun tina mite tawngtaina nen, YMA leh kohhran ho that zia te, quarantine centre atan an Kohhran Hall-te min hman tir

bakah an eitur te an tum a. Village Council, Local Task Force te, district-ah DC zawng zawngte leh an thawhpuite an che vek a, State level-ah kan Chief Secretary-in hneh takin min coordinate khawm a, sawrkar hnathawk pawl hrang hrang sawi sen an ni lova, an rawn insawr chhuak tup tup mai a, sum leh pai nen a ropui lutuk. Bank, Corporation leh mimal, chhungkua leh pawl hrang hrang, vawiina ka ngaiantuah letin a ropui ka ti lutuk a, lawmthu sawi tur a tam em em mai a ni.

Healthcare Workers, ‘doctor’ han tih ngawt pawh hi a ni lo, kan doctor-te bakah hian an tam lutuk, vawiin tleng hian volunteer, hlawh la miah loin ‘ka la thawk zui ang’ tih hi sawm thum dawn kan la nei cheu a ni. Vairengte-ah pawh an awm, ‘liability a la awm’ tih Pu Hlana sawi pawh kha a dik ang. Covid-19 hi a la kiam lo a, nimin tleng khan SPAB meeting pawh an la neiin ka hria, la inrin reng a ngai. Myanmar atangin mikhual kan neih phei chuan tih tur a la awm reng ang, a la tawp lo, a la *full stop* lo tlat a ni. Chuvang chuan a la in *wind-up* thei lo, leiba eng emaw la *clear* loh pawh a la awm mahna.

Ka sawi leh lawk duh chu Pu Speaker, min hrethiam mai la, nikum kumtluan a kan buaipui kha a ni a. Kan ti tha ve thawkhat nia ka rinna mai mai chu tlem lai deuh khan USA mi The Wall Street Journal-a an Deputy Bureau Chief, South East Asia bialtu hian Mizoram hi a rawn pan nal nal a, “khawvel huapin in ti tha deuh berin ka hria a ka rawn zirchiang a ni” a ti a, a zir report erawh chu nakin ah a copy min la pe turah ka ngai deuh a, a lawmawm hle a. Nichina MLA Pu Thangmawia sawi pawh kha a dik a ni. Rajasthan khawpui Jaipura Hindu chanchinbu pakhat-ah khan, Covid-19 positive te enkawl that an nih zia te, VLTF, YMA leh Kohhran pawlte leh international border nei thui, km 722 nei kan ni a, a hautak zia te, Inter-State border Vairengte, Kolasib district phei chu district dang ai zawng zawngin an hah filawr lak a, a ropui lutuk, district dang tam tak pawh kan hah lutuk tlat. Chuvang chuan lawmthu sawi tur hi a tam em em mai a. Kan sawi hmaih hauh loh tur chu, ram mipuite hian thu kan va awih em tih hi. Kan ngaihdan anih chiah loh pawhin a kawi a ngil hian Covid-19 bik chuan min hruaikhawm a, kan lo phun deuh anih pawhin thu kan awihna hi Pathianin mal a sawm tlat a ni tih hi ka chiang em em a ni. Hei hi a ropui ka ti em em mai a, ram mipuite hnenah pawh hian lawmthu sawi tur a tam lutuk a ni. Laboratory-a tlaivar zak zaka thawk tih te an tam em em mai a, kan Police duty zawng zawngte vawiin tlengin zan an la tlaivar thak thak a ni a. Kan Addl. DGP chhuak ta te phei kha chu zan khat zanlaiah ka tlan chho a, Coffee Night zan kha a ni a, dar 12 velah khan Vaivakawn-a amah ngei a lo duty kha ka hmu a, a mak ka ti khawp mai a. Tumah hian kan dinhmun kha inhrawt loin tlawmna nun nen kan thawkchhuak a, a ropui tak zetin ka hria a ka sawi lo thei lo a, chu chu vawiinah hian kan hriat ka duh em em pawh a ni.

Tin, heng bakah hian, MLA thenkhat ti tha bik te pawh in awm maithei a, a dik ang. Kha Mathlana kha, a bial kha sanitizer litre sang eng emaw zat chu ka siam a ti a keipawn ka leisak bawk a. A dik, a tha, midang pawhin in siam maithei kan hriat lohin. Tin, chubakah chuan mimal leh pawl anga PPE leh face mask thuite an tam em em mai a, a ropuiin

lawmawm ka ti em em a ni. Ruatfeli nu nen pawh hian kan inhmu zeuh zeuh a, thahnem hi a ngai em em a ni.

Heng zawng zawng baka ka sawi duh chu, I & PR department leh a Minister hi an hah em em ani. Dr. Thiamsanga hian talk show hi vawi engzah nge a buatsaih ang le? In en zing viauin ka ring a ni, a ropui khawp mai. Kan Minister pawh rin aiin a in fit khawp mai, hah hi an sawilo a ni. Tin, kan electronic media ho, Doordarshan te, All India Radio te, LPS leh Zonet te, print media ho te, tin, social media group hrang hrang, internet kaltlanga he covid-19 dona kawnga beitu te, sawi sen a nilo. Pu Speaker, nangmah ngei pawh hi ka sawi tel duh tlat che. Kan mangan lai tak, MLA thenkhatin an kai ve zeuh lai khan dahna tur kha kan buai a ni. Kan rawn ngen che a, remchang min siamsak a, MLA Hostel hman min lo phalsak a, Assembly pawh hian contribution tha tak in nei a ni. Pu Speaker, in chungah kan lawm takzet a ni.

Vawiinah hian lawmthu sawi tur dang tam tak ala awm, kan sawi vek seng lova. India sorkar chungah pawh lawmthu ka sawi a ni, phone phei chuan kan sawi reng mai. A bik takin ICMR, Prof. Balaram hi la inhmu miah silo hian telephone hian inhmu tawh thin ang mai hian kan inbia a. Tuna ZMC-a min pek tur VRDL Lab. ah phei hi chuan manpower a free in min pe a, a khawl a free bawk a, a chung sangah a sakna tur hrampa awmlovin Thawhtan velah hian TBL laboratory kan sawn chho ang a, covid kan han ti chho dawn a, nichina kan ngaihthlak tak harsatnate kha kan su kiang thei turah ka ngai a ni. Thil tam tak min pe a, PPE te leh thil dang dang Ministry atangin a thlawnin tam tak kan dawng a, NEC atang pawhin a pawisa tein kan dawng bawk a ni.

Tin, kan Chief Minister zahawm tak hmalakna hi ka sawi leh lawk duh a. Amah hian hmeliat tha tak tak alo nei a, chung ho chuan a nuai bi dawn dawn PPE te leh eng eng emaw chi hrang hrang, box lianpui pui, motor liana trip tham dawn dawn hi a rawn thawn tir thei reng mai te kha, foreign lam, Taiwan atang pawhin box lianpui pui alo thleng a ni.

Dik tak chuan Pu Speaker, Covid-19 kan hmachhawn tirh khan Delhi kan zuk phone thin a, a buaithlak lutuk a. Zankhat phei chu a chuhin kan inchuh a. PPE kha Military Force leh Company in an chuh bawk a, kan han buai tak tak mai anih kha. Khami zan kha chuan Chief Secretary ho khan kan tlaivar deuh thak a ni, buai tak kan ni.

Tin, Finance Department chungah hian lawmthu a sawi loh theihloh a, theihtawp min chhuah sak a, file pending lo thei ang berin min tih sak zung zung a, single window clearance niawm tak khan min tihsak zung zung a, kan lawm tak meuh a ni. Department dang tam tak chungah pawh lawmthu sawi tur a awm, Education Department ngat phei chu Association-in Ambulance thar hlak pasarih ngawt min pe tawp mai a, Bank leh a dang dang atangin ICU-a hman tur khum man to pui pui kan dawng bawk a. Tun hunah hian kan sawi seng mawlhlo, Covid-19 chhunga heng zawng zawng kan tih theihna chhan hi Pathian kan auh nasat vang a ni ka ti tlat. Kan Chief Minister pawh hian mimai taka tawngtai puitu a

ngah ka ring, keipawh min tawngtai pui nasa, kan MLA tepawh an ni ang. Chu chu nilo se kan tan do zawh rual a ni lo. Ram ropui an tlawm laiin kan ram tun dinhmuna kan ding hi a ropui lutuk a, Pathian hnathawh ropui kan chang tlang a ni. Chuvang chuan vawiina kan resolution hi a pawimawh khawp mai a, kan MLA zahawm takin tukin zing lamah tam tak a rawn sawichhuak tawh a, a lawmawm khawp mai.

Pu Speaker, lehkha min rawn pek zauh kha ava lawmawm ve maw le. Kan Speaker hian a chhuah lawk chhungin Bangladesh High Commision lam atangin phone a dawng a, ‘April thla tirah lokal kan tum e’ te a ti a ni a, hei. Border trade kan tihna tur kawngah pawh hian hon. Speaker hi i tangkai tawp a, tun hmain Trade & Commerce Minister te alo ni a. Hei, April thla tirah te lokal an tum ta ut ut a, keini pawh kan CM phalnain karleh lamah hian liamthlak zawk te kan tum a. A dik a ni Pu Hlana sawi kha, kan economyhi covid hian min ben harhna chu, thlarau lampang thilah pawh min beng harh a, auh tur dang awm hek lo, kan au lo thei tlat lo, Prime Minister ho khan kan han au rual vel kha a nia tirawh u. Khatiang auruala kha chu kawngdang a ni a mahse, keini Pathian nung kristian ram ringtu chenna ram kan nih hi vawiin niah hian kan vanneihna a ni thlawt a. Media tam tak ho hian phone-in min rawn be thin a, “Mizoram hi in va han ti tha em em bik ve” tia an rawn sawi hian, “ngawi rawh u, lokal rawh u, hei chu sawitham a ni, telephone-a sawi mai chi a nilo” ka tia. Chuvang chuan, economic revival ti mai ang, tuna Opposition group leader sawi lai pawh kha a dik khawp mai, min beng harh a ni han tih ve theih tur hi a awm a ni. Pawn lama tanga innghahna ringawt hi chu ava han nilo em tih hi covid hma pawh khan kei chu ka harh tan tawh a. Hei hi a ngai a ni, mahni economy hi, sawrkar hnathawh ringawt hi a ni lo. Sawrkar hnathawh piah lamah hian thil tam tak Pathian-in he leilung a min dah chhan hi a awm a ni tih hi hretlang ila. Tin, Pu Rokhaw sawi kha, ‘MNF sawrkar’ tiin kan dah lo a, ‘sawrkar leh mipui kohhran pawl’ kan ti a, Congress tih kha han dah kher kher kha a ngai miahlo ania aw. Zau deuhin, tihian kan ram mipui zawng zawngin tih hi a awm zawk a. In duh dan ang thlapin kan resolution puluttu hian a rawn dah zawk a ni tih kan hriat kha a pawimawh.

A tawp berah chuan Pu Speaker, kum khat chhung khan ka ngaihtuah thin a, telephone kan dawng tam em em a, keimah pawh hian ka dawng tam a ni. ‘Hei hi chu aw, ka buaipui tur a ni chiah lo’ ka tih te pawh hi ka dawng tam lutuk. Tangkhang an tam si a, a sing tel a rapthlak lutuk a, an mangang tak zet a. Khatih karah khan leh thil tam tak test chungchangah te pawh a ni ang a, sample lak chungchangah te, ‘kan veng result ava chhuak har ve’ tih zawng zawng kha kan hriat vek kha. Thenkhat chaw nghei dawn dawn te pawh an lo awm kha maw. Khang zawng zawng karah khan mimal takin health changtu tlinglo taka ka nih chhungin, in rilru ka tihnat tam tak a awm ang tih ka ring. Khawngaih takin in ngaihdamna tunah hian ka dil tak zet a ni. I inngaidam tlang ang u; sawrkar anga kan hmalaknaah pawh hian sawi dawn chuan, ker ker dawn chuan a tam ang tih ka ring. Nimahsela, chumi karah chuan tun dinhmun hi Pathian-in min hruai thleng miau a ni tih hi hria ila, kan chan tawkah hian lawm ila, inngaidam tawn ila, inhrethiam tawn ila, kan

hmalam zawk hi a eng zawnga thiante nena lungualna tlangah ke pen zel turin vawiinh hian he resolution pass tura kan sawm rual che u in ka han tarlang duh a ni. Ka lawm e.

SPEAKER : Awle, kan Health Minister Dr. R. Lalhangliana hian sawi tur a ngah ngawtin ka ring a, tunlai tawngin, No. 3 bela No. 5 thlak ang vel anih ka ring a. A sawi duhte hmanhmawh takin a sawi a, tunah kan Chief Minister zahawm tak thusawi turin ka sawm e.

PU ZORAMTHANGA, CHIEF MINISTER: Pu Speaker, ni e, ni danga kan ban hun thin dar 4 a chanvein a pel tawh a. A tawi thei angin sawi ila kan duh tlang viau tawhin ka ring a.

MNF history-a Pu Denga'n a sawi chu, "Lungmual unit-in headquarter pawsia kan pe dawn che u a, headquarter atangin a dawngtu tur lo kal rawh u" an ti a, Pu Zanenga leh Pu Rochhinga kan tir thla a. Pu Rochhinga'n an sawi a, 'Kei chu thusawi ka thiam law, ka hnungah Pu Zahminga'n a rawn sawi dawn a, tih zawng chu ni mai rawh se' a ti a, a thu ta a. A hnungah Pu Zanenga a lo ding ve a, 'Nia' tih atangin a han tan a. Kha Pu Rochhinga'n a sawi zo vek tawh a, kha kha ka sawiah ka ring mai e, a ti a, kan tling tla ta mai e,' a ti a. Vawiinh hian Pu Thangtea sawi kha ka sawiah ring ve mai ila, a lawm pawh kan lawm viau tawh a.

Pu Speaker, CM fakna te a ding apiangin in han ti a, a lawmawm a. Kan limitation in hre vek a, kan tlinlohma zawng zawng; Chuti chunga a hminga sawrkar hotupa leh *Pa ber chan chang chu min han fak liam liam thin a*, a lawmawm a. Amaherawhchu, technical thil hria kan ni lova, a takin engmah han thawh tak tak theih kan nei lova. Hetah hian eng zawkah nge kan kal ang an rawn tihin, heti hian i ti ang hmiang kan ti a. Thutlukna siamtua te kan lo tang a, kha kha kan tangkai vena a ni mai a. Chuvangin a ropui ka ti a, a lawmawm ka ti a. Amaherawhchu, limitation kan ngah em em a, kan tling lo tih kha in hria e. A takah chuan kan Health Minister te, kan MLA Pu Thiamsanga te leh kan worker ho zawng zawng, a frontline-a thawktu ho kha a tak a kan fak ber turte an ni a. A piah lamah chuan mipuite, kan volunteer-te zawng zawng, kan kohhran, NGO leh a dang te kha an ni a. Anni kha a tak taka thawktute chu an ni tih erawh chu kan hriattlan a tha ka ti a. Pathian-in remruatna, hman atanga lo siamtuin Covid hi Mizoram hian kan vei dawn a ni tih lo hrelawlk tu vekin tuna kan ZMC Referral Hospital, tin, Myanmar harsatna lo kal chhoa min buatsaih sakna te pawh Pathian remruatnaah lawmawm ka ti a.

Referral Hospital pawh ka sawi ve duh lawk chu, Pu Deve Gowda hunlai khan vaibelchhe 40 vel min pe a, a tihngaihna kan hre hlawm mang lova, Referral Hospital din nan i hmang ang an ti a, a building chu kan han sa ta hlawm a, tichuan, a pawisa a zo ta mai si a. Ka hriatreng chu crore 5 hi installment hnunng bera release tur kha DoNER khan a release hleithei lova. DoNER Secretary nu hnenah ka zu kal a, theihtawpin kan han nawr a, a thar a lo awm a. "A nih leh ka pu, he 5 crore sanction tawh release tur nawr tur ngat hian

i lo leng a ni maw” a ti a. “Ni e, kan leng ngun teh a nia, hei ringawt nawr chhuak tur hian kan bei rei a ni” ka ti a. “A va mak ve” a ti a, Joint Secretary a ko a, “rang takin release rawh u” a ti a. CM meuh ina nawrah chuan ho a ti lutuk. Khatih laia kan dinhmun harsat zia ka sawi a nih chu.

Tichuan, crore 40 chuan engmah a thlen lova, ‘engtin nge kan tih ang’ kan ti a, min ngaihtuah pui ta a. Engah nge insak nan in hman, tih khan DONER ho te, NLCPR rawn control tu ho khan min hau thin a. A tawpah ka thinrim vein, “tih emah chuan nangni pawh Refferal Hospital sa dawn ila vaibelchhe 200, 300 a ngai a, vaibelchhe 40 chauh min pe a. Referral Hospital tha tak sa turin min beisei a ni, a nihna takah chuan, mahse airgun min pe a, sai kap turin min beisei a ni, in ti thei bik dawn em ni” ka ti ngat a ni. Tichuan, kan tawp ta ringawt a ni. Central-in a ti thei silo a, a tawpah Health Minister-in, thawhpui tur zawng rawh a ti a. Khutah St.John’s Hospital a mi te nen, hetah hian co-ordination tha tak nei ila, a building kan neih sa khi um ila, khitah khian St.John’s Hospital nen Refferal Hospital din dan i ngaihtuah ang u tiin a tawpah kan kal a. Health Minister-in “i tih puitlin chuan, agreement in sign chuan lokal la, pawisa kan lo pe ang che u” a ti a. Amaherawhchu, a hun hma khan kan term a tawp ta a, kha kha a tawpna a ni.

Chuvangin, crore 40 a dinah chuan a tam khawp ka ti a. Khang zawng zawng atan a tawk loh zia kan hria. Amaherawhchu, a hnuah khan Pu Speaker, nangman i hre chiang zawk ang a, crore 180 lai lo kal leh in tih kha, saw mi din nan nge, eng tur nge ka hre lova. Khati khan a lo indin chhuak chho a, keini pawhin kan theih tawkin kan umzui a. Tichuan, Covid lokal hun laia kan inenkawlna tur ber ZMC-ah kan chhuah theihna turin Pathian-in remruatna chi hrang hrang a lo siam a, a va lawmawm em. Khang te kha ka han sawi duh a ni.

Tin, Mizoram State hi a ti tha ber kan ni em tih kha, State-ah chuan ni chiang e, damlo pawh an awm mang lohna island te reuh tete chu a awm, mahse state-ah chuan Mizoram kha a ti tha ber kan ni tlat India ramah. Chuvangin, a dang zawng zawng pawh vawiinah mortality rate chu 10 emaw lek kan ni, a dang chu 30, 40, 100, 200 tel khan an kal chho vek North-East-ah pawh, central-te chu sawi loh a lum a ni. Chuvangin Mizoram hi state-ah chuan he Covid donaah chuan a ti tha ber kan ni tak zet zet a ni.

Tin, a sawifiah tur lai tawi te te kha kahan chuklawr den den ang a. ‘Audit’ tih te kha sawi ila in awih lo maithei, Health Department-a audit kha ka hre miah lo, a chhan chu kan pawisa pek kha khatah kha chuan kan vawm lut tawp tawp a ni, Covid fund kha chu a hran a ni. Mahse Health Department-ah khan a mamawh si a, kan neihchhun kan vawm lut tawp tawp mai a, Chief Secretary ho khan, ‘Ngawi teh u, heti ringawt chuan kan in audit loh chuan a tih dan pawh an lo thiam lo ang e’ an ti a, an lo in audit a, a hriat pawh ka hre miah lo. Mahse a tha ta phian a, anni pawhin tih dan an lo hriat phah a, an lo fimkhur phah a, khangte kha a ni.

Tin, ‘leiba rulh tur, tuna la awm’ kan Opposition Group Leader sawi a ni maw Nuai 60 lai kha? Khangte kha chu kan rul em em ang, Covid fund atangin a ni emaw, sorkar fund atangin emaw khang kha chu kan bat a ni a, kan rul em em ang a. Hman niah pawh Addl. CS hnenah ‘chutiang chu ba a la awm em ni, kan MLA-ten an sawi a’ ka ti a, ‘ngawi rawh kan lo en ang e’ a ti a, ‘han en vat u la kan rul dawn nia’ ka ti a. Kha kha chu kan rul ang, kan tih ngei ngei turah kan ngai.

Tin, thil hote pakhat ka han clear ang a. Thenkhatin ‘pawn lama thiang lo MNF ho khan Vanapa-Hall ah hla an sa’ an ti a, hla kan sa miah lo a nia. Kan Chairman Pu Zawma khan, ‘tumah zai loh tur, kut ben chiah awih, hla record kha play u la’ a ti a. Kha chiah kha a ni a, ‘tumah zai awihloh’ a ti nghal thlap. Kha kha hla record play a ni a, kut beng an awm a, kut beng lo an awm a, kha kha zai sawiin an lo sawi thin a. Kha kha a ni hauh lo tih kha, zai chu kan it khawp mai a Chairman-in a khap tlat si a, tih kha ka sawi duh a ni.

Tin, keini ho hi kan felfai khawp a ti mai ang, kan infakna ni lo se la. Tuna kan sawi ang khan ‘an zawn che u, social distancing in keep lo’ tihte kha chu a dik khawp mai, kan inkar kha a inhnaiah deuh hlek maithei. Amaherawhchu, Prime Minister-ten Bihar leh, tunhnaiah pawh hmanah pawh Assam rally an han neite kha chu han en u la, ‘an zawn e’ tih kha chu thianghlim tak a ni. Khatiang kha khutah a rawn titu te an ni a, keini chu thu hi kan awih khawp a, Mizoram chu kan thianghlim tlang khawp a. Hmanlaia ringtu hmasate’n, ‘engatinge hnawhchhuah tur an ti a, hmeichhia leh mipa biakinah inhmlo a, a inhnungchhawn zawnga that thap tur kha an tih laiin hmeichhe lam hawiin a rawn hawi alawm, hnawhchhuah mai tur em ni’ an tih ang deuh kha a ni a. Eng emaw hlekah kan huat thu hi a chhe em em tawh mai a. Chuvangin, khu lam ngaihtuah chuan he lam chu kan tha bawk a. Prime Minister-in min rawn telephone a, video conference pawh kan nei zing a. Home Minister pawhin, ‘engnge in dihmun?’ a ti a, ‘keini chu kan ziaawm, rei deuh mai kha thi kan la awm lo’ kan ti thei reng mai a. Thi kan han awm ve pawh khan kan lo tlem si a, ‘engtin nge maw in tih bik le’ an ti a, ‘Ekhai, Mizoram chu tunah chuan battalion headquarter ang mai kan ni a, regimented society kan ni a, ‘tih tur’ kan tih chuan an ti vek mai, tih loh tur kan tih chuan an ti lo leh vek mai . Chuvangin Mizoram chu discipline a tha em em a, en ta che u, kohhran-te hian kan biakin te quarantine centre-ah hman an phal a. Chu chang a ni lo a, an eitur te zu tum zel a’ kan ti a. ‘Mizoram chu in va mak e’ an ti a ni, Home Minister-te Prime Minister-te pawhin. Keini chuan mak pawh kan lo ti vak lo a, ni awm rengah kan ngai. Miin an lo ti ngai hauh lo mai a, an niin kha kha an han hriat chuan mak hi an ti em em mai a ni.

Chuvangin, Mizoram mipuite, kan kohhran-te heng hi chu fakawm reng pawh kan lo ni e tih kha tun tuma Covid kan fight-naah hian min hriattir a. Ka duh ber mai chu a history hi ziaktu tha tak awm sela, kan MLA zahawm tak Dr. Thiamsanga te hi a detail kha hre deuh ber tur a ni ang a, khang harsatna kan tawh leh kan tih zawng zawng, kan lo kal dan te kha. Amaherawhchu, an hman bik a nge maw, a ziak chi an ni emaw, nakinah hian Health Department pawh hian .. (**Dr. R. LALTHANGLIANA, MINISTER: Documentation**

chu kan ti mek E) Aw, Documentation in tih chuan nakinah a ziak a compile thei tu tur, thangtharin Covid kan fight dan leh a boruak an hriat nan, a record tha, ziaktu khang kha chu a documentation umzuitu-ah khan kan neih ngei pawh thain ka hria a. Chuti lo chu, in han sawi ringawtah pawh khawl harsa tak mai lo kal chi hrang hrang kha tunah mai pawh khan keini hriat loh kan hriat thar a tam em em a ni. Chuvangin khang te kha a documentation leh a chanchin, a history ziaka kha, a *Sequence of Events*, thil thleng indawt dan te pawh kha kan tih chhoh a that ka ring khawp mai a, khang kha ka han sawi duh a, thawhhona tha tawp mai kan nei a ni tih kha.

Tin, kan han kal chhoh zel naah hian Biak-Ina zai leh zai loh thu tiyah pawh khan tlemin a hun hma deuh hleka lo aupui an awm a. Heta a committee kalkhawm zingah khan zai duh viau te kha an awm a, zai mai kha Biak-Inah hian a tha tawh mai lo em ni tih kha a ni. Amaherawhchu, sawrkar-ah file an rawn move a, a thuneitu sangin approve emaw, tih danglam emaw a awm hma chuan kha kha kan standard operation procedure thar tur a la ni thei lo va, sawihona eng chauh, Advisory Body a ni. Tichuan, a lo kal chhoh tan tirh khan thutlukna pawh a awm hmain media lamah khan ‘an phal e’ tiin an lo tichhuak mai a, kha kha record-ah pawh awm miah lo a ni a, chu chu a lo thleng chho a. Amaherawhchu, thuneitu sang zawk ten Doctor te rawna uluk taka an han tih khan, “E khai, vawikhat zai ringawt pawhin a nuai tel, hetia au chhuah hian Covid hri kan pah a sin, zaiin han lam kual vut vut mai ila pakhat pawh khan kai se a darh vek dawn a sin, tunah chuan a chiin a chi loh” an ti a. Keini aia hria kha an lo tam khawp mai a. Chuvangin fimkhur taka inkawm ni sela, zai erawh chu tih ni rihlo se tih kha tunah a lo kal ta a. Nakinah vaccine ta kan lak kim deuh leh a theih hunah chuan tha takin a zai pawh kan la zai turah ngai ila.

Eng pawh ni se, a lawmawm tih kan vaiin kan sawi a. amaherawhchu, thil pakhat kan sawi chu, kan thian pakhat chawbawm cancer an han zai chu, chawbawm cancer zai chu heliaih tawngna kha tih kuak a ngai tel tawh bawk si a, a hautak talh talh hle mai, a ti a. A dik bawkin ka ring a. Covid khati khawpa kan buai kan sawi zo a, lirnghingin min han nawr a, ramri buai kan han kal chho a, a hau tak talh talh khawp mai han kal tak tak kha chu. Amaherawhchu, khami karah khan Pathianin kan vaia kan tawngtina leh kan tanhona tihan hlawhtlingin, a thi te pawh 10 pel loin vawiin ni kan thleng a, a damlo pawh 10 hnuai lamah te kan han awm leh rih thin a. Chuvangin, lawmawm kan ti a. Chuvangin, vawiina kan resolution ang hian, heta kan vaia kan thawhhona a sawrkar lam te pawh, a mipui zawng zawng lam te, Kohhran lam te, NGO lam te, frontline a thawktu zawng zawng, kan force te, a vai hian a lawmawm a ni. Lawmthu in hrilh mawlh mawlh tur kan ni. Amaherawhchu, a khaikhawmna erawh chu engkimah, he mi Referral Hospital history tawi te ka sawi ang khan remruatna hi a tir atangin Pathian-in kan zawh loh khawp tur, kan chunga phurrit nghawngkawl dah loin ti hian kan zawh tawk tur tein min rawn ruahman sak a, a remruatnain ti hian min sutchhuah sak a. Ka rindan tak phei chuan hemi kan kal pelh hunah malsawmna period lo thlenga, chuta thlarau lamah pawh harh tharna leh lawmna thar hmuin Mizoram hi kawng chi tin reng, chanchin tha hrilah leh entawn turah pawh hmahruaituah kan awm ngei pawh ka ring a. Hei, tunah han en ila kan thenawm lawk Burma pawh an buai dan khiti

khi a ni a. Asia khawmualpuiah hian Mizo lo hi chu hetianga han hmantlak tur awm pawh hi kan awm lo va.

Thil pakhat Pu Speaker, kan sawi leh lawk duh chu, a sawi pawh hi ka sawi fo tawh thin a. Kan fel lo, drug vei kan tam, zu vei kan tam, chuti khati kan ti a, chuti chung chuan tourist pakhat-in a sawia chu, “Aizawl khawpui Mizoram chu chawlhnii ah zing dar 9 - 10 a lo ni a, Biakin dar zawng zawng an ri chuah chuah mai a, chutah naupang te atanga tar thlengin sunday dress nen Biakin lam pana an han thelh sung sung mai chu, hetiang hi khawvel khawpuiah tun angah a awm tawh lo reng reng” a ti a, a dik pawh a dik chiah a. Chutiang chuan, kan tlinglo kan fello kan ti chung hian Pathian-in hman tur hi ram angin, hnam angin, kohhran angin zawng sela, Mizoram aia tha kha khawvelah hian hman tur remchang kha a dang a awm ka hrelo reng reng. Chuvangin ven a tul hunah pawh vengin, amaherawhchu engkim buainain a chim hauh loh tura lak hran chu ni bik loin, mi harsatnate hriatpuiin, amaherawhchu ven a tul hunah chuan vengin Pathian-in ti hian min kaihhruaina leh venhimna Zoram mipuiin malsawmna kan dawng a ni tih hi hriain Pathian hnенah lawmthu sawiin, a thawktu leh kan mipui zawng zawnge chungah kan lawmna thu hi han sawi tlang ila a thain ka hria a.

Point pakhat ka theihngilh leh lawk chu, ‘CM Relief Fund’ tih kha, a hming kha kan hmang laklawh si a, a relief fund tak taka kha chu covid atang kha chuan ₹1/- pawh kan hmu tawh miyah lo a, a pe zawng zawng covid-ah a lut vek a. Nimin nge nimin piah khan CM Relief Fund tak tak tur a ti a, ₹2,000/- or ₹3,000/- vel niin ka hria a, kum khat chhung kha chiah kha CM Relief Fund tak taka pe a ni a, adang chu covid fund-ah a lut vek a. A leh lamah chuan damlo min rawn dil, kan harsa si tia pek ngai kha, a bang kha ren em emin kan sem a a buaithlak khawp a, covid fund hi tlema a ngaih tawh loh deuh chinah phei chuan a relief fund ang zawnge pawh khan retheite pek tur pawh alo la lut khawm turah ngai ila. Tin, helai, a tira kan tiyah khan, December thla thleng chuan kan hlawh atang pawhin a theih ang angin pe ila, tin kan MLA fund te pawh pe ila, a piah lam erawh chu a tul angin kan en dawn nia kan ti a, kan han pe diah diah a. Amaherawhchu tunah chuan heti hi anih deuh tak avangin kan hlawte pawh cut a ngai ta lo e kan ti a, MLA fund pawh a ngai lo e kan ti a. Amaherawhchu tlema advance zual deuhte a lo pe hman an awm a, “Ngawi rawh u, thiante’n an pek loh laia pe bik nih kha chu a mawi pawh a mawi lo ang e, a that pawh a tha lo ang e, khang kha chu la kir leh mah ula a pawi lo ang e” kan inti a, a tul anih leh kan boruaka zirin a thei theiin kan thawh leh den den dawn nia kan tih lam thil a ni.

Engpawnise Pu Speaker, a lawmawm lam thil a ni a, hetianga kan resolution neih hi kan thinlung takin tha kan ti a, Pathian venhimna vangin Zoram mipui, NGO, Kohhran, frontliners zawng zawnge thawh hona hi Pathian-in mal a sawm a, a lawmawm a ni tih resolution hi adopt turin kei pawhin kan support a ni e. Ka lawm e.

SPEAKER : Awle, tunah chuan a resolution neitu Pu H. Biakzaua, Member zahawm tak ka sawm ang a, rawn wind-up se, tin, adopt rawn dil nghal turin ka sawm e.

PU H. BIAKZUA : Pu Speaker, ka lawm e. Ka resolution rawn put luh hi member 18 laiin an sawi a, a ngaihnawm hle mai a, sawi leh tur pawh a awm chuangin ka hre lo a. Tin, han sawi belh viau dawn ila, hman hmawh deuh tak tak kha kan awm tawh a, Lunglei kal tur tih te, tin, ban tlai hi kan ti zing tawh a Demand sawi lai khan, ban hma kan beisei rilruin ka hria a, han wind-up sei deuh ta ila min ngeih lo deuh thum dawnin ka hria a, chuvang chuan, ti vak tawh lo ila a that zawk ka ring.

Pu Speaker, tawitea ka han sawi duh erawh chu, ka resolution *wording* kha amendment rawn beisei pahnih an awm a, an rawn beisei dan kha Congress hming han telh tih te, ZMC tun hmaa Congress in tlema zawng hma an lo lak awm nia an rawn sawite han tih lan vel kha rawn sawi deuh kha a awm a. Tuna kan resolution nen a intu lova, Covid dona chungchanga lawmthu sawina a ni, he kan resolution hi chu. Chuvangin, amendment rawn beisei kan Member zahawm tak tak pahnih khan lo hrithiam sela, amend lo hram ila tih ka duh deuh a, ka remti chiahlo a ni. Tichuan, a wording hi kan hria a, “sawrkar, kohhran, tlawmngai pawl leh zoram mipuite” tih a ni a, kan vaiin min huap vek a ni, a tello reng reng kan awmlo hetah hian, party hming emaw, helaia achievement emaw, activities an lo neih emaw kha zu lantir bik tumna tumah kan nei lova. Sawrkar, Kohhran, Tlawmngai Pawl leh mipuite, chuta tel lo chu kan awm tawh lovin ka ring a. Chuvangin, min funkim thawkhatah ngai ta ila a that ka ring a. Sawi rei viau pawh ni ila kan pass dawn tho a, sawi tawi viau pawh ni ila wind up hi chu, kan pass dawn thoin ka hria a. Pu Speaker, *quarantine* uar lai khan Kohhran Hall-ah quarantine an nei a, engemaw zat kha an han test a, Pathian zarah an lo negative vek mai a, pakhatin, “kan lo chawm thlawn alawm le, a va zialo ve maw le, a ti e,” an ti a. Khatiang deuh khan sawi rei emaw, sawi reiloh emaw khan a resolution wording hi a tha sa em mai a, chuvangin kan pass dawn tho niin ka hria a, a support lo reng reng kha Member zahawm tak takte zingah an awm lova, amendment dil pahnih bak kha chu, an sawi ang khan an support vek a. Chuvangin, Pu Speaker, ka resolution rawn putluh “Covid-19 hripui leng do kawnga Sorkar, Kohhran, Tlawmngai Pawl leh Zoram mipuite tanrualna avanga India rama a ti tha ber state zinga Mizoram kan tel hi a lawmawm kan ti a, he hripui dona kawngah nasa lehzuala tan ho chhunzawn zel a tha kan ti” tihi House zahawm tak hian min adopt sak turin ka rawn ngen e. Ka lawm e.

SPEAKER : Resolution neitui adopt, House a rawn dil a, kan buk ang a. “Covid-19 hripui leng do kawnga Sawrkar, Kohhran, Tlawmngai Pawl leh Zoram mipuite tanrualna avanga India rama a ti tha ber State zinga Mizoram kan tel hi a lawmawm kan ti a, he hripui dona kawngah nasa lehzuala tanho chhunzawm zel a tha kan ti” tihi adopt remti apiangin, “remti” ti rawh u le. Remtilo kan awm chuan, “remtilo” ti ula. (*An awm lo*)

Awle, member zahawm tak Pu H.Biakzaua Resolution “Covid-19 hripui leng dona kawnga Sorkar, Kohhran, Tlawmngai Pawl leh Zoram mipuite tanrualna avanga India rama a ti tha ber state zinga Mizoram kan tel hi a lawmawm kan ti a, he hripui dona kawngah NASA lehzuala tanho chhunzawm zel a tha kan ti” tih chu House-in lungrial takin a pass ta a ni.

PU H. BIAKZAUA : Pu Speaker, ka lawm e.

SPEAKER : Kan lungrial em mai a ka han thluk ve deuh anih kha. Vawiina kan tihtur chu kan zo leh ta a, kan chawl rih ang a, kar leh Ni 15.3.2021(Thawtanni) zinglam dar 10:30 ah kan thukhawm leh dawn nia.

Sitting is adjourned.(4:57 PM)